

萬 有 文 庫

第 二 集 七 百 種

王 雲 五 主 編

宋 詩 紀 事

(三)

厲 鶚 馬 日 瑄 輯

商 務 印 書 館 發 行

宋 詩 紀 事

(三)

厲 鶚 馬 日 瑄 輯

國 學 基 本 叢 書

萬有文庫

第二集七百種

總編纂

王雲五

商務印書館發行

宋詩紀事卷十一

錢唐厲鶚緝
祁門馬曰璐同緝

宋庠

庠字公序，初名郊，字伯庠，安州安陸人。徙開封之雍丘。天聖二年，舉進士第一，入翰林爲學士。歷檢校太尉平章事、樞密使、封莒國公。以司空致仕。卒，贈太尉兼侍中，諡元憲。有集。

西清詩話：二宋俱爲晏元獻門下士，兄弟雖甚貴顯，爲文必手抄寄公求雕潤，嘗見景文寄公書曰：「莒公兄赴鎮圃田同遊西池，作詩云：『長楊獵罷寒熊吼，太乙波閑瑞鶴飛。』語意警絕，因作一聯云：『白雪久殘梁覆道，黃頭閑守漢樓船。』仍注空字于閑之旁，批云：『二字未定，更望指示。』晏公書其尾曰：『空優于閑，且見雖有船不御之意，又字好語健，蓋前輩務求博約情實，臆至蓋如此也。』

答葉道卿

紙尾勤勤問姓名，禁林依舊玷華纓。莫驚書錄題臣向，便是當時劉更生。

西清詩話：宋郊字伯庠，在翰林，有指其姓名，傳以他說者，因請更名庠。嘗移書葉道卿清臣，目爲同年。葉戲答云：『清臣宋郊榜第六人登第，徧閱小錄，無宋庠者，不知何許人。』庠答詩云云。

展江亭成留題

綠鴨東陂已可憐。更因雲竇注新泉。鑿開魚鳥忘情地。展盡江湖極目天。向夕舊灘都浸月。邊空新樹便留煙。使君直欲稱漁叟。願得閑州不記年。

西清詩話許昌西湖展江亭成宋元憲留題有鑿開魚鳥忘情地展盡江湖極目天之句皆以爲曠古未有此詩然本于五代馬殷據潭州時時建明月園命幕客徐仲雅賦詩云鑿開青帝春風園移下姮娥夜月樓用古句摹擬詞人類如此但有勝與耳否

落花

一夜春風拂苑牆。歸來何處剩淒涼。漢臯佩冷臨江失。金谷樓危到地香。淚臉補痕頰獮髓。舞臺收影費鸞腸。南朝樂府休賡曲。桃葉桃根盡可傷。

侯鯖錄宋葛公兄弟少作落花詩爲時膾炙

莊惠后挽詞

嬌幄柔明訓。堯關保護賢。別居長樂寢。讓給水衡錢。謹疾方加膳。收神亟去仙。宸襟增服紀。追報煥終天。昔帝推嬪則。吾君賴母慈。陪陵漢家葬。異室闕宮祠。霧暗星軒隱。天愁月御移。翟車參享路。無復廟中期。

莊獻太后挽詞

寶慈垂母訓。一紀御璿除。地有占沙舊。天仍補石餘。軒星淪夕緯。翟輅去宸居。異日金滕啓。方知復辟書。

自注太后上仙後於巾箱中得復辟詔書

肝身無憚寒暄疾有加。災生織女柰。魂斷濯龍車。廡髮浮晨旭。邊簫咽暝霞。唯留長樂注。刊美在皇家。
以上合璧事類前集

季秋曉出題山光寺

旦夕人語喧。汎舟北城曲。十里望禪刹。飄若塵外躅。是日秋宇高。清輝澹晨旭。林風唱殘蛩。澤稗下飢鶻。
野實迎露黃。川蕪傲霜綠。循涯得微徑。捨楫步幽麓。佛寺訝靚深。僧廬互重複。山氣導眞想。天香洗煩欲。
嗟余秉微尙。正壑返初服。失計蹈塵鬪。虛名玷纓轂。妄排金馬門。謬草紫泥牘。器偏固自傾。綆短良難續。
何言一麾出。尙參九州牧。恩深無後疵。顏覩有餘慝。孔訓懲憚改。義爰許頻復。竭來清淨區。冀脫泥塗辱。
醉象或可調。藩羝悔前觸。萬緣自我空。至道非外勗。聊謹三載期。吾得事棲伏。
揚州府志

宋 祁

祁字子京。天聖二年。與兄庠同舉進士。奏名第一。章獻太后以爲弟不可先兄。乃擢庠第一。而實祁第十。時號大小宋。累遷知制誥工部尙書翰林學士承旨。卒諡景文。有集。

東軒筆錄。子京博學能文章。天資蘊藉。好游宴。以矜持自喜。晚年知成都府。帶唐書於本任刊修。每宴罷盥漱畢。開寢門。垂簾。燃二椽燭。媵婢夾侍。和墨伸紙。遠近觀者皆知尙書修唐書矣。望之如神仙焉。多內寵。後庭曳羅綺者甚衆。嘗宴于錦江。偶微寒。命取半臂。諸婢各送一枚。凡十餘枚。皆至。子京視之茫然。恐有厚薄之嫌。竟不敢服。忍冷而歸。

九日食餠

臚館輕霜拂曙袍。糗餈花飲鬪分曹。劉郎不敢題餈字。虛負詩中一世豪。

聞見後錄。劉夢得作九日詩。欲用餈字。以五經中無之。輟不復爲。宋子京以爲不然。故子京詩云云。糗餌粉餈。餈類也。出周禮詩豪。樂天目夢得云。

玉堂作

粉署重來憶舊遊。蟠桃開盡海山秋。寧知不是神仙骨。上到鼇山更上頭。

東軒筆錄。嘉祐中。翰林諸公皆入政府。時包拯爲三司使。宋祁守鄭州。二公久著人望。而不見用。京師諺語曰。撥隊爲參政。成羣作副樞。虧他包省主閤。殺宋尙書。明年包亦爲樞密副使。而以翰林承旨召景文。景文以詩寄梁丞相。略云。梁園賦罷相如。至宣室。釐磻賈誼歸。蓋謂差除兩府。足方被召也。爲承旨又作詩云云。

清明日集西園

日日西園春思催。攜觴結客上高臺。正緣從事青州至。更許書生洛下來。早葉已成花半落。新巢未定燕千迴。芳辰物物皆堪愛。併作高陽倒載媒。時州醞既美。又命座客賦詩。故有第二聯。

中山立秋

峯雲曉影破屏顏。萬里風生結早寒。人在兜零烟外走。歲從鷓鴣口中殘。槽聲併滴添新酎。笥月兼輪掩故紈。白髮光陰誠可惜。五年搔首問長安。

八月望夜無月有感

素波涼暈淡曾城。悵悵三年此夜情。獨捲練帷成默坐。暗蟲相命作秋聲。

閏正月二十五日送客尋春集裴氏園

尋春選客共流連。雨罷春郊物物妍。黃抹柳梢初徧後。紫黏花萼未開前。朋衿自爲交驩慘。醉罈誰能辨聖賢。猶賴斜陽催跋馬。不然離恨損絲弦。

七月二十七日

客雁歸何處。寒螿鳴不休。兼之清夜永。副以長年愁。家令有移帶。中郎餘白頭。此懷誠自感。何賴怨高秋。

十日宴江濱亭

節去歡猶在。賓來賞更延。悠揚初短日。淒緊乍寒天。霧沼元非漲。秋花自少妍。蟻留新獻酎。蕙續不殘烟。

過摩訶池

十頃隋家舊鑿池。池平樹盡但回隄。清塵滿道君知否。半是當年濁水泥。池邊不見帛闌船。麥壠連雲樹繞天。百歲興衰已如此。爭教東海不爲田。

余旣到郡有詔仍修唐書寄局中諸僚

一章通奏領州麾。詔許殘書得自隨。吾黨成章真小子。官中事了是癡兒。昏眸視久花爭亂。倦手搔餘雪半垂。所願弟兄皆傑筆。劉生當見汗青期。

司馬相如琴臺

故臺千古恨。猶對舊家山。半夜鸞鳳去。他年駟馬還。死憂封禪晚。生愛茂陵閑。唯有飄飄氣。仍存天地閒。

江濱亭

一暈掀翅壓溪隅。吏事初閑此燕居。斷岸有時通略約。輕風盡日戰枰欄。雲鴻送目揮弦後。手板看山拄頰餘。芟碧蒲青來更數。江人多識使君旟。

九日藥市作

陽九協嘉神。期入始多暇。五藥會廣塵。遊肩闢相駕。靈品羅賈區。仙芬冒闔舍。擷露來山阿。斷煙去巖罅。係道雜提攜。盈籥更薦藉。乘時物無賤。投乏利能射。癰芥互作主。參薺交相假。曹植謹贖令。韓康無二價。西南歲多癘。卑溼連春夏。佳劑止刀圭。千金厚相謝。刺史主求瘼。萬室繫吾化。顧賴惡石功。捫衿重慚喏。

將歸

遠假西南守。三逢梅柳新。衰令宦情薄。老惜歲華頻。郛釀工銷日。巴禽巧喚春。離家何所恨。雁後作歸人。

覽蜀宮故城作

國破江山老。人亡谷壑摧。鴛飛今日屋。鹿聚向時臺。故苑猶飛雪。荒池但劫灰。賴遺糊處壤。闔記數殘枚。恨月窺林下。悲風覓隴來。依城狐獨速。失廈鷺裴回。廢社纔存樹。陰垣自上苔。有情惟杜宇。長爲故王哀。

集海雲鴻慶院

地勝祠仍古。春餘物徧華。山雲時抱石。佛雨不萎花。嶺挾樓梯峻。巖牽殿城斜。淙谿雜環佩。怪蔓走龍蛇。供坐僧飛鉢。香園客戲沙。吾遊眞草草。深意屬青霞。以上成都文類

秋夜

西風已飄上林葉，北斗直挂建章城。人閒底事最堪恨，絡緯啼時無婦驚。老學庵筆記。

咏漢史

朱游雲小字英氣凜生風，濱死危言悟帝聰。殿檻不修旌直諫，安昌依舊漢三公。韻語陽秋。

題三泉龍洞

蚪洞聳雲峯，緣虛一棧通。雲披雙壁敞，樹補半巖空。概竹森煙蘂，飛泉曳玉虹。重蘿不肯畫，陰壑自然風。嶺斷天斜碧，崖傾日倒紅。浮江邈難遇，留恨翠微中。

能改齋漫錄：三泉龍洞，以山爲門，深數十步，復見天日，及山水之秀，蓋自然而成，非人力也。宋景文公賦詩。

蛙

越國車前矜勇甚，子陽井底太驕生。乘時不羨雲溟樂，口作儀同鼓吹聲。

蜨

撲粉曾過宋玉牆，一身生計託流芳。不須長結東風願，秋菊春蘭各有香。以上合璧事類別集。

吳中友人惠蟹

秋水江南紫蟹生，寄來千里佐吳羹。楚人欲使衷留甲，齊客何妨死願烹。下筯未休資快嚼，持螯有味散朝醒。定知不作彭蜨悞，曾廁西都博士名。蟹略。

臘後晚望

寒日繫難定，鳴笳弄已休。
凍崖初辨馬，昏谷自量牛。
漢樹臨關密，胡泉入塞流。
登高能賦未，風物古堯州。

送越州陸學士

梅天霞破候旗乾，鄉樹依然越絕閒。
挾策當年逢掖去，懷章此日繡衣還。
亭餘內史浮觴水，路入仙人取箭山。
牛酒盛誇先墅宴，不妨春詔得親班。

答勸農李淵宗嘉州江行見寄

嘉月嘉州路，軻峩按部船。
山圍杜宇國，江入夜郎天。
霧引溪流望，涼供水閣眠。
愧君舟楫急，遂欲濟長川。

贈清逸魏處士

奕世依巖石，裛恩下帝庭。
姓名高士傳，父子少微星。
池溜遙通澗，家林近帶坰。
分明詔書意，天極賜鴻冥。

瀛奎律髓此魏野之子

閑也亦能詩世其隱

長安道中悵然作

三輔古風煙，征驂悵未前。
山園蓬顆外，自注賈山議始皇侈葬言後世不得蓬顆蔽冢
宮室黍離邊。
樹老經唐日，碑殘刻漢年。
便須真隕涕，不待雍門弦。

寒食假中作

九門煙樹蔽春塵，小雨初晴潑火前。
草色引開盤馬地，甯聲催暖賣錫天。
紫絲早絮輕無著，弄袖和風細

可憐。鼈署侍臣貪出沐，珉麩珠餠愧頒宣。

擬杜子美峽中意

天入虛樓倚百層。四方遙謝此登臨。驚風借壑爲寒籟，落日容雲作暝陰。峴井北拋王粲宅，楚衣南逐女媧砧。十年不識長安道，九籥宸開紫氣深。

春宴行樂家園

園苕初乾小雨泥。飲壺游屐況親攜。身輕早蝶千回舞，技癢新禽百種啼。乘飲草茵侵坐軟，畏風桃綬向林低。陽暉自有留人意，銜照高樓未遽西。原注：芴人去聲。

把酒

歌管嘈嘈月露前。且將身世付醄然。漫誇驪鼠機頭箭，不識醯雞甕外天。青史有人譏巧宦，黃金無術治流年。君看醉趣兼醒趣，始覺靈均更可憐。

落花

墜素翻紅各自傷。青樓煙雨忍相忘。將飛更作迴風舞，已落猶成半面妝。滄海客歸珠迸淚，章臺人去骨遺香。可能無意傳雙蝶，盡付芳心與蜜房。以上瀛奎律髓。

瀛奎律髓夏英公守安州景文兄弟以布衣游學席上各賦落花詩。英公以爲有台輔器後元憲狀元景文甲科同榜天下以爲二宋。

希夷峽

仙館三峯下。年華百歲中。夢休孤蝶往。蛻在一蟬空。葉笈微言祕。霄辰浩氣通。丹遺砥後鼎。林遣御餘風。布霧沈荒白。澹霞委暗紅。蛾眉有歸約。飛步與誰同。華嶽全集

寄大固山嘉祐院長吉上人上人曾遊京師得宋公以下一百四十五人所書般若經。建臺以貯之。

名高身愈隱。孤錫倚巖扃。園布黃金地。臺藏白馬經。庵雲吞暝燭。澗月瀉虛瓶。坐想谿橋路。莓苔又幾青。台州府志。

句

色映珊瑚爛。聲迎羽月遲。

六一詩話。天聖二年。省試采侯詩。宋尙書祁最擅場。

其句云云。尤爲京師傳誦。當時舉子目公爲宋采侯。

碧雲謾有三年信。明月空爲兩地愁。

優古堂詩話。雲齋廣錄云。二宋以文章齊名天下。子京守蜀日。作詩三百名曰叢囊。有句云云。後卒不入兩府。人以爲詩。識予以子京用何遜與胡興安夜別詩。念此一筵笑。分爲兩地愁。廣錄之論。不知所自也。

蟹美持螯日。鱸香抑鮓天。芥隱筆記。曉日侵簾押。春寒到被池。侯鯖錄。青帝回風還習習。黃人捧日故遲遲。困學紀聞。虺蔓相結盤。蚪梢久回曲。紛若未契繩。繁如已綸紵。咏藤。誰言漢樸學。正似楚枝官。以上哲匠金桴。

吳感

感字應之。吳邵人。天聖二年。省試第一。九年。又中書判拔萃科。仕至殿中丞。

如歸亭

五柳門南派水東。水邊亭上興無窮。半窗山色來雲外。一枕荷香帶雨中。繡被夜歌青翰檝。綠波春颺紫
莖風。塵曹未竊江湖號。攜手闌干早晚同。吳江縣志。

呂造

造。管江人。言子。天聖二年進士。

刺桐城

閩海雲霞繞刺桐。往年城郭爲誰封。鷓鴣啼困悲前事。荳蔻香銷滅舊容。

泉南雜記。泉州築城時。環城皆

植刺桐。故號刺桐城。呂造詩云。

胡宿

宿。字武平。常州晉陵人。天聖二年進士。歷兩浙轉運使。召修起居注。知制誥。翰林學士。拜樞密副
使。罷知杭州。以太子少卿致仕。薨。贈太子太傅。諡文恭。有集。

太湖石

海岱鉛松妄得名。洞庭山腳失寒瓊。漱成一朶孤雲勢。費盡千年白浪聲。誰向機邊逢織女。直疑巖下見
初平。年來賞物多成病。日遶蒼苔幾徧行。

宿秀峯寺 在靈巖山。

夕鐘初斷海鯨音。投宿香園半翠岑。冰簟浸牀消客夢。水簾澄月伴僧吟。雄風拂衽清涼極。珍樹交柯翠翳深。一夜漢陰機事息。草堂虛論破煩襟。

彭山贈貫之

彭山隔重湖。落日見孤塔。揚舲入空曠。煙樹散鵝鴨。山中老臞仙。萬頃織芥納。乘風落珠唾。暝色遠相答。平生爾汝分。磁鐵契已狎。萬緣一笑空。箇處無剩法。方舟過谷隱。風雨寒霎霎。黎明帶星歸。尙及齋鼓踏。臨歧戒後會。梅熟新秧插。期我散縑楮。莫忘鷗盟歃。

送楊中允宰常熟

丹舸傍江潯。嘔啞遠鷗音。新科持片玉。能政引孤琴。美進宮坊秩。榮歸里閭心。名參天下雋。歌著邑中黔。地志連香徑。家園帶武林。吳山幾屏秀。楚水一篙深。晚鼓停餘疊。秋帆臥半陰。平時接方驥。後夜望橫參。陶菊何妨醉。江毫且剩吟。悠悠河上別。千里鬱朋簪。

送顯忠上人歸吳郡

秋風隨處起。振錫不留行。卻背嵩雲去。迎看淮月生。禪通少林默。詩得杼山清。幾夕巖窗下。忘眠聽瀑聲。
以上吳郡志。

過桐廬

兩岸山花中有溪。山花紅白徧高低。靈源忽若乘槎到。仙洞還同採藥迷。二月辛夷猶未落。五更鴉白最先啼。茶煙漁火遙堪畫。一片人家在水西。

塞上

漢家神箭定天山，煙火相望萬里閒。
契利請盟金七酒，將軍歸臥玉門關。
雲沈老上妖氛斷，雪照回中探
騎閑。五餌已行王道勝，絕無刁斗至闐顏。

飛將

曾從嫖姚立戰功，胡雛猶畏紫髯翁。
雕戈夜統千廬會，緹騎秋畋五柞宮。
後殿拜恩金印重，北堂開宴玉
壺空。從來敵國威名大，麾下多稱黑稍公。
以上瀛奎律髓

次韻朱沈春雨之什

蒼野迷雲黯不歸，遠風吹雨入巖扉。
石牀潤極琴絲緩，水閣寒多酒力微。
夕夢將成還滴滴，春心欲斷正
霏霏。憂花惜月長如此，爭得東陽病骨肥。

淮南王

貪鑄金錢盜寫符，何曾七國戒前車。
長生不待爐中藥，鴻寶誰收篋內書。
碧井牀空天影在，小山人去桂
叢疎。雲中雞犬無消息，麥秀漸漸徧故墟。

早夏

井轄投多思不禁，密垂珠箔晝沈沈。
睡驚燕語頻移枕，病起蛛絲半在琴。
雨徑亂花埋宿豔，月軒脩竹轉
涼陰。一春酒費知多少，探盡囊中換賦金。
以上宋藝圃集

芙蓉湖

小湖香豔戰芙蓉。碧葉田田擁釣篷。嵐氣欲飛山隔岸。秋光不定水搖空。翩翩雪鳥爭投浦。潑刺霜鱗對擲風。正是滄浪濯纓日。一竿多謝紫溪翁。咸淳毘陵志

函谷關

天開函谷壯關中。萬古驚塵向此空。望氣竟能知老子。棄繻何不識終童。謾持白馬先生論。未抵鳴雞下客功。符命已歸如掌地。一九曾誤隗生東。河南府志

津亭

津亭歌闋戒棠舟。五兩風來不暫留。西北浮雲連魏闕。東南初日滿秦樓。層城渺渺人傷別。芳草萋萋客倦遊。平樂舊懽收不得。更憑飛夢到瀛洲。

沖虛觀

五粒青松護翠苔。石門岑寂斷纖埃。水浮花片知仙路。風遞鸞聲認嘯臺。桐井曉寒千乳斂。茗園春嫩一旗開。馳煙未勒山庭字。可是英靈許再來。

淮南發運趙邢州被詔歸闕

天臺封詔紫泥馨。馬首前瞻北斗城。人在函關先望氣。帝於京兆最知名。一區東第趨晨近。數刻西廂接晝榮。正是兩宮裁化日。百金雙璧拜虞卿。以上顧氏積善巖選

憶廣福寺牡丹

十日春風隔翠岑。祇因繁朶自成陰。尊前可要人頽玉。樹底遙知地御金。花界三千春渺渺。銅槃十二夜

沈沈雕盤分寥何由得空作西州擁鼻吟常州府志

尹洙

洙字師魯河南人天聖二年進士知伊陽縣召試爲館閣校勘累遷右司諫知渭州兼領涇原路
經略公事坐貶卒有河南集

開見錄本朝古文柳開仲塗穆脩伯長首爲之倡尹洙師魯兄弟繼其後歐陽文忠早工偶儷之
文及官河南始得師魯乃出韓退之文學之蓋公與師魯文雖不同公爲古文則居師魯後也

皇雅十篇

天監受命也自梁至於周兵難不息宋受命統一萬方焉

天監下民亂靡有定甚武且仁祚厥真聖仁實懷徠武以執競匪虔匪劉極我天命自昔外禪曰經曰營
令以挾制政以陰傾帝初治兵志勤于征奄受神器匪謀而成淮潞弗虔卒汚叛跡戎輅戒嚴皇威有赫
彼寇誑民吾勇其百殄厥渠魁貸其反側帝朝法宮左右宗公仗夫悍士以雍以容爾居爾室爾工爾農
既息既養惟天子功

天監四章章八句

西師征蜀也

主用西師岷梁弗賓匪曰負固實交晉人予訓子誓念我將臣正厥有罪無庸傷民矯矯虎士載摧其壁
吁嗟孟侯亦果其策迎師而降靡抗鋒鏑豈獨身謀完是宗國蜀都既平將臣失律此衆悍驕彼民危慄

堂塗叫喚。合萬爲一。匪懷則威。帝心是恤。帝曰將臣。予嘉乃庸。廢命毒民。爾弗有終。邦典用疑。惟罪惟功。歷殛而削。協于厥中。帝曰孟侯。受封于楚。淑旂瑀戈。備物異數。俾爾族姻。及乃文武。服在王庭。靡不有序。蜀民呼歌。天子威靈。保我者封。暴我者刑。匪功是私。匪弱是陵。天子惠民。疇敢不承。

西師六章章八句

耆武受俘也。命將伐南海。平金陵。俘二王以獻。

耆武定功。惟時二方。淮服其乂。海南遂荒。孰孱而整。孰暴而昌。自民不惠。乃終滅亡。帝戒二俘。同卽爾誅。予惟民無辜。休息是圖。時其戢矣。寧威獨夫。帝嗟汙邦。久罹于民。或暴下以征。或敷虐以刑。予命中興。協于國經。民服德音。室家以寧。

耆武三章二章八句一章六句

憲古令守臣也。削其附庸。以強帝室焉。

帝懷永圖。治古是憲。四方守臣。惟屏惟翰。在昔艱難。弗惠訓典。跨都連城。高牙以建。有士有民。肆乃征繕。以息以容。終焉叛渙。凡今師臣。維厥聞見。匪革亂原。曷清多難。帝告庶邦。式是典彝。元侯顯文。戚臣宗支。正乃封圻。予一人是毗。凡曰附城。罔爾俾之。畜兵厚賦。靡爾得私。毋凶而國。作福作威。天子有命。疇敢不祇。子孫承承。惟萬世規。

憲古二章章十六句

大鹵王師討管罪也。

冀州之強。粵惟大鹵。俗伎而專。地扼而固。協彼幽都。蕩搖邊圉。三乘旣夷。凶威弗阻。帝御六師。百萬貔虎。翦其附庸。至于城下。鋒鏑始交。梯衝如舞。蝨爾孱王。請附降虜。我士奮揚。願究吾武。皇帝曰。吁。念彼黎庶。匪鯨匪鯢。復爲王土。晉郊旣平。九區以寧。陳功太廟。告假威靈。在昔武臣。于商觀兵。惟吾藝祖。亦勤于征。匪貸晉罪。俟厥貫盈。聖作聖繼。巍巍相承。皇矣二后。功莫與京。

大鹵二章。一章二十二句。一章十四句。

帝藉脩牧典也。躬耕以勸農焉。

帝藉于郊。典儀是陳。務農以訓。供祀以勤。勤祀在誠。匪勤于人。訓農以實。匪酬以文。帝愼二物。乃躬乃親。公侯卿士。暨厥庶民。于甸有制。飭哉惟寅。帝賚高年。式宴且喜。種種黃髮。族立而議。我生艱難。暴亂以繼。耳聃金鼓。目狎戎器。皇其我圖。親講農事。有子有孫。力田孝悌。鼓舞至仁。薰焉以醉。

帝藉二章。章十四句。

庶工任賢也。

帝咨庶工。疇其輔予。俊乂以登。厥勞乃圖。匪忘舊勳。非賢勿僉。巍巍衮台。盛德以居。任賢伊何。昌言是庸。勉吉爾猷。罔恤乃躬。豈無狷辭。拂于予衷。予不爾疵。爾無面從。始如從官。戎容揚揚。今帝左右。儒官煌煌。朝廷以尊。文物典章。得人之盛。奕世重光。

庶工三章。章八句。

帝制北方請盟也。

帝制萬方。罔有弗賓。蠻夷戎狄。羈而弗臣。盛格三方。稽顙獻琛。單于革心。願交使人。帝謀公卿。列侯庶校。咸曰彼心。暴戾陰狡。旣擾我疆。復利我寶。無若厲兵。襲其還道。皇曰有衆。予實念茲。戰無必勝。矧其歸師。借曰大獲。疇能盡之。益俾餘醜。毒吾朔陲。乃兪其盟。北州以綏。在漢世宗。抗威北戎。暴農算商。經用弗充。中土震騷。漢南始空。降及後世。猶稱厥功。於穆聖考。德無與偕。匪勤于兵。北人遂來。逮是三紀。遠俗以懷。生民休息。嗚呼仁哉。

帝制五章。四章八句。一章十句。

皇治慎刑也。帝仁于用刑。在位者以寬恤爲治焉。

皇底其治。欽哉惟刑。在疑而宥。罔察爲明。愛怒弗肆。孰爲重輕。毋一弗辜。惟典之平。前世理官。倚法以刻。匪彼爲讎。蓋曰任職。今之決獄。務正其辟。鑒于前人。絜我仁德。皇德在仁。寢而成風。公侯卿士。靡不率從。麇卵萌生。咸保厥終。不鄙不夭。樂哉融融。

皇治二章。章八句。

太平封祀告成功也。

噫噫太平。無象兮世。烏得而知。惟盛德可迹兮。其封祀之儀。東岱宗兮。西汾睢。禮上靈兮。賓地祇。皇有征兮。吾民以禱。皇有祈兮。吾民是私。天敷佑兮。俾皇之釐。永世億寧兮。無疆之基。

太平一章八句。以上河南集。

易占字不疑致堯次子天聖二年進士知信州玉山縣坐法失官

題洪州僧寺

今朝才是雪泥乾。日薄雲移又作寒。家山千里何時到。溪上梅花正好看。能改齋漫錄。

謝伯初

伯初字景山。晉江人。天聖二年進士。許州法曹。

六一詩話。天聖景祐間。景山以詩知名。余謫夷陵時。景山方爲許州法曹。以長韻見寄。頗多佳句。余答云。參軍春思亂如雲。白髮題詩愁送春。蓋景山詩有多情未老。已白髮野思到春如亂雲之句。故余以戲之也。又如自種黃花添野景。旋移高竹聽秋聲。園林換葉梅初熟。池館無人燕學飛之類。皆無媿於唐諸賢。而仕宦不偶。終以困窮而卒。

寄歐陽永叔謫夷陵

江流作險似瞿塘。滿峽猿聲斷旅腸。萬里可堪人謫宦。經年應合鬢成霜。長官衫色江波綠。學士文章蜀錦張。異域化爲儒雅俗。遠民爭識校讎郎。才如夢得多爲累。情似安仁久悼亡。下國難留金馬客。新詩傳與竹枝娘。典辭懸待修青史。諫草當來集阜囊。莫謂明時暫遷謫。便將纓足濯滄浪。六一詩話。

許昌公字書懷。呈歐陽永叔韓子華王介甫。

十年趨競浪求營。因得閑曹減宦情。亂種黃花看野景。旋移高竹聽秋聲。驅馳賤事猶干祿。約勒清狂爲近名。早晚持竿釣鱸鱖。雙溪煙雨一舟橫。宋文鑑。

句

移家尚恐青山淺，隱几唯知白日長。劉諷都官致仕。古今詩話。

葉清臣

清臣字道卿，長洲人。天聖二年進士，歷翰林侍讀學士，權三司使，出知河陽，卒贈諫議大夫。有集。

遊攝山棲霞寺

仙峯多靈草，近在東北維。僧紹昔捨宅，總持嘗作碑。高風一緇邈，廢宇亦陵遲。清泉漱白石，霏霧蒙紫芝。松蘿日蕭寂，猿鳥自追隨。遊人少或詣，隱者誰與期。支郎篤清尚，千里孤雲飛。覽古玩青簡，尋幽窮翠微。顧予荷戟守，出宿簡書違。憑師訪陳迹，贖作攝山詩。景定建康志。

大慈寺 在天台縣寺門巽隅，號佛隴，爲智顛法師宴坐處。

佛隴山沈茂草平，林間猶作誦經聲。一心三觀休分別，秋靜山高海月明。天台山志。

先照寺

一徑涼飈響萬松，青霞紫霧祕靈蹤。寒生冽洞前溪雨，聲到諸天午夜鐘。山頂月高猶駕鶴，潭陰雲起舊降龍。出塵境界無多遠，已上金庭第七重。四朝詩。

余靖

靖字安道，韶州曲江人。天聖二年進士，累除右正言，知制誥，出知古州，經略廣西南路，安撫使。儂

柴車走縣封，窮途秋耿耿。急雨帶溪聲，殘燈背窗影。驅馳下士身，淒涼旅人景。山寒夢不成，愁多知夜永。
留題澄虛亭

湖光湛寒碧，簾影拂莓苔。魚戲應同樂，鷗閑亦自來。雨餘輕靄合，竹外雜花開。久欲留詩去，慚無綺靡才。
晚至松門僧舍懷寄李太祝

日暮倦行役，解鞍初息肩。霧昏臨水寺，風勁欲霜天。蓼浦初聞雁，人家半在船。思君已惆悵，黃葉更翩翩。
馬當呼鷗不至偶成呈同時諸官

昔年曾汎馬當灣，團飯喚鷗篙檝閒。今日江邊飛不下，應知人世足機關。

送靈谷山人

萬樹秋風一路蟬，渡頭重橫木蘭船。自慚蹙頰非奇骨，擬問清朝躍馬年。以上武漢集

曾公亮

公亮字明仲，會子。天聖二年進士。嘉祐中，拜吏部侍郎，同中書門下平章事。熙寧二年，進昭文館大學士，累封魯國公。旋以太保改仕，卒贈太師，中書令，諡宣靖。

宿甘露僧舍

枕中雲氣千峯近，牀底松聲萬壑哀。要看銀山拍天浪，開窗放入大江來。鎮江府志

黃孝先

孝先字子思。浦城人。天聖二年進士。爲宿州司理。以薦遷大理丞。知咸陽縣。終太常博士。余嘗守官咸陽縣。廨之後臨渭河。汀嶼中。連歲中有孤雁來棲於葭葦中。今歲冬深不復至矣。或在矰弋。或去而之他。皆不可知也。感而爲詩題亭壁。

天寒霜落雁來棲。歲晚川空雁不歸。江海一身多少事。清風明月我霓衣。侯鯖錄。

弔宿州妓張溫卿

人生第一莫多情。眼看仙花結不成。爲報兩京才子道。好將詩句弔溫卿。

句

恩同花上露。留得不多時。

能改齋漫錄。宿州妓張玉姐。字溫卿。色藝冠一時。沈子山爲獄掾。最所鍾愛。罷官途次南京。念之不忘。爲別銀燈一闋云。一夜隋河風勁。霜混水天如鏡。古柳長堤。寒煙不起。波上月無流影。那堪懶聽疎星外。離鴻相應。須信道。情多足病。酒未到。愁腸還醒。數疊蘭衾。餘香未減。甚時枕鴛重並。教伊須更將盟誓。後言約定。其後明道中。張子野黃子思相繼爲掾。尤賞之。偶陳師之。求古以光祿卿來掌權。酷溫卿。遂托其家。僅二年而亡。才十九歲。子思以詩弔之云云。先是子思有愛姬。宜哥。客死舟中。遺言葬堤下。冀他日過此得一見。以慰孤魂。子思從之。

作詩納棺中。其斷章云云。二人皆葬宿州之東。

日者未知裴令貴。世人爭笑禰生狂。詠懷。風簾燕引五。六子。露井榴開三四花。春明退朝錄。

孫甫

甫字之翰。湯翟人。舉進士。孫台正言。慶天章閣寺副。可比。轉運使。有集。

成都蓮司園亭詩和章質夫

小亭

蕭森玉谿南。小亭屹相向。使華雙輅車。禪境二方丈。固將物理齊。室隘志自廣。松竹周四簷。足以備幽賞。

西園

小閣連雪峯。憑闌熹幽玩。紅接海棠洲。綠對篔簹岸。有時開尊壘。波影浸几案。何須架長虹。然後沖雲漢。

成都文類

句

衰病自憐無酒趣。塵容猶賴有詩情。乞茶。歷代吟譜。

周元明

同胡武平遊南園

爛漫花時錦繡張。無端下馬繫垂楊。山亭水閣笙歌地。合與行人作醉鄉。吳郡志。

張方平

方平字安道。宋城人。舉茂才異等。為校書郎。英宗朝。累遷禮部尚書。出知鄆州。神宗即位。拜參知政事。致仕。薨。贈司空。諡文定。有樂全先生集。

冷齋夜話。張文定。慶歷中嘗為滁州。遊琅琊山藏院。俛仰久之。呼左右取梯升梁。得經函發之。得楞伽經。餘半卷未寫。忽悟前身。蓋知藏僧也。寫楞伽經未畢而化。因續書殘軸。筆蹟宛然如昔。因號二生經。後以此經授東坡為序其事。代寫此經。刻于浮。

玉山龍
遊寺

吳江道中寄王君貺侍郎

畫船浮震澤，煙水接秋空。一霎過雲雨，滿帆開岸風。酒旗蓮蕩裏，僧刹橘洲中。何似并州路，塵高馬隊雄。

蘇子瞻寄鐵藤杖

隨書初見一枝藤，入手方知鍛鍊精。遠寄只緣憐我老，閑攜常似共君行。靜軒獨倚身同瘦，小圃頻遊腳爲輕。何日歸舟上新洛，拄來河岸笑相迎。

題歌風臺

落魄劉郎作帝歸，樽前感慨大風詩。淮陰反接英彭族，更欲多求猛士爲。

題沛縣漢高祖廟

中酒疎狂不治生，中陽有土不歸耕。偶因世亂成功業，更向翁前與仲爭。以上樂全先生集。

石林詩話：安道未第時貧甚，衣食殆不給，然意氣豪邁，未嘗少貶。與劉潛、李冠、石曼卿往來山東諸郡，任氣使酒。見者皆傾下之。沛縣有漢高祖廟，并歌風臺，前後題詩甚多，無不推功頌德。獨安道詩云云，蓋自少已不凡矣。

送蘇子由監筠州酒稅

可憐萍梗飄蓬客，自歎匏瓜老病身。從此空齋挂塵榻，不知重掃待何人。

茗溪漁隱叢話：東坡言元豐三年，家弟子由謫官筠州，安道自占此詩爲別，已而滯下，安道平生未嘗出滯向人也。

王琪

琪字君玉華陽人。徙舒。舉進士。調江都主簿。歷官知制誥。加樞密直學士。

嘗舊續聞。翰林學士彭乘不調其子文學。參軍范宗翰學士責之曰。王氏之琪。珪。瑛。器。器。璠。璣。韓氏之綜。絳。纘。維。才皆經緯。非蔭而得。由學而然。細素雜記。西清詩話。言王君玉謂人曰。詩家不妨閒用俗語。尤見工夫。雪止未消者。俗謂之待伴。嘗有雪詩。待伴不禁。鴛瓦冷。羞明。常怯玉鉤斜。待伴羞明。皆俗語。而採拾入句。了無痕類。此點瓦礫爲黃金手也。

鍾山語錄。或歌王琪詩句。荆公曰。

琪詩時有奇句。然雕鐫不自在。

石林詩話。晏元獻守南都。王君玉時已館閣。授勸。公特請於朝。以爲府僉判。朝廷不得已。使帶館職從公。外官帶館職。自君玉始。賓主相得。日以賦詩飲酒爲樂。佳時勝日。未嘗輒廢也。嘗遇中秋陰晦。齋廚夙爲備。公適無命。既至。夜君玉密使人伺公。曰。已寢矣。君玉亟爲詩以入。曰。只在浮雲最深處。試憑弦管一吹開。公枕上得詩大喜。卽索衣起。逕召客。治具大合。樂至夜分。果月出。遂樂飲達旦。前輩風流固不凡。然幕府有佳客。亦自如人意也。

堯山堂外紀。王琪張亢同在晏元獻幕。張肥大。王以太牢目之。王瘦小。張以獼猴目之。一日有米糲。至八百里村。水淺。當剡載。張往督。王曰。所謂八百里駁也。張曰。未若三千年精矣。琪嘗嘲亢曰。張亢觸藩成八字。亢應聲曰。王琪望月叫三聲。

題揚州九曲池

越調誰家曲。當年亦九成。哀音已亡國。廢沼尙留名。儀鳳終沈影。鳴蛙祇沸聲。淒涼不可問。落日背蕪城。

復齋錄。晏元獻赴杭州。道過維揚。憩大明寺。瞑目徐行。使侍史誦壁間詩。戒其勿言姓名。終篇者無幾。又誦一詩云。問之乃江都尉王琪所作。召至同飲。又同步池上。時春晚。已有落花。晏云。每得句或彌年未嘗強對。且如無可奈何花落去。至今未能也。王應聲曰。何不云似曾相識。

燕歸來。晏大喜。由此薦爲館職。

茗溪漁隱叢話。昭陵諸臣傳。元

獻未知杭州。復齋所記誤也。

金陵賞心亭

千里秦淮在玉壺。江山清麗壯吳都。昔人已化遼天鶴。舊畫難尋臥雪圖。冉冉流年去京國。蕭蕭華髮老江湖。殘蟬不會登臨意。又噪西風入座隅。

湘山野錄。賞心亭。丁晉公出鎮日。重建。秦淮絕致。清在軒楹。取所寶周昉袁安臥雪圖。張于亭之屏。凡經十四守。雖極愛而不敢輒觀。偶一帥竊去。以布畫。鴟掩之。君玉復守是郡。登亭留詩云云。詩與江山相表裏。爲買畫者之蕭斧也。

題招隱寺

蒼崖何處蟠回。嘗爲隱君宅。宋戴顓善琴。隱居此山。孰謂人琴亡。松風正蕭瑟。花閑雪英舞。衛公玉蕊詩在焉。鹿去

崑泉冽。山有鹿跑泉。唐蔣防爲之銘。經聲草堂迴。天香中夜發。月落山氣深。清猿嘯亦絕。如何人外迹。輕爲世

網別。玉蕊辨證。

聞盜紅梅種遺晏同叔

館娃宮北發精神。粉瘦瓊寒露葉新。園吏無端偷折去。風城從此有雙身。

石湖梅譜。承平時。紅梅獨盛於姑蘇。晏元獻公始移植西園圃中。一日賞遊賂園吏得
一枝分接。由是都下有二本。王君玉時守吳郡。聞盜花種事。以詩遺公。當時罕得如此。

秋日白鷺亭向夕有感一作向夕風晦有作

白鷺敞西軒。檐宇窮爽塏。千峯若連環。翠色不可解。是時天宇曠。六幕無纖靄。金斗熨秋江。素練橫衣帶。乾坤清且斂。氣象朝昏改。蘆花作雪風。飛舞來滄海。九霄汀鷺起。萬里檣烏快。月上三山頭。鳥沒橫塘外。蒼茫洲渚寒。錯落星斗大。開樽屏絲竹。披襟五簫籟。余生本江湖。假蹇欣所會。清興雖自發。苦嗜亦吾累。魚龍憑夜濤。四面忽滂湃。安得然犀燈。煌煌發水怪。

清輝殿觀唐明皇山水石字歌

皇家四葉恢聖功。天臨日燭清華戎。漢條靜治洽柔教。老心稽古開神聰。有唐英主稱好文。仙毫灑落驅風雲。壯哉山水有奇字。煥乎八法存翠珉。自從棄置咸陽道。薜駁煙滋委宮草。天開神贊會休辰。甄收再作皇居寶。如何淪棄三百春。迎逢容鑒來紫宸。奎鉤粲粲光華動。羣玉森森氣象新。丹籙春妍瑞靄深。文梁藻棟結芳林。鴻翔鳳翥徑方丈。杯流泉涌蒙親臨。鰥臣榮幸從金輿。鉤婉魂驚拭目初。多慚攬筆非清藻。唯慶千齡際帝圖。

答永叔問月

斑斑疎雨寒無定。皎皎圓蟾望欲闌。應在浮雲儘深處。更憑絲竹一催看。以上宋文鑑。

絕句

香溪春老誤尋芳。只有愁雲映夕陽。今日重來已如此。何須更問海生桑。

正月初弦二月餘。小園春事已如麻。強誇力健因移石。不減公忙為種花。後村詩話。

句

疾風甚雨青春老。瘦馬疲牛綠雨深。優古堂詩話。隴鴈半驚秋似水。征人相顧月如霜。聞角。西清詩話。露槿。

東西照風荷向背愁。

涼吹易成團扇恨。夕陽偏結小窗愁。後村詩話。

余良肱

良肱字康臣。洪州分寧人。天聖四年進士。調荆南司理參軍。歷三司判官。光祿卿。知宣州。提舉玉

隆觀。日谿按。汴京遺蹟志。載宋登科記。天聖三年四年停貢舉。而余良肱史作四年進士。未知孰是。

和蔣穎叔涇溪

畫舸夷猶紫翠閒。暮雲如掃月如環。三山六刺須臾過。恰似嚴陵七里灘。寧國府志。

韓琦

琦字稭圭。安陽人。天聖中進士第二。歷同中書門下平章事。集賢殿大學士。累封魏國公。薨贈尚

書令。諡忠獻。徽宗論定策勳。贈魏郡王。有安陽集。

迂叟詩話。韓魏公罷相守北京。新進多凌侮之。魏公鬱鬱不得志。

嘗為詩云。風定曉枝蝴蝶鬧。雨勻春圃桔槔閑。時人稱其微婉。

皇朝類苑韓魏公知定州因作閣古堂自爲記刻于石後人又畫魏公像于堂上宋子京知定州作樂歌十闕其一曰聽說中山好韓家閣古堂畫圖眞宰相刻石好文章魏公聞之不喜

和遂卿學士雪霽登祕閣

曉來延閣步層梯。春色周圍一望低。殘雪半留珠殿冷。非煙長護綺窗西。幽情自逐歸鴻斷。芳意還應遠樹迷。金匱有書猶未見。祕封香篆鎖芝泥。

九日水閣

池館墮摧古樹荒。此延嘉客會重陽。雖慚老圃秋容淡。且看黃花晚節香。酒味已醇新過熱。蟹螯先實不須霜。年來飲興衰難強。漫有高吟力尙狂。

皇朝類苑魏公在北門重陽宴諸曹于後園有詩一聯云不羞老圃秋容淡且看黃花晚節香公居常謂保初節易保晚節難故晚節事尤著所立特完又作喜雪詩一聯云危石蓋深鹽虎陷老枝擎重玉龍寒人謂公身雖在外自任以天下之重如此

和御製賞花釣魚詩

花簇香亭萬朶開。瑤輿高自九天來。輕陰閣雨留天仗。寒色凝春送壽杯。仙吹徹雲終縹緲。恩魚逢餌幾徘徊。曾參二十年前會。今備台司得再陪。

李壁王荆文公詩注公既進詩或言於上曰韓琦譏陛下上愕然問之對曰琦二十年而得一再侍宴此正譏陛下飲宴無度也上大笑

和春卿學士柳枝詞

章臺風曉起新眠。寒食輕陰未雨天。無限青絲拂遊騎。一生芳意負金鞭。以上安陽集。

早夏

脫幘吏休後。凭軒風快餘。瀑泉增瀨急。新葉補林疎。
暑初天未熱。觀閣進新涼。果熟愁枝重。荷生覺渚香。
十里溪源注北塘。貯成寬碧澹泱泱。新蒲弱荇參差綠。去鷺來鳧斷續行。一攬輕波搖鷁舸。滿簷斜日曬魚梁。使君思拙無清夢。高柳陰成草自長。

吳禮部詩話。韓魏公手書早夏三詩。備蕭散閑適之趣。安陽集所無。

包拯

拯字希仁。廬州合肥人。天聖五年進士。歷官龍圖閣直學士。御史中丞。知開封府。權三司使。樞密副使。遷禮部侍郎。辭不受。卒諡孝肅。

書端州郡齋壁

清心爲治本。直道是身謀。秀幹終成棟。精鋼不作鉤。倉充鼠雀喜。草盡兔狐愁。史冊有遺訓。毋貽來者羞。
廬州府志。

吳奎

奎字長文。濰州北海人。第進士。神宗朝。歷官樞密副使。參知政事。以資政殿大學士出知青州。卒。

贈兵部尙書諡文肅

雲門留運上人房

雲門入雲深。樹密山轉幽。溪亭脩竹裏。激激玉泉流。仁智所遐想。古今爲勝遊。我乘休沐至。窮覽浩難周。金碧樓殿午。寒香松桂秋。清風連高興。飄越不可收。禪師索題詩。投筆事冥搜。欲速馳思遠。頃刻歷九州。象外有眞物。惝恍難爲求。徒勞陳熟言。羞澀爲爾留。

汎五雲溪由鑑湖歸

樵風漾歸舟。飄然一葉輕。曲岸超忽遠。四山回抱明。幽禽淡容與。荷芰相低傾。田野多收穫。村叟時逢迎。歡言無物役。得我遊覽情。日腳暮雲起。湖面寒煙生。秋光湛空碧。彷彿見重城。候吏津亭外。稍聞笳鼓聲。
以上雲門集

句

奚車一牛駕。朝馬兩人騎。使北。詩話總龜。

趙抃

抃字閱道。衢州西安人。進士及第。歷官龍圖閣直學士。知成都。神宗朝。擢參知政事。以資政殿大學士。出知外郡。加太子少保。致政。卒。贈太子少師。諡清獻。有集。

石林詩話。趙清獻以清德服一世。平生蓄雷氏琴一張。鶴與白龜各一。所向與之俱。始除帥成都。蜀風素侈。公單車就道。以琴鶴龜自隨。蜀人安其政治。聲籍甚。元豐間。既罷政事。守越。再移蜀。公時老矣。過泗州。渡淮前。已放鶴。至是復以龜投淮中。乃入

見先帝問云。聞卿前以匹馬入蜀。所攜獨琴鶴。廉者固如是乎。公頓首謝。故其詩有馬尋舊路。知歸去。龜送長淮不再來。自紀其實也。

暖風

薄袂歌雲散。輕雲舞袖低。簾疎蕩樓閣。塵暗逐輪蹄。絮亂垂楊道。香流種藥畦。春窗惱春思。一枕杜鵑啼。

芳草

翠密馴文雉。叢深隱畫輪。離披金谷曉。寂寞茂陵春。古渡班荆客。長隄走馬人。芊芊似袍綠。一雨一番新。

杜鵑

響亂書窗外。人驚夢枕中。江城啼曉月。澤國愬春風。柳道盤滄綠。桃園蹀躑紅。年年來此地。留恨任西東。

寒食郊園卽事

城郭青煙散。郊園麗日長。鬪雞紅錦翅。遊騎紫絲韁。有蝶俱含粉。無人不惜芳。儘拚花下飲。歸去醉成鄉。

和何節判觀水

澄江抵練長。極目路蒼茫。煙芷差差綠。風荷柄柄香。西流終古恨。南浦鎮時忙。擬待傳辭意。離人在楚鄉。

題戲綵堂

我憩堂中樂可知。優游踰月竟忘歸。老萊不及吾兒少。且著朱衣勝綵衣。

以上趙清獻公集。

蓉塘詩話。宋趙帆倅溫州時。其父清獻公致仕。家居。帆以就養。作堂名戲綵。公題詩堂中云。

寄張山人時再領成都

不同參政初時入謂呂餘慶也學尙書兩次來謂張乖崖到日先生應笑我白頭猶自走塵埃

灑水燕談治平初龍圖閣直學士趙公并鎮成都。有張山人者數至李道士舍。一日語李曰。龍圖公促治裝。行當入覲。且參大政矣。趙聞而異之。未幾果應召命。乃參政柄。及鎮青社。熙寧五年。張遺書云。當來相見。公大喜。久之無驗。至秋。公奉詔再領成都。方悟曰。山人言來。乃吾當往也。將行先寄張云。

王陶

陶字樂道。京兆萬年人。天聖五年進士。神宗朝。歷簽書樞密。宣撫陝西。還爲侍讀學士。知蔡州。卒。贈吏部尙書。諡文恪。

有竇復者世居鎮戎能道邊事

君不見。鎮戎德順弓箭手。耕種官田自防守。相團置堡禦蕃軍。下視賊庭殊不有。殺羊取骨然艾炙。試卜賊兵知入寇。都校招呼入堡居。堡外重圍百里餘。牆低城小不難破。賊箭如棚城上過。堡中不及數十人。且鬪且罵且欣欣。登陴斫門謂平取。應弦死傷已無數。窗閒走箭射酋豪。一箭已聞哭聲舉。爭將錦囊裹賊屍。鳴金收衆唯恐遲。不唯城堡依然固。吾衆不傷毫與釐。自從干戈動西鄙。覆軍殺將曾無恥。朝廷未省遺邊功。何事此勳不能紀。安得天兵百萬衆。盡如此輩堅且勇。宋文鑑

龔宗元

宗元、字會之，崑山人。天聖五年進士。歷都官員外郎。有武正居士遺藁。

吳郡志：中隱堂在大酒巷。都官員外郎分司南京龔宗元所居。取樂天詩：大隱住朝市，小隱入工樊。不如作中隱。隱在留司間。乃作中隱堂。與屯田員外郎程適、太子中允陳之奇遊。從極文酒之樂。皆書德頌。儒挂冠而歸者。吳人謂之三老。

六月吟

曦輪獵野枯杉松。火焚泰華雲如峯。天地爐中赤煙起。江湖煦沫烹魚龍。生癯渴獸脣焦斷。峻翻無聲落晴漢。飢民逃生不逃熱。血迸背皮流若汗。玉宇清宮徹羅綺。渴嚼冰壺森貝齒。炎風隔斷真珠簾。池口金龍吐寒水。象牀珍簾凝流波。瓊樓待月微酣歌。王孫晝夜縱娛樂。不知苦熱還如何。

夜宴作

兔魄侵塔夜三刻。蜀錦堆香花院窄。風動簾旌玳瑁寒。露垂蟲網珍珠白。美人正席羅弦管。綺幄雲屏爐麝煖。只恐金壺漏水空。不怕鸞觴琥珀滿。勸君莫負秉燭遊。曾見古人傷晝短。

贈處士林逋

高蹈遺塵蛻。含華傲素園。璜溪頰下釣。蕙帳不驚猿。養浩時清肅。忘機只寓言。幾回生蜨翅。明月在西軒。

送陳君子之四明

短亭祖帳接平川。柳拂回波繫畫船。漸向落暉分繡袖。忍聽離曲怨鷗弦。雲連稽嶺應懷古。路近光源好訪仙。那更憑高望天際。江堤煙重草綿綿。

星游耿耿寒煙浮。白龍銜月臨霜樓。誰家砧弄細腰杵。一聲擣破江城秋。雙桐老翠墮金井。高低冷逐西風緊。靜如秋籟暗穿雲。天末驚鴻斷斜影。哀音散落愁人耳。何處離情先喚起。長信宮中葉滿塔。洞庭湖上波平水。萬里征夫眠未成。搖風擣月何丁丁。楚關秦嶺有歸客。一枕夜長無限情。以上中吳紀聞。

王 濬

濬字道源。黟縣人。天聖五年進士。爲句容令。歷官至殿中丞。後在池州。一日起。盥沐索筆爲詩。端坐而逝。衆謂尸解。有洛陽貴尙錄。

古今詩話。王濬十歲謁陳州太守。令對弱

柳絲絲搓綠線。對云。春雲片片揭新綿。

翰府名談。王寺丞。失意徧遊諸郡。至山陽郡。守屢召之夜。飲翌日作詩曰。醜卻天下美人面。正得世間男子心。郡守它日再爲文字之飲。以謝之。又至五羊。贈太守詩云。塔上腥臊堆蜚虵。口中濃血吐檳榔。又云。風腥變市合。日上瘴雲紅。守見之不憚。

淵聖皇帝要錄。靖康中。金人圍京城。朝廷急於命將。有郭京者。自云。用六甲法。可以擒敵。朝廷錫以金帛。使募兵。有賣線兒。京授以將命。又有劉無忌。乃賣藥道人。常倒植泥中乞錢。亦作統制官。蓋取王濬詩有郭京楊式劉無忌。皆在東南臥白雲之讖。郭京出前軍。爲金兵一掃而空城遂陷。

寺中聞射因成十歲時作。

殿宇時聞燕雀鳴。虛庭盡日少人行。孤吟獨坐情何限。時喜風傳中鵠聲。古今詩話。

至儀真太守召看牡丹

何事化工情愈重。偏教此卉太妖妍。王孫欲種無餘地。顏巷安貧欠買錢。曉檻競開香世界。夜闌誰結醉因緣。須知村落桑麻處。田叟飢耕婦不眠。

贈五羊太守

碧睛蠻婢頭蒙布。黑面胡兒耳帶環。幾處樓臺皆枕水。四周城郭半圍山。以上翰府名談。

秩滿寄茅山道友

鳴鳳相邀覽德輝。松蘿從此與心違。孤峯萬仞月正照。古屋數間人未歸。欲助唐虞開有道。深慚巢許勸忘機。明朝又引輕帆去。紫朮年年空自肥。新安志。

詠錢塘

南屏高瞰府城西。畫舸千艘共醉迷。四柱臺邊煙是幕。百花橋畔葑連隄。龍檀咽路迎舉隼。綺繡登山汗粉題。幕色沈沈郭郭閉。寶燈輝映梵天低。咸淳臨安志。

吳育

育字春卿。建安人。天聖五年進士。累官樞密副使。參知政事。尋以資政殿大學士。尚書左丞。知河中府。徙河南。卒。贈吏部尚書。諡正肅。有集。

題峴山石幢

羊公千載得清吟。芳跡雖遙契昔心。更與峴山爲故事。凜然風格照來今。襄陽府志。

王含章

含章處州守

題仙都山

三年爲郡仰靈蹤。咫尺無因到此中。長是徘徊看圖畫。果然峭峯在虛空。雲歸湖頂塵雖染。鶴立松梢路莫通。春過碧溪人玩少。古壇牢落雨濛濛。仙都山志。

孫抃

抃字夢得。眉山人。天聖中進士。累遷知制誥。翰林學士承旨。拜參知政事。諡文懿。有集。

郡齋讀書志。孫抃六世祖長孺喜。

藏書貯以樓。蜀人號書樓孫家。

端午日皇后閣帖子詞

蟠桃映砌晨烟薄。紫桂凌霄晝露晞。窈窕漢宮三十六。齊將綵縷祝坤闈。

萬功寶笈千齡藥。又賜金盤五色瓜。從此仙源昇福遠。綿綿不獨頌周家。古今歲時雜詠。

彭應求

應求廬陵人。渠陽推官。思永之父。

宿崇聖院

公程無暇日。暫得宿清幽。始覺空門客。不生浮世愁。溫泉喧古洞。晚磬度危樓。徹曉都忘寐。心疑在沃洲。

宋詩紀事 卷十一
濂溪先生集附。

宋詩紀事卷十二

錢唐 厲鶚 緝

祁門 馬曰璐 同緝

阮逸

逸字天隱建陽人安定先生胡瑗之門人天聖五年進士爲鎮江軍節度推官皇祐中與瑗同典樂事遷尙書屯田員外郎

隱居詩話至和中阮逸爲王宮記室王能詩與逸唱和有句曰易立太山石難枯上林柳有言其事者朝廷方治之會逸坐他事因廢棄

題竹閣在嚴州能仁寺之南

僧閣倚寒竹幽襟聊一開清風曾未足明月可重來曉意烟垂草秋姿露滴苔佳賓何以竚雲瑟與霞杯

嚴州府志

張維

維烏程人子野之父仁宗朝衛尉寺丞贈尙書刑部侍郎子野取父平生所自愛詩寫之縑素號十詠圖

聞砧

遙野空林砧杵聲。淺沙棲雁自相鳴。西風送響暝色靜。久客感秋愁思生。何處征人移塞帳。卽時新月落江城。不知今夜擣衣曲。欲寫秋閨多少情。

庭鶴

戢翼盤桓傍小庭。不無清夜夢烟汀。靜翹月色一團素。閑啄苔錢數點青。終日稻梁聊自足。滿前雞鶩漫相形。已隨秋意歸詩筆。更與幽棲上畫屏。

玉蝴蝶花

雪朶中間蓓蕾齊。驟開尤覺繡工遲。品高多說瓊花似。曲妙誰將玉笛吹。散舞不休零晚樹。團飛無定撼風枝。漆園如有須爲夢。若在藍田種更宜。

孤帆

江心雲破處。遙見去帆孤。浪闊疑升漢。風高若泛湖。依微過遠嶼。彷彿落平蕪。莫問乘舟客。利名同一途。

太守馬大卿會六老于南園

賢侯美化行南國。華髮欣欣奉宴娛。政績已聞同水薤。恩輝遂喜及桑榆。休言身外榮名好。但恐人間此會無。他日定知傳好事。丹青寧羨洛中圖。

歸燕

社燕秋歸何處鄉。羣雛齊老稻青黃。猶能時暫棲庭樹。漸學稀疎度苑牆。已任風庭下簾幕。卻隨烟艇過瀟湘。前春認得安巢所。應免差池揀杏梁。

宿後陳莊

臘凍初開茗水清。烟村遠郭漫吟行。燕頭斜日鳧鷖隊。枕上西風鼓角聲。一棹寒燈隨夜釣。滿犁膏雨趁春耕。誰言五福仍須富。九十年餘樂太平。

送丁遜秀才赴舉

鵬去天池鳳翼隨。風雲高處約先飛。青袍賜宴出關近。帶取瓊林春色歸。

貧女

蒿簪掠髮布裁衣。水鑑雖明亦懶窺。數畝秋禾滿家食。一機官帛幾梭絲。物爲貴寶天應與。花有秋香春不知。多少年來豪族女。總教時樣畫蛾眉。

句 其五宿清江小舍破損僅存一句

菰葉青青綠荇齊

齊東野語。孫莘老十詠圖序云。張維吳興人。少年學書。貧不能卒業。去而躬耕以爲養。善教其子。至于有成。平居好詩。以吟詠自娛。浮遊閭里。上下于溪湖山谷之間。遇物發興。率爾成章。不事雕琢之巧。采繪之華。而雅意自得。徜徉閑肆。往往與異時處士能詩者爲輩。公不出仕。而以子封至四品。行年九十有一。公卒十八年。公子尙書都官郎中先亦致仕家居。取公生平所自愛詩十首寫之縑素。號十詠圖。傳示子孫。

唐詢

詢字彥猷。錢唐人。天聖中。賜進士及第。除工部員外郎。擢起居注。知制誥。出知杭蘇青三州。拜翰

林學士卒贈禮部侍郎有集

皇宋書錄唐彥猷弟詔彥範俱擅一時才雅之譽彥猷知書好古彥範文章氣格高簡不屈竦秀比六朝人物尤精翰墨遺一小札亦必華茂妙管

爲杭州日送客舟中

山雨霏微不滿空。畫船來往疾輕鴻。誰知獨臥珠簾裏。一榻無塵四面風。咸淳臨安志

顧亭林

平林標大道。曾是野王居。舊里風烟變。荒原草樹疎。湖波空上下。里閭已丘墟。往事將誰語。淒涼六代餘。

柘湖

世歷亡秦遠。湖連大海濱。柘山標觀望。玉女見威神。渺渺旁無地。滔滔孰問津。何年化魚鼈。髣髴歷陽人。以上松江府志

王拱辰

拱辰字君貺。咸平人。天聖八年進士第一。元名拱壽。仁宗賜今名。歷官翰林學士。武安軍節度使。哲宗立。加檢校太師。卒贈開府儀同三司。諡懿恪。

耆英會 年七十一

西都山水天下奇。神嵩景室環清伊。自注。上古太室山爲景室山。甫申開氣秀不絕。生賢會聖昌明時。衣冠占數盛文雅。台符鄉月光離離。魏京雄奧壓幽朔。遊宮御府嚴天威。膏田千里翳桑柘。犀甲萬旅馴熊羆。公

當緩帶名三鎮。懸赤纒。軫承保。簾追推契。遇最深。舊加復。雍孟交。旌麾仁。皇一莊。龍虎榜。桂桂堂。先後攀高枝。宦遊出處五十載。鸞臺驥路俱騰夷。三公極位固遼隔。五年以長猶肩隨。公今復主鳳門鑰。僕亦再撫銅臺圻。二京相望阻河廣。三徑不克陪遊嬉。忽聞幹步踵門至。投我十二著英詩。整冠肅貌諷章句。若坐寶肆羅珠璣。爲言自傅有高躅。九君結社真可師。欲令千載著風迹。亟就僧館圖神姿。詞宗端殿序篇目。滂灑大筆何淋漓。眷言履道靡克誦。菟裘近邑將營歸。取云繪素得精筆。願列霜壁如唐規。退居舊相國元老。十年還政灑之涯。康寧富貴備五福。靈寶盛氣如虹霓。昔年大對繼晁董。登科賜第同一期。自注皆天聖八年。紫垣步武既通接。金沙里閤還鄰比。探禪論道劇訓對。摩軋太古窮天機。二賢勳業冠朝省。爵齒官學誰依稀。今將圖畫表來世。詎可下客聯纓綉。既蒙月品定人物。不敢循避違風期。況承開閣厚賓客。富有景物佳園池。銅駝坊西福善宅。修竹萬箇籠清漪。天光臺高未百尺。下眺林嶺如屏帷。花王千品盡殊勝。風光繡畫三春暉。六相街中潞公第。碧瓦萬木煙參差。左隅廟室本經禮。右閣宸翰尊星奎。娑婆青鳳舞松柏。煥爛素錦薰醪醑。石渠飛溜漱寒玉。晝夜竽瑟鳴塔墀。伊予陋宇治窮僻。姑喜地廣爲環溪。樓名多景可曠望。臺號風月延清暉。四時花蘂不外假。拏舟傲幘聊嬉怡。懷歸撫事若飢渴。恨無羽翼西南飛。人生交舊貴倫輩。情親意接心相知。豈無晚秀負才蘊。高談大笑拘禮儀。洛中故事名義燕。二毛第一年相推。灑冠登仕荷天寵。尊君報國當百爲。既嗟大耋盍知止。納祿謝事皆所宜。顧方北道倚煩劇。未許解紱披荷衣。長篇不令負花約。自注公貽莫負花前約之句。爲指風什歌式微。如羹甘露爽心骨。似柄玉塵親顏眉。蘭叢雖未長羅宅。菊英似亦思陶籬。子山已著小園賦。彥倫猶媿鍾山移。聊據短引謝招隱。肯使猿

鶴常驚啼司馬光洛中耆英會詩

史院席上奉和首吳相公原韻

累聖千春統編年四紀餘官歸柱史筆經約魯麟書班馬才長矣仁英道偉歟恩招宴東觀醜酒荷盈車
揮塵後錄

挽老蘇先生

氣得岷峨秀才推賈馬優未承宣室問空有茂陵求玩易窮三聖論書正九疇欲知欲向學二子繼弓裘
蘇集附錄

歐陽脩

脩字永叔廬陵人天聖八年省元中進士甲科累擢知制誥翰林學士歷樞密副使參知政事神宗朝遷兵部尚書以太子少師致仕卒贈太子太師諡文忠晚號六一居士有六一居士集

孔平仲談苑慶歷中西師未解晏元獻爲樞密使大雪置酒西園歐陽永叔賦詩云須憐鐵甲冷徹骨四十餘萬屯邊兵晏曰昔韓愈亦能作言語赴裴度會但云園林窮勝事鍾鼓樂清時不曾如此合闌

石林詩話歐公矯崑體專以氣格爲主

詩林廣記歐陽永叔詩如春服既成春酒既醜登山臨水竟日忘歸

雪浪齋日記。或疑六一居士詩。以爲未盡妙。以質于子和。子和云。六一詩只欲牛。易耳。西風酒旗市。細雨菊花天。豈不佳。晚煙寒橘柚。秋色老梧桐。豈不似少陵。

優古堂詩話。韓子蒼言。歐陽文忠寄荆公詩云。翰林風月三千首。吏部文章二百年。吏部蓋謂北史謝朓。于宋明帝時爲尙書。吏部郎長。五言詩。沈約嘗云。二百年來無此作也。文忠之意直使謝朓奉。而荆公答之曰。他日若能窺孟子。終身安敢望韓公。則荆公之意。竟指

吏部爲退之矣。

放陶孫詩評。歐公如四

瑚八璣。止可施之宗廟。

能改齋漫錄。歐陽文忠公詩云。拂面蜘蛛占喜事。入簾蝴蝶報佳人。自注云。李賀詩。東家蝴蝶西家飛。白駒少年今日歸。蓋用李淳風占怪書云。蛺蝶忽入人宅舍。及帳幕內者。主行人即返。又云。生貴子吉。

廬山高贈同年劉凝之歸南康

廬山高哉幾千仞。兮。根盤幾百里。巖然屹立乎長江。長江西來走其下。是爲揚瀾左蠡兮。洪濤巨浪。日夕相春撞。雲消風止水鏡淨。泊舟登岸而遠望兮。上摩雲霄之晻靄。下壓后土之鴻龐。試往造乎其間兮。攀緣石磴窺空罅。千巖萬壑響松檜。懸崖巨石飛流淙。水聲聒聒亂人語。六月飛雪灑石缸。仙翁釋子亦往往而逢兮。吾嘗惡其學幻而言咙。但見丹霞翠壁遠近映樓閣。晨鍾暮鼓杳靄羅幡幢。幽花野草不知其名兮。風吹露溼香澗谷。時有白鶴飛來。雙幽尋遠兮不可極。便欲絕世遺紛瘡。羨君買田築室老。其下插

秧盈疇兮有酒盈缸。欲令浮嵐暝翠千萬狀。坐臥常對乎軒窗。君懷磊砢有至寶。世俗不辨珉與玃。策名爲吏二十載。青山白首困一邦。寵榮聲利不可以苟屈兮。自非青雲白石有深趣。其氣兀硜何由降。丈夫壯節似君少。嗟我欲說安得巨筆如長杠。

王直方詩話。郭功父少時喜誦文忠公詩。一日過梅聖俞。曰。近得永叔書。方作廬山高詩。送劉同年。自以爲得意。恨未見此詩。功父爲誦之。聖俞擊節歎賞。曰。使吾更作詩三十年。亦不能道其中一句。功父再誦。不覺心醉。遂置酒。又再誦。酒數行。凡誦十數徧。不交一談而罷。梅聖俞贈郭功父詩。其略曰。一誦廬山高。萬景不得藏。設令古畫師。極意未能詳。

明妃曲和王介甫作

胡人以鞍馬爲家。射獵爲俗。泉甘草美無常處。鳥驚獸駭爭馳逐。誰將漢女嫁胡兒。風沙無情面如玉。身行不遇中國人。馬上自作思歸曲。推手爲琵卻手琶。胡人共聽亦咨嗟。玉顏流落死天涯。琵琶卻傳來漢家。漢家爭按新聲譜。遺恨已深聲更苦。纖纖女手生洞房。學得琵琶不下堂。不識黃雲出塞路。豈知此聲能斷腸。

漢宮有佳人。天子初未識。一朝隨漢使。遠嫁單于國。絕色天下無。一失難再得。雖能殺畫工。于事竟何益。耳目所及尙如此。萬里安能制夷狄。漢計誠已拙。女色難自誇。明妃去時淚灑向枝上花。狂風日莫起。飄泊落誰家。紅顏勝人多薄命。莫怨春風當自嗟。

石林詩話。前輩詩文各有平日得意。不過數篇。然他人未必能盡知也。毘陵正素處士張子厚善書。余嘗于其家見歐陽公子。柴以烏絲闌絹一軸。求子厚書文忠公明妃曲兩篇。廬山高一篇。略云。先公平平生未嘗矜大所爲文。一爲被酒語。柴曰。吾詩廬

山高令人莫能爲，唯李太白能之，明楚甫後篇太白不能爲，唯杜子美能之，至于前篇則子美亦不能爲，唯吾能之也，因欲別錄此三篇藏之，以誌公意，余在汝陰，見棗間之亦然，今閱公詩者，蓋未嘗獨異此三篇也。

禮部貢院閱進士試

紫案焚香暖吹輕，廣庭清曉席羣英。無譁戰士銜枚勇，下筆春蠶食葉聲。鄉里獻賢先德行，朝廷列爵待公卿。自慙衰病心神耗，賴有羣公鑑識精。

石林詩話：至和嘉祐間，場屋舉子爲文尙奇澀，讀或不成句。歐公力欲革其弊，既知貢舉，凡文涉雕刻者皆黜之。時范景仁、王禹玉、梅公儀、韓子華同事，而梅聖俞爲參詳官，未引試前，唱酬詩極多。歐公有無譁戰士銜枚勇，下筆春蠶食葉聲。聖俞有萬蟻戰酣春晝永，五星明處夜堂深，亦爲諸公所稱。及放榜，平時有聲如劉暉輩，皆不預選。士論頗洶洶，未幾詩傳，遂闕然以爲主司唯唱酬不暇詳考，且言以五星自比，而待我輩爲蠶蟻，因造爲醜語，自是禮闈不復作詩。終元豐末幾三十年，元祐初雖稍稍爲之，要不如前日之盛。然是榜得蘇子瞻爲第一，二人子由與曾子固皆在選中，亦不可謂不得人矣。

夢中作

夜涼吹笛千山月，路暗迷人百種花。碁罷不知人換世，酒闌無奈客思家。

東坡題跋：南嶽李尚老好睡，衆人飽食下碁，尚老輒就枕，數局一展轉，云：我始一局，君幾局矣。東坡曰：李尚老常用四腳碁盤，只著一色黑子，昔與邊韶敵手，今被陳搏爭先著，時似有輸贏著了，並無一物。歐陽公夢中作詩云：殆是謂也。

批謝判官紙尾

淺深紅白宜相閒，先後仍須次第栽。我欲四時攜酒去，莫教一日不花開。

西清詩話。歐公守滁陽。築醒心醉翁兩亭于瑯琊幽谷。且命蕃客謝某者雜植花卉。其間謝以狀聞名品。公卽題紙尾云云。其清放如此。

唐崇徽公主手痕

故鄉飛鳥尙啁啾。何況悲笳出塞愁。青冢埋魂知不返。翠崖遺迹爲誰留。玉顏自古爲身累。肉食何曾與國謀。行路至今空歎息。巖花野草自春秋。

朱文公語錄。玉顏自古爲身累。肉食何人與國謀。以詩言之。第一等詩。以議論言之。第一等議論也。

早朝感事

疎星牢落曉光微。殘月蒼龍闕角西。玉勒爭門隨仗入。牙牌當殿報班齊。羽儀雖接鴛兼鷺。野性終存鹿與麋。笑報汝陰常處士。十年騎馬聽朝雞。

寄許道人昌齡

石唐仙室紫雲深。潁陽真人此算心。真人已去升寥廓。歲歲岳花自開落。我昔曾爲洛陽客。偶向岳前坐磐石。四字丹書萬仞崖。神清之洞鎖樓臺。雲深路絕無人到。鸞鶴今應待我來。以上居士集

西清詩話。潁陽石唐山。絕頂有石室。邢和璞算心處。治平中。許昌齡早得仙術。杖策來居焉。歐陽文忠公守亳社。聞之。要致郡齋。與語豁然有悟。一日公問道。許告以公屋宅已壞。難復語此。但明了前境。猶庶幾耳。且道昔遊嵩山。日暮于絕壁上見蒼籙。

成文云。神清之洞。語祕不傳。後公歸汝陰。臨薨以詩寄之云云。

寄韓子華

人事從來無處定，世塗多故踐言難。誰知潁水閑居士，十頃西湖一釣竿。

墨莊漫錄：歐陽公與韓子華、吳長文、王禹玉同直玉堂，嘗約五十八歲即致仕。子華書于柱上，後過限七年方踐前志，作詩寄子華曰：俗諺云也，實弄得過裏。

劉原父再昏以二絕戲之

平生志業有誰先，落筆文章海內傳。明日都城應紙貴，開簾卻扇見新篇。

仙家千載一何長，浮世空驚日月忙。洞裏桃花莫相笑，劉郎今是老劉郎。西清詩話。

顏太初

太初字醇之，徐州人。顏子四十七代孫，第進士，官國子監直講，出爲臨晉簿，掌南京學，卒有彙繹先生集。

蘇東坡序略云：昔吾先君適京師，與士大夫遊，歸語軾曰：自今以往，文章其日工而道將散矣。士慕遠而忽近，貴華而賤實，吾已見其兆矣。以魯人彙繹先生之詩文十餘篇示軾曰：小子識之。後十餘年，天下無復爲斯文者也。

許希并序

鍼工許希，下蔡人，住梁門西市三十年。及天聖中，皇躬違豫，有內戚達其姓名，上召見，三進鍼而疾平，面授尙藥奉御，其賜予不可勝紀。謝恩畢，西向而拜，上詢其故，奏曰：臣拜本師扁鵲也。上惜其用心，不忘本，給錢五十萬爲立祠，封曰靈應侯。或曰：人生乎世，慎乎習，希失其習者也。使希不習醫而習儒，其

遇主之日。不忘先師明矣。若然則讀書爲儒。乘時取富貴。高冠長劍。昂昂廟堂之上。自負自得。不知素王之方者。許希之罪人也。因爲詩云。

京城名利塗。車馬相奔馳。其間取富貴。往往輸巫醫。前後十數輩。身沒名已墜。獨有許希者。蘊蓄何瑰奇。始自下蔡來。所處尤喧卑。西市三十年。汨汨無人知。一朝仗至藝。驟登文石墀。三鍼愈上疾。神速不移時。酬以六尙官。著籍通端闈。旌以三品服。佩紫垂金龜。于時稱謝畢。西向復陳儀。當廳驚且問。歷歷宣其辭。臣傳扁鵲術。遇主今得施。特此一展謝。臣心不自私。主上惜其意。繁賞爲嘘唏。仍給水衡錢。國西命立祠。復加靈應號。金額照華棧。自此輦轂下。求禱何祁祁。我過慶成坊。見之心且悲。秦醫術雖妙。五藏及四肢。所習得其人。千齡祀不虧。魯聖術至大。帝道與民彝。所習非其人。一朝反相持。小吏師荀況。竊爲辨說資。作相勸焚書。詐云愚蚩蚩。後之爲儒者。其心皆李斯。昔在布衣日。動守先王規。朝談十二經。夕誦三百詩。依憑稽古力。榮進無他歧。及居廟堂上。長劍冠義巍。自謂天所賦。焉知有宣尼。宣尼斷襲封。十經寒暑移。他姓爲邑官。鄉老皆驚疑。上章寢不報。九重遭面欺。諫官不舉失。御史不言非。盡爲許希笑。得路忘先師。

宋史文苑傳。天聖中文宣公孔聖祐卒。無子。除襲封。且十年。是時有醫許希。以鍼愈仁宗疾。拜賜已。西向拜扁鵲曰。不敢忘師也。帝爲封扁鵲神應侯。立祠城西。太初作許希詩。指聖祐事。以諷在位。又致書參政蔡齊。齊爲言于上。遂以聖祐弟襲封。

東州逸黨

天之有常度。躔次絕乖離。地之有常理。沈潛無變虧。人之有常道。高下遵軌儀。三才各定位。萬古永不移。二儀設有變。修德可以祈。人道或反常。其亂何由支。昔在典午朝。國祚向陵夷。日向中夜出。赫赫來東陲。

地向太極裂。中有蒼鵝飛。高厚災且異。人妖亦繁滋。始有竹林民。怪誕名不羈。次有夷甫輩。高談慕無爲。沈湎多越禮。阮籍兼輔之。虛名能飾詐。光逸與王尼。何曾有先見。不能救其衰。張華徒竭力。無以扶其危。至今西晉書。讀之堪涕洟。爾來歷千年。炎宋運重熙。東州有逸黨。尊大自相推。號曰方外交。蕩然絕四維。六籍被詆訶。三皇遭毀訾。阮儒愚黔首。快哉秦李斯。與世立憲度。迂哉魯先師。流宕終忘反。惡聞有民彝。或爲童牧飲。垂髮以相嬉。或作概量歌。無非市井辭。或作雍露唱。發聲令人悲。或稱重氣義。金帛不爲賫。或曰外形骸。頂踵了無私。塵聚復復雜。何者爲尊卑。遙聞風波民。未見如調飢。偶逢紳帶士。相對如拘糜。不知二紀來。此風肇自誰。都緣極顯地。多用寧馨兒。斯人之一唱。翕然天下隨。斯人之一趨。靡然天下馳。鄉老爲品狀。不以逸爲嗤。宗伯主計偕。不以逸爲非。私庭訓子弟。多以逸爲宜。公朝論人物。翻以逸爲奇。家國盡爲逸。禮法從何施。我常病其事。中夜起思惟。平地三尺限。空車登無歧。重載歷百仞。所來因陵遲。萬一染成俗。雖悔何由追。衆人皆若夢。焉能分其糜。衆人皆若醉。不知啜其醪。天下皆病痿。俾誰就魯醫。天下皆病狂。何暇灸其眉。幸有名教黨。可與決雄雌。所嗟九品賤。不得立文墀。賈誼惟慟哭。梁鴻空五噫。終削南山竹。冒死指其疵。願乘九廟靈。感悟宸心知。赫爾奮獨斷。去邪在勿疑。分捕復大索。儉人無子遺。大者肆朝市。其徒竄海湄。殺一以戒萬。是曰政之基。千奴共一膽。膽破衆自隳。無使永嘉風。敗亂昇平時。

以上宋文鑑。

宋史文苑傳。山東人范諷。石延年。劉潛之徒。豪放劇飲。不循禮法。後進多慕之。太初作東州逸黨詩。

章 儂

如歸亭 在吳江之東天聖中稍令球建

吳江江上客亭幽。地占姑蘇最上游。萬頃重湖朝夕浪。幾聲殘櫓往來舟。涼生領袖蘋風晚。冷射杯盤桂魄秋。東道正閑時倒屣。笙歌誰惜一遲留。吳江縣志

葉 綱

如歸亭

拍天烟浪接滄溟。識盡歸舟是此亭。風遞秋香來橘社。水資春味驗茶經。捲簾江樹差差綠。入坐湖山隱隱青。魯望幽居在何處。白鷗無主滿閑汀。吳江縣志

何永錫

如歸亭

獨臨朱檻愛平波。安穩歸舟兩兩過。數島雲霞栽橘社。一汀烟月採菱歌。湖心日定施青黛。砌下風恬展碧羅。好寫仙源槎閣主。便教從此上銀河。吳江縣志

陶伯宗

如歸亭

吾家本住洞庭西。烟雨生涯接釣磯。今日吳江亭上望。水光山色卻如歸。吳江縣志

梅 摯

摯，字公儀，成都新繁人。天聖中進士，擢殿中侍御史，戶部副使，出知蘇州，進龍圖閣學士，知杭州，遷右諫議大夫，徙江寧河中卒。

自和寒食韻

龜堞春遊土著賒，青青踏去冒烟華。翠停舴艋客尋寺，紅卸羈離人上車。亭落五重沽卓酒，釵行十二步。潘花乘歡盡醉高陽侶，倒載歸來不認家。成都文類。

琵琶亭

陶令歸來爲逸賦，樂天謫宦起悲歌。有弦應被無弦笑，何況臨弦泣更多。中山詩話。

新橋

千頭霜熟摘來新，包貢虔修望紫宸。他日功成許高退，社中還結素封人。

五日公宴

虎符新合晚芳天，良會難并樂與賢。心媿白公求治切，下車三月始開筵。自注：白公旬宴詩云：下車已三月，開筵始今辰。

過白頭橋在蘇州盤門運河上。

白頭橋柰白頭何。自注：唐牧白公建，因得名。近歲伯純修之，人呼孫老橋。舊德如存故老歌，不特輿梁起遺愛。大都才美服人多。

北軒敲枕

苦無勤瘁補臺綱。西院西頭冷峭房。今日鈴齋一欹枕。清風不敢傲羲皇。以上吳郡志。

歸雁亭歐陽公建在滑州。

東風楊柳杏花飛。曾伴先生酒一卮。前輩風流那復見。小亭烟雨漫相思。城邊春草路南北。山下河梁人別離。一尺短書□水闊。年年愁絕雁歸時。

偶書小詩寄永叔內翰知滑州時作。

酒戶某兵孰與儕。月宵曾過六天街。南燕到後懷君遠。時入樓東畫舫齋。以上大名府志。

句

涼深荔浦月。冷熨桂江秋。昭州月。 哲匠金桴。

富弼

弼字彥國。河南人。天聖八年。舉茂材異等。累擢知制誥。歷同中書門下平章事。封鄭國公。進昭文殿大學士。監修國史。進司徒。薨。贈太尉。諡文忠。

玉蓮詩話。或傳富鄭公奉使遼國。遼使者云。蚤登雞子之峯。危如累卵。答曰。夜宿丈人之館。安若泰山。又云。酒如線。因針乃見。富答曰。餅如月。遇食則缺。

謝邵堯夫見訪

先生自衛客西畿。樂道安閑絕世機。再命初筵終不起。獨甘窮巷寂無依。貫穿百代嘗探古。吟詠千篇亦造微。珍重相知忽相訪。醉和風雨夜深歸。

聞見前錄。公築第與康節天津隱居相邇。公曰自此可時相招矣。康節曰某冬夏不出。春秋時間過親舊間。公相招未必來。不召或自至。一日過之作詩云。

伏承留府太尉相公就敝居爲耆年之會。承命賦詩謹錄上呈。伏惟采覽。時公年九十九。

西洛古帝都。衣冠走集地。豈惟名利場。驟爲耆德會。大尹吾舊相。曠懷輕富貴。日與退老遊。臺閣并省寺。予慙最衰老。亦許預其次。遂欲省儀容。爛然形繪事。閩嶠訪精筆。鮫綃布絕藝。今復崇宴衍。聊以示慈惠。幽居近銅駝。荒弊仍湫底。塞路移君庖。盈車載春醴。獻酬互相趣。觀處不知止。商嶺有四翁。晉林惟七子。較我集諸賢。盛衰何遠邇。並事實可矜。傳之爲千祀。

弼竊覽長篇斷章有十二人中第二人之句。又賦一絕上呈。

顧我年齡雖第一。在公勳德自無雙。不推行業終難敵。富貴康寧亦可降。以上司馬光洛中耆英會詩。

涵虛閣 在南昌東湖北宋國子博士李寅致政居此建。

畫閣高連百雉城。涵虛應不媿標名。門前柳色兼旗色。座上琴聲雜佩聲。肯羨五湖歸范蠡。未饒三徑隱淵明。我來恰直初晴後。山影波光分外清。南昌府志。

資政范公以黃素小字韓文公伯夷頌寄才翁壬申正月才翁按察因跋

夷清韓頌古皆無。更得高平小楷書。舊相嘉篇題卷後。蘇家能事復何如。鐵網珊瑚。

文彥博

彥博字寬夫。介休人。舉進士。歷樞密副使。參知政事。拜同中書門下平章事。封潞國公。以太師致

仕紹聖中降太子少保卒預元祐黨籍後追復太師諡忠烈有集

蘇東坡云潞公長

律無一字無考據

邵氏聞見前錄文潞公自兗州通判代歸呂文靖一見奇之問潞公曰有兗州墨擲以來明日潞公進墨文靖熟視之蓋欲相潞公手也遂薦爲殿中侍御史

閑齋有作

鼓吹盡私蛙蒿蓬蔣徑斜。梧高惟待鳳柳密只容鴉。度暑巾裁縠迎涼帳卷紗。茂陵無柰渴猶有鎮心瓜。

蘅臯

蘅薄頻牽望陽林久駐鑣。香囊徒叩叩雲月自茗茗翠佩傳情密曾波託意遙。翩鴻漸高逝翻恨隔神霄。

見山樓

雲淡天迷楚樓高地占秦。哀箏兩行雁小字數鉤銀巷陌三條月池塘十步春。府門初夜閉多少夜遊人。

閱史有感

縹帙青箱次第開。慨然英氣轉難裁。莫言每事俱長往須有清風屬後來。彈鋏始知皆瑣旅枕戈方信是雄才。平生自信真非薄只是休容鳩鳥媒。以上文潞公集

同甲會詩

四人三百十二歲。況是同生丙午年。招得梁園爲賦日合成商嶺采芝仙。清談麀麀風盈席素髮飄飄雪

滿肩。此會從來誠未有。洛中應作畫圖傳。

夢溪筆談。文潞公保洛日。年七十八。同時有中散大夫程响。朝議大夫司馬且。司封郎中致仕席汝言。皆年七十八。嘗爲同甲會。各賦詩一首。

耆英會詩。時公年七十五。

九老舊賢形繪事。元豐今勝會昌春。垂肩素髮皆時彥。揮麈清談盡席珍。染翰不停詩思健。飛觴無算酒行頻。蘭亭雅集誇修楔。洛社英遊賞序賓。自媿空疎陪几杖。更容款密奉簪紳。當筵尙齒尤多幸。十二人中第二人。

澗水燕談云。富韓公熙寧四年。以司空歸洛。時年六十八。是年司馬端明不拜樞密副使。求判西臺。時年五十三。二公安居沖默。不交世務。後十一年。當元豐五年。文潞公留守西京。慕唐白樂天九老會。于是悉聚洛中大夫賢而老自逸者。韓公置酒相樂。凡十二人。又命鄭奐圖形。妙覺僧舍。各賦詩。時人呼之曰洛陽耆英會。而司馬公爲之序。其相聚也。用洛中舊俗。絃齒不尙。宜韓公年七十九。潞公與司封席汝言。字君從。皆年七十七。朝議大夫王尙恭。字安之。七十六。太常卿趙丙。字南正。祕書監劉几。字伯壽。衛州防禦使馮行己。字肅之。皆七十五。天章閣待制楚建中。字正叔。七十三。朝議大夫王慎言。字不疑。七十二。大中大夫張問。字昌言。龍圖閣直學士張燾。字景元。皆七十。司馬公六十四。故潞公詩云。當年尙齒尤多幸。十二人中第二人。韓公贈潞公詩云。顧我年齡雖第一。在公勲德自無雙。潞公再贈韓公詩云。惟公福祿并功德。合是人間第一人。是時宣徽使王公拱辰。字君旣。年七十。留守大名。貽書二公。預其數。凡十三人。

彥博代簡上君旣宣猷

勿愛大名。遂忘西洛樂。銅駝本自佳。金鳳亦不惡。二月三月春融融。千花萬花紅灼灼。公平早歸來。莫負花前約。同賞狀元紅。對酒劉師閣。自注。花雖舊房。其豔維新。

彥博伏觀公詩有第一無雙之句。輒成二十八字上呈。

洛下衣冠今最盛。當筵尙齒禮容優。惟公福壽并勳德。合是人間第一流。以上司馬光洛中耆英會詩。

贈李戡

昌元建邑幾經春。百里封疆秀氣新。鴨子池邊登第客。老鴉山下著某人。

方輿勝覽。昌元縣南有老鴉山。有李勣李戡兄弟善碁。會虜索碁戰于國朝。詔求天下善奕者。方帥以勣應。詔虜望風知畏。不敢措手。譙南蕭昌元人。登皇祐五年進士第。文潞公詩云云。

題榆次縣鼓樓

置向譙樓一任搗。搗多搗少不知他。如今幸有黃紬被。努出頭來放早衙。

合璧事類前集。世傳太祖謂一縣令曰。勿于黃紬被裏放衙。潞公詩云云。

雙泉

長劍並彈霜氣豪。白虹半折秋雲高。濯纓洗耳更何處。世人回看輕鴻毛。河南府志。

溟水在孟縣西北。春秋會于溟梁。卽此。

潺湲北山水。繚繞南城阜。晴灘錦石亂。擊觸春湍高。誰謂溟梁大。不能容魴魩。臨流自縮手。揭厲應徒勞。

宿少林寺

六六仙峯繞佛居。俗塵至此暫銷除。西來未會禪師意。北去應馳使者車。予方受命移守北都。五品封槐今尚在。九年面壁昔何如。心知一宿猶難覺。花藏重尋貝葉書。嵩陽石刻集記。

席汝言

汝言字君從。官尚書司封郎中。致仕。

耆英會年七十七

繫國安危唐上宰。功成身退漢留侯。二公閑暇開高宴。九老雍容奉勝流。共接雅歡恩意洽。不矜崇貴禮容優。賞心樂事人間盛。豈謂今稀古莫儔。

壯歲塵埃祿事牽。老歸重到舊林泉。曾無勳業書青史。偶向康寧養老年。自分杜門居陋巷。敢期序齒預公筵。更慙形穢才涼薄。不稱圖真接鉅賢。司馬光洛中耆英會詩。

王尙恭

尙恭字安之。官朝議大夫。致仕。

耆英會年七十六

端朝風望兩台星。珪組參差又十人。八百喬年餘總數。一千熙運遇良辰。席間韻語皆非俗。圖上形容盡得真。勝事主盟開府盛。誤容衰薄混清塵。服許便衣更野逸。坐從齒列似天倫。二公笑指增和氣。夜久盤

花旋發春。自注。燭下盤花開。公卽指目焉。 司馬光洛中耆英會詩。

劉 几

几字伯壽。洛陽人。第進士。神宗朝。官祕書監。致仕。上柱國通議大夫。

風月堂詩話。劉伯壽。洛陽九老之一也。築室嵩山玉華峯下。號玉華菴主。有妾名萱草。芳草皆秀麗。善音律。伯壽出入乘牛。吹鐵笛。二草以蘄笛和之。聲滿山谷。出門不言所之。牛行卽行。牛止卽止。其止也。必命壺觴盡醉而歸。嵩前人以爲地仙云。

耆英會 年七十五

司徒碩德今無比。太尉殊勳固絕倫。偶以暮年陪盛宴。喜將白髮照青春。八公有穢山空著。四皓當衰心且伸。元老相望疎迹在。不應此會媿會人。

制舉省元推二相。龍頭昔日屬宣猷。人間盛事并遐算。一席幾盈九百籌。自注。十二老共八百九十二歲。 司馬光洛中耆英會詩。

馮行已

行已字肅之。官衛州防禦使。致仕。

耆英會 年七十五

書稱五福壽爲先。有德人方得壽延。自媿樸樗非遠器。誰應齒髮亦遐年。立身官末三公貴。推老名陪二相賢。喜把衰容模梵宇。慙無纖效勒燕然。當時遭遇承陶冶。今日光榮預燕筵。從此洛城增勝槩。又新重作畫圖傳。司馬光洛中耆英會詩。

趙丙

丙、字南正。太常卿致仕。

耆英會年七十五。

新春鼎洛燕英髦。主禮雍容下庶僚。二相比肩官一品。十人華髮事三朝。星階並列瞻台曜。尊酒時行挹斗杓。東穎庸夫最無狀。也將顏面趁嘉招。司馬光洛中耆英會詩。

王謹言

謹言、字不疑。官朝議大夫。司農少卿致仕。

耆英會年七十二。

相印貂冠粲六符。華顛高會侍臣俱。不將官職誇鄉里。唯尙年齡入畫圖。履道清歡追故事。站瞻陰德見訐謨。叨陪几席真榮觀。珪璧叢中問瓊珠。司馬光洛中耆英會詩。

楚建中

建中、字正叔。洛陽人。第進士。官中奉大夫。天章閣待制。提舉崇福宮。

耆英會年七十二。

自顧頽齡七十餘。久慙頑鈍費洪鑪。歸逢大老耆年會。衰朽形骸媿畫圖。二相謨猷爛史編。諸公才業過前賢。好圖儀像傳來世。何事頑疎亦比肩。司馬光洛中耆英會詩。

張燾

蕭字景元。漢陽人。第進士。神宗朝。歷龍圖閣直學士。知成都府。通議大夫。提舉崇福宮。

耆英會年七十。

洛城今昔衣冠盛。韓國園林景物全。功在三朝尊二相。數逾九老萃羣賢。當時鄉社爲高會。此日居留□款延。多幸不才陪履舄。更慙七十是新年。司馬光洛中耆英會詩。

挽老蘇先生

本朝文物盛西州。獨得宗公薦冕旒。稷嗣草儀書未奏。茂陵辭客病無瘳。一門欵向傳家學。二子機雲並雋遊。守蜀無因奠尊酒。素車應滿古原頭。蘇集附錄。

張問

問字昌言。襄陽人。進士起家。累官祕書監給事中。終太中大夫。提舉嵩山崇福宮。入元祐黨籍。

耆英會年七十。

槐庭二老樂堯仁。盛集高年洛水濱。華袞具瞻雖禮絕。白頭序齒卻情親。清閑几席同禪院。山野巾裘似隱淪。尊酒椒香纔過節。池塘草色已催春。白公酣暢吟哦內。衛武康強笑語頻。豈獨丹青傳不朽。潛欣風俗欲還淳。芝田鶴戲調形健。蓮葉龜遊納息勻。商皓寂寥拘小隱。漢疏局促止家人。莫因氣貌疑丹竈。自有光陰寄大椿。復得兼謨爲重客。自注司馬光未七十。恐遺元爽在編民。神仙可學今方信。道術相忘久益眞。滿座交歡祝眉壽。羣生五福託鴻鈞。司馬光洛中耆英會詩。

劉槩

槃，字孟節，青州壽光人，少師種放，隱于青州之南冶源山，富鄭公爲築室以居，范文正公文潞公皆優禮之，欲薦之朝，懇辭不就。

溫公續詩話：槃喜爲詩，慷慨有氣節，舉進士及第，爲壽僚一任，不得志，棄官隱居冶源山，去人境四十里，好遊山，常獨挈飯一甕，窮探幽險，無所不至，夜則宿于巖石之下，或累日乃返，不畏虎豹蛇虺，富丞相甚禮重之。

府舍西軒作

昔年曾作瀟湘客，憔悴東秦歸未得。西軒忽見好溪山，如何尚有楚鄉憶。讀書誤人四十年，有時醉把闌干拍。閑居詩話。

張望

句

庭下郎君爲宰相，門前故吏作將軍。

邵氏聞見前錄：張金部名方，爲白波三門發運使，文潞公父令公昇爲屬官，金部召去，薦令公爲子弟讀書于孔目官張望家，望嘗爲舉子，頗知書，後隸軍籍，潞公少年好遊，令公怪責之，潞公久不敢歸，張望白令公曰：「郎君在某家學問益勤，苦不復遊矣。」因出潞公文數十篇，令公爲之喜，後潞公出入將相，望尙無恙，公判河南日，母申國太夫人生日，望自河清獻壽，有詩云：「望以子通籍封將軍云。」

劉沆

沆，字冲之，吉州永新人，天聖八年進士第二，至和中拜同中書門下平章事，集賢殿大學士，出知

應天府徙陳州卒贈左僕射兼侍中

小孤山

擎天有八柱。此一柱仍存。石聳千尋勢。波流四面痕。江湖中作鎮。風浪裏盤根。平地安然者。饒他五岳尊。
青箱雜記

送鄉人尹鑑登第歸

少年相款老相逢。鄉舉雖同遇不同。我已位塵三事後。君方身列五科中。榮登莫計名高下。宦達須由善始終。若到鄉關人見問。爲言歸思滿秋風。

青箱雜記。尹劉少同場屋。劉已登第大拜。皇祐中尹以恩榜始登第。劉以詩送之。

陳希亮

希亮字公弼。青神人。天聖八年進士。歷官提點江東刑獄。入判三司戶部句院。請補外爲京東轉運使。移知鳳翔。致仕。卒。第四子慥。字季常。與蘇軾遊。

和范公希文懷慶朔堂

弱柳奇花遞閒栽。紅芳綠翠對時開。主人當日孤真賞。魂夢還應屢到來。
饒州府志

魏兼

兼官度支員外

和范公希文懷慶朔堂

使君去後堪思處，慶朔堂前獨到來。桃李無言爭不怨，滿園紅白爲誰開。饒州府志。

畢京

京官職方員外。

和范公希文懷慶朔堂

花木還依舊，巡栽春園不惜爲誰開。幾多民俗熙熙樂，似到老聃臺上來。饒州府志。

曹經

經官同提點江東刑獄。

和范公希文懷慶朔堂

池館名公舊日栽，幾番零落又春開。誰人解識紅芳意，猶有多情五馬來。饒州府志。

曰路按范公詩自懷慶朔堂栽花作讀四和詩可以辨西溪

叢語眷憶樂籍之誣并卻掃編春風爲道士名亦近附會矣

陸軫

軫山陰人官兵部郎。

七歲作

昔時家住海三山，日月宮中屢往還。無事引來天女笑，謫來爲吏在人間。

嘗舊續聞陸太傅軫神采秀異七歲猶不能語一日乳媪攜往後園俄而吟詩云後仕至兵部郎官歸老稽山宋元憲杜祁公皆有詩送行篇中多及神仙事蓋公雅志也

魯交

交字叔達梓州人仕至虞部員外郎有三江集

經戰地

西邊用兵地黯慘無人耕戰士報國死塞草迎春生沙飛賊風起晝黑陣雲橫夜半烽臺望旄頭星尙明

宋文鑑

遊華山張超谷

太華鎖深谷我來眞景分有苗皆是藥無石不生雲急瀑和煙瀉清猿帶雨聞幽棲未忍別峯半日將曛

江樓晴望

江干一雨收霽色染新愁遠水碧千里夕陽紅半樓笛寒漁浦晚山翠海門秋更待牛津月袁宏欲泛舟

清夜吟

露華清八極吟上小樓東月色水鋪地雁聲秋滿空明河欲瀉浪瘦竹自生風坐久心骨爽此懷誰與同

有寄

思君又是東風起樓倚浮雲目千里芳草不知人斷腸帶煙帶雨連春水

以上前賢小集拾遺

齊唐

唐，字祖之，廓弟。天聖八年進士，嘗試制科，辟杭州料院，仕至職方員外郎致仕，有少微集。

會稽志：唐有家園在鑑湖，有小而近湖，唐分司東歸，命名少微山，遂家焉。引流爲沼，藝花爲圃，山之上下有芳華亭，修竹巖，眞珠泉，石室，嘉遯亭，樵風亭，禹穴閣，應星亭，東山亭，釣閣，盡湖山之勝，自爲家山十詠，陶寫景物，語尤閑遠，今詩不存。

玉洞 在劍浦山。

白石洞間路，吾家在其中。琴窗與書閣，一半是雲封。會稽志。

仙茅

仙方上品誇靈種，忽怪靈芝拆紫苞。玉澤返嬰看驗術，少微山是小三茅。剡錄。

觀潮

何意滔天苦作威，狂驅海若走馮夷。因看平地波翻起，知是滄浪鼎沸時。初似長平萬瓦震，忽如員嶠六
鼇移。直應待得澄如練，會有安流往濟時。瀛奎律髓。

張先

先字子野，烏程人。天聖八年進士，嘗知吳江縣，仕至都官郎中，有安陸集。

東坡志林：張先子野善戲謔，有風味，見杭妓有彈

琴者，忽撫掌曰：異哉！此箏不見許時，乃爾黑瘦耳。

過庭錄：張先子野郎中，一叢花詞云：沈思細恨，不如桃杏，猶解嫁東風。一時盛傳。歐永叔尤愛之，恨未識其人。子野家南地，以故至都謁永叔，關者以通永叔，倒屣迎之，曰：此乃桃杏嫁東風郎中。東坡守杭，子野尚在，嘗預宴席，有南鄉子詞，末句云：問道

賢人聚矣分試問也應傍
有老人星蓋年八十餘矣

吳江

春後銀魚霜下鱸。遠人曾到合思吳。欲圖江色不上筆。靜覓鳥聲深在蘆。落日未昏聞市散。青天都淨見山孤。橋南水漲虹垂影。清夜澄光合太湖。中吳紀聞。

往歲吳興守滕子京席上見小妓兜娘子京賞其佳色後十年再見于京口絕非向時容態感之作詩

十載芳洲撫白蘋。移舟弄水賞青春。當時自倚青春力。不信東風解誤人。侯鯖錄。

營妓張溫卿黃子思愛姬宜哥皆葬宿州城東過而題詩

好物難留古亦嗟。人生無物不塵沙。何時種樹連雙冢。結就人間並蒂花。能改齋漫錄。

題西溪無相院

積水涵虛上下清。幾家門靜岸痕平。浮萍破處見山影。小艇歸時聞草聲。入郭僧尋塵裏去。過橋人似鑑中行。已憑暫雨添秋色。莫放修蘆礙月生。合璧事類前集。

和元居中風水洞上祖龍圖韻

水色風光近使君。浥塵輕雨逐車輪。暫來不宿宜無恨。多少行春不到人。咸淳臨安志。

句

愁似鰈魚知夜永，嬾同蝴蝶爲春忙。

石林詩話：張先郎中能爲詩及樂府，至老不衰。居錢唐，蘇子瞻作倅時，先年已八十餘，視聽尙精強，家猶畜聲妓，子瞻嘗贈以詩云：詩人老去鸞鴛在，公子歸來燕燕忙。蓋全用張氏故事戲之。先和云：極爲子瞻所賞，俚俗多喜傳詠。先樂府遂掩其詩聲，識者皆以爲恨云。

湖山隱後居空在，煙雨詞亡草自青。

藝苑雌黃：張子野過和靖隱居，一聯自註云：先生嘗著春草曲，有滿地和煙雨之句。

李之才

之才字挺之，青州人。天聖八年進士，師穆修受易，修受之，种放放受之，陳搏源流甚遠。邵雍傳其學，官至殿中丞，簽書澤州判官。

鳳州絕句

去年三月洛城遊，今日尋春到鳳州。欲把雙魚附歸信，嘉陵江水不東流。

西溪叢話：時韓中令宣撫河東，委之才以秦鳳鑄鐵錢事，在鳳州有作。

孫復

復字明復平陽人居泰山深于春秋石介以次皆師事之以薦除國子監直講卒有睢陽小集

八月十四夜月

銀漢無聲露欲垂玉蟾初上欲圓時清尊素瑟宜先賞明夜陰晴未可知孫明復小集

石介

介字守道奉符人天聖八年進士歷嘉州判官居憂躬耕徂徠山下魯人號徂徠先生後遷直集賢院出判濮州卒有徂徠集

燕脂板浣花牋寄合州徐文職方

合州太守鬢將絲聞說歡情尙不衰板與歌娘拍新調牋供狎客寫芳辭木成文理差差動花映溪光瑟瑟奇名得只從嘉郡樹自注燕脂木嘉州出樣傳仍自薛濤時自注有薛濤牋奇章磊磊馳聲價江令翩翩落酒卮幾首詩成卷魚子自注有魚子牋誰人唱罷泣燕脂紅牙管好同牀置紫竹笙宜一處施願助風流向尊席杏花況是未離披

慶歷聖德詩

於惟慶歷三年三月皇帝龍興徐出闈闔晨坐太極晝開闔闔躬攬英才手鋤姦孽大聲颯颯震搖六合如乾之動如雷之發昆蟲躅躅怪妖藏滅同明道初天地嘉吉初聞皇帝戚然言曰予祖子父付予大業予恐失墜實賴輔弼汝得象殊慎重微密君相予久予嘉乃績君仍相子筮鑪斯協昌期儒者學問該洽與予論政傳以經術汝貳二相應績或秩惟汝仲淹汝誠予察太后垂簾湯沸火熱汝時小臣危言巖巖

爲子司諫。正子門闥。爲子京兆。聖子讒說。賊叛于夏。汝往式遏。六月酷日。大冬積雪。汝寒汝暑。同于士卒。予聞辛酸。汝不告乏。予晚得弼。予心慰悅。弼每見予。無有私謁。以道輔予。弼言深切。予不堯舜。弼自咎罰。陳官一年。奏疏滿篋。侍從周歲。忠力僅竭。契丹忘義。構杙饕餮。敢侮大國。其辭慢悖。弼將予命。不畏不懼。卒復舊好。民得食褐。沙磧萬里。死生一節。視弼之虜。霜剝膚裂。觀弼之心。煉金煅鐵。寵名大官。以酬勞竭。弼辭不受。其志莫奪。惟仲淹弼。一夔一點。天實賚予。予其敢忽。並來弼子。民無嗟札。曰衍汝來。予之黃髮。事予二紀。毛禿齒豁。心如一兮。率履不越。遂長樞府。兵政毋斃。予早識琦。琦有奇骨。其器魁樞。豈視居楔。其人渾樸。不施剗削。可屬大事。敦厚如勃。琦汝副衍。知人予哲。惟修惟靖。立朝轍轍。言論礫柯。忠誠特達。祿微身賤。其志不怯。嘗詆文臣。亟遭卑黜。萬里歸來。剛氣不折。屢進直言。以補予闕。素相之後。含忠履潔。昔爲御史。幾叩予榻。至今諫疏。在予箱匣。襄雖小官。名聞予徹。亦嘗獻言。箴予之失。剛守粹慤。尙修儔匹。並爲諫官。正色在列。予遏汝言。汝無鉗舌。皇帝明聖。忠邪辨別。舉擢俊良。埽除妖魅。衆賢之進。如茅斯拔。大姦之去。如距斯脫。上倚輔弼。司予調燮。下賴諫諍。維予紀結。左右正人。無有邪孽。予望太平。日不逾浹。皇帝在位。二十二年。神武不殺。其默如淵。聖神不測。其動如天。賞罰在手。不失其權。恭已南面。退姦進賢。知賢弗易。非明弗得。去邪惟難。惟斷乃克。明則不惑。斷則不忒。旣明且斷。惟帝之德。羣下踧踖。重足屏息。交相語曰。惟正惟直。毋作側僻。皇帝汝殛。諸侯危栗。墮玉失舄。交相告語。皇帝神明。四時朝覲。謹修臣職。四夷走馬。墜鐙遺策。交相告語。皇帝神武。解兵修貢。永爲屬國。皇帝一舉。羣臣懾焉。諸侯畏焉。四夷服焉。臣願皇帝壽千萬年。以上徂徠集。

東都事略石介爲國子直講。是時兵討元昊。久無功。海內重困。仁宗奮然。思欲振起威德。宰相呂夷簡以疾罷歸。夏竦罷樞密使。章德象晏殊爲相。賈昌朝參知政事。用杜衍爲樞密使。范仲淹韓琦富弼樞密副使。王素歐陽修余靖同爲諫官。介躍然曰。此盛德事也。雅頌吾職其可已。乃作慶歷聖德詩。詩出。孫復謂介曰。子禍始于此矣。夏竦見而銜之。介既卒。竦欲以奇觚中富弼指介以起事。謂其詐死北走契丹。請發棺。仁宗察其誣。得不發。

宋詩紀事卷十二

錢塘 厲鶚 輯

郝門 馬曰璐 同輯

元絳

絳字厚之錢唐人天聖八年進士神宗朝累官翰林學士拜參知政事出知亳州改潁州致仕卒
贈太子少師諡章簡有玉堂集

石林詩話元厚之知荆南夢至仙府三人者聯名書旁有告之曰君三人蓋兄弟也覺而思之莫知所謂未幾入爲學士韓持國維楊元素繪先已在院一日書名三人名皆從絞絲始悟夢兄弟之意已而持國元素外補厚之京尹後三年復與元素還職而鄧文約縮相繼爲直院則三人之名又皆從絞絲許大夫選作四翰林詩紀其事厚之和云聯名適似三株樹傳玩驚看五朵雲亦一時之異也

詔修兩朝國史開局日賜筵史院和首相吳公席上韻

殿帷昕對罷省戶雨陰餘詔賜堯尊酒人探禹穴書夔龍方客右班馬蓋徒歟徑醉俄歸弁雲西見日車
揮塵後錄

郡守章公帖五日開宴會九老於廣化寺次韻

五日佳辰郡政閑延賓談笑豁幽關閨門歌舞尊疊上林屋烟霞指顧閒德應華星臨穎尾年拘皓髮下

商顏昌花美酒疎鐘永坐見斜暉隱半山

中吳紀聞徐師閔字聖徒仕至朝議大夫退老于家日治園亭以文酒自娛樂時太子少保元公絳正議大夫程公師孟朝議大夫閔丘公孝終亦以安居歸老因相與繼會昌洛中故事作九老會章咭爲郡守大置酒合樂會諸老于廣化寺又有朝請大夫王玠承議郎通判蘇溫與焉王賦詩爲倡諸公屬而和之以爲吳門盛事

題鼓山元公亭

誰書吾姓揭亭顏棟宇飛騰氣象完谷口秋風吹鬢髮海東朝日上闌干地高頓覺羣山小天近須知六合寬三到巖扉殊不厭異時長向畫圖看淳熙三山志

在禁林時有懷荆南舊遊

去年曾醉海棠叢聞說新枝發舊紅昨夜夢回花下飲不知身在玉堂中海棠譜

趙潛叔殉節詩

轉戰譙門日欲晡空拳猶自把戈鈇身垂虎口方安坐命在鴻毛更疾呼柱下臬卿存斷節袴中杵臼得遺孤空餘三尺英雄氣不媿山西士大夫

後村詩話皇祐中饑賊犯康州闔郡潰去惟守臣趙師旦死之妻方產子棄之草間亂後訪之尙呱呱然元公挽之云云

元豐辛酉冬予解組歸吳明年過故同年宋光祿舊居周覽園榭感事作詩以詒伯原

白頭重到故人家。境是人非起歎嗟。三徑未荒陶令菊。四時長放庾郎花。林風光動藏鶯葉。溪浪痕生宿鷺沙。肯構有材移病久。會憑詩酒傲烟霞。蘇州府志

句

仙驪籜雲穿仗下。佛花吹雨布天流。

石林詩話。元豐中久旱。裕陵禁中齋禱甚力。一夕夢有僧乘馬馳空中。口吐雲霧。覺而大雨。翌日命中貴人物。色於相國寺。五百羅漢。中至第十三尊。略彷彿。卽迎入內觀之。正所夢也。元參政厚之喜雨。句云云。蓋記此事。

刁約

約字景純。潤州人。衍之子。天聖八年進士。嘉祐中以兵部員外郎集賢校理。知越州。

使契丹戲作

押燕移離畢。看房賀跋支。餞行三匹裂。密賜十貔狸。

夢溪筆談。刁景純使契丹戲作云云。移離畢。官名。如中國執政。賀跋支。如執衣防圍。匹裂。小木。以色綾木爲之。如黃漆。貔狸。形如鼠而大。穴居食穀。北人爲珍膳。味如豚肉而脆。

遊五洩山

西源窮盡到東源。直注層崖五磴泉。眞境無由追汗漫。勝游聊得弄潺湲。風生虎嘯層崖底。月上猿啼古木巔。只待歸來林下去。好同靈一此安禪。諸暨縣志

朱公綽

公綽吳人天聖八年進士曾爲鹽官令

與宋子京唱酬牡丹詩

仁帥安全蜀祥葩育至和地寒開既晚春曙力終多翠帟遮蜂蝶朱闌隔綺羅殷懃憑驛使光景易蹉跎

成都文類

句

諫草焚來應見史囊金盡散只留詩劉諷都官致仕古今詩話

蔡襄

襄字君謨其先自光州固始入閩家仙遊又遷莆田遂爲莆田人天聖八年進士累官龍圖閣學士知開封府徙知泉州召爲翰林學士乞爲杭州拜端明殿學士以往治平四年卒乾道中諡忠惠有集

茗溪漁隱叢話余觀東坡荔枝歎注謂大小龍茶始于晉公而成于蔡君謨歐陽永叔聞君謨進小龍團歎曰君謨士人也何至作此事今年閩中監司乞進鬪茶許之故其詩云武夷溪邊粟粒芽前丁後蔡相龍加爭新買龍各出意今年鬪品充官茶

四賢一不肖詩

中朝鸞鵠何儀儀慷慨大體能者誰之人起家用儒業馳騁古今無所遺當年得從諫官列天庭一露胸中奇失身受責甘如薺沃然華實相葳蕤漢文不見賈生久詔書曉落東南涯歸來俯首文石陛尹以京兆天子毗名都翼翼郡國首里區百萬多占辭豪宗貴倖矜意氣半言主上承其頤昂昂孤立中不倚傳

經決認無牽羈。老姦黠吏束其手。衆口和附歌且怡。日朝黃幄邇天間。帝前大畫當今宜。文陳疏舉時密啓。此語多祕世莫知。傳者籍籍十得一。一者已足爲良醫。一麾出守蕃君國。惜此智慮無所施。吾君睿明廣視聽。四招俊乂隆邦基。廷臣諫列復箝口。安得長喙號丹墀。晝歌夕寢心如疚。咄哉汝憂非汝爲。右范仲淹。

南方之強君子居。卓然安道襟韻孤。詞科判等屢得雋。呀然鼓焰天地爐。三年待詔處京邑。斗粟不足榮妻孥。耳聞心慮朝家事。螭頭北奏帝曰都。校書計課當序進。麗賦集仙來顯塗。誥墨未乾尋已奪。不奪不爲君子儒。前日希文坐言事。手題敕教東南趨。希文鯁亮素少與。失勢誰復能相扶。嶄然安道生頭角。氣虹萬丈橫天衢。臣靖胸中有至語。舉隘不避蕭斧誅。使臣仲淹在廷列。日獻陛下之嘉謨。刺史榮官雖重任。奈何一郡卷不舒。言非由位固當罪。隨漕扁舟盡室俱。炎陬此去數千里。囊中狼藉唯蠹書。高冠長佩叢闕下。千百其羣訶爾愚。吾知萬世更萬世。懷懷英風激懦夫。右余靖。

君子道合久以成。小人利合久以傾。世道下衰交以利。遂使周雅稱嚶鳴。煌煌大都足軒冕。綽有風采爲名卿。高名重位蓋當世。退朝歸舍賓已盈。脅肩諂笑不知病。指天報遇如要盟。一朝勢奪德未改。萬鈞已與毫釐輕。畏威諛上亦隨毀。矧復鼓舌加其評。透迤陰拱質氣厚。兩耳塞豆心無營。嗚呼古人不可見。今人誰與明。章章節義尹師魯。飭躬佩道爲華榮。希文被寵激人怒。君獨欣慕如平生。抗書殺下自論劾。惟善與惡宜彙征。削官竄逐惟適楚。一語不挂離騷經。當年亦有大臣逐。朋邪隱縮無主名。希文若果事姦險。何此吉士同其聲。高堂本欲悟人主。豈獨區區交友情。右尹洙。

先民至論推天常。補袞扶世爲儒方。圓冠博帶不知本。樛櫟安可施青黃。帝圖日盛人世出。今吾永叔誠有望。虛心學古貴適用。異端莫得窺其牆。子年五月范京兆。服天子命臨鄱陽。二賢拜疏贖其寵。勢若止沸反揚湯。敕令百執無越位。諫垣何以敢封囊。哀求激憤亦復奮。強食不得下喉吭。位卑無路自聞道。日視雲闕高蒼茫。裁書數幅責司諫。落筆驟驥騰康莊。刃迎縷析解統要。其間大意可得詳。書曰希文有本末。學古通今氣果剛。始從理官來祕閣。不五六歲爲天章。上心倚若左右手。日備顧問鄰清光。苟爾希文實邪佞。曷不開口賦否臧。陰觀被遣始醜詆。摧枯拉朽奚爲強。倘曰希文實賢士。因言被責庸何傷。漢殺王章與長倩。當時豈曰誅賢良。惟時諫官亦結舌。不曰可諫曰罪當。遂令百世覽前史。往往心憤涕泗滂。斯言感切固已重。讀者不得令激昂。肯圖反我爲怨府。袖書乞憐天子旁。謫官一邑固分耳。恨不剖腹呈琳琅。我嗟時輩識君淺。但推藻翰高文場。斯人滿腹有儒術。使之得地能弛張。皇家太平幾百歲。正當鑑古修紀綱。賢才進用忠言錄。祖述聖德垂無疆。右歐陽修

人稟天地中和生。氣之正者爲誠明。誠明所鍾皆賢傑。從容中道無岐傾。嘉言讜論范京兆。激姦糾謬揚王庭。積羽沈舟毀銷骨。正人無徒姦者朋。主知膠固未遐棄。兩轡五馬猶專城。歐陽祕閣官職卑。欲雪忠良無路歧。累幅長書挾幽憤。一責司諫心無疑。人謂高君如撻市。出見摺紳無面皮。高君構書奏天子。游言容色仍怡怡。反謂希文謀疎闊。投彼南方誠爲宜。永叔忤意竄西蜀。不免一中讒巧辭。汲黯嘗糾公孫詐。弘于上前多謝之。上待公孫禮益厚。當時史館猶刺譏。司諫不能自引咎。復將已過揚當時。四公稱賢爾不肖。讒言易入天難欺。朝家若有觀風使。此語請與風人詩。右高若訥

灑水燕談景祐中范文正公知開封左右言公朋黨黜知饒州余靖安道論救坐貶尹師魯洪言臣與仲淹義兼師友當從坐
貶監鄆州稅歐陽永叔移書實司諫高若訥若訥怒繼其書降授夷陵縣蔡君謨作四賢一不肖詩四賢謂希文安道師魯永
叔不肖謂若訥也布在都下人
爭傳寫鬻書者市之頗獲厚利

游鼓山題靈源祠

郡樓瞻東方嵐光瑩人目乘舟逐早潮十里登南麓雲深翳前路樹暗迷幽谷朝雞亂木魚晏日明金屋
靈泉注石竇清吹出篁竹飛毫劃峭壁勢力忽驚觸捫蘿躋上峯太空延眺矚孤青浮海山長白挂天瀑
況逢肥遯人性尚自幽獨西景復向城淹留未云足

上元應制

高列千峯寶炬森端門方喜翠華臨宸遊不爲三元夜樂事還同萬衆心天上清光留此夕人間和氣闌
春陰要知盡慶華封祝四十餘年惠愛深

夢中作

天際烏雲含雨重樓前紅日照山明嵩陽居士今何在青眼看人萬里情

書小閣壁上

綽約新嬌生眼底侵尋舊事上眉尖問君別後愁多少得似春潮夜夜添

嘉禾郡偶書

盡道瑤池瓊樹新。仙源尋到不逢人。陳王也作驚鴻賦。未必當時見洛神。

宿漁梁驛

庭樹疎疎河漢低。瓦溝霜白月平西。寒鴉不奈單棲苦。落泊驚飛到曉啼。

留別舊居花檻

別意起中夕。出門風吹衣。側月光豔薄。餘花香氣微。清尊歲相向。欲去心有違。殘葩勿盡放。主人行亦歸。
以上蔡忠惠公集

寒食遊西湖 知福州作

山前雨氣曉才收。水際風光翠欲流。盡處旌旗停曲岸。滿潭鉦鼓競飛舟。浮來烟島疑相就。引去沙禽好自由。歸騎不令歌吹歇。萬枝燈燭度花樓。
淳熙三山志

王素

素字仲儀。且季子。賜進士出身。擢知諫院。出知成都府。復尹開封。熙寧初。入爲通進銀臺司。轉工部尚書。卒諡懿敏。

述夢

似去華胥國裏來。雲霞深處見樓臺。月光冷射雞窗急。驚覺遊仙夢一迴。

詩話總龜。公任御史日。嘗夢中至玉京黃闕殿上。有緇服翠冠者曰。吾東門侍郎。公則西門侍郎也。昔以奏牘玉帝前。語傷鯁。遂謫于世。公夢迴。題此。

彭思永

思永字季長廬陵人舉進士累擢天章閣待制河北都轉運使治平中召爲御史中丞熙寧中以戶部侍郎致仕卒

絕句

爭利爭名日日新滿城冠蓋九逵塵一聲雞唱千門曉誰是高眠無事人過庭錄

趙師民

師民字周翰青州臨淄人第進士官天平軍節度推官歷天章閣侍講刑部郎中判宗正丞有集

張耒明道雜志先君嘗從趙周翰授易與周翰稍密先君嘗與客語周翰作詩極有風味是溫飛卿韓致光之流而世以朴儒處之非也

向來

向來情思已陳陳旅恨無端不及春潘子形容傷白髮沈郎文字暗丹脣明道雜志

句

露臺枉惜千金費卻把銅山賜幸臣

風月堂詩話趙周翰詠漢文帝云可與

李義山不問蒼生問鬼神之句並驅爭先

麥天晨氣潤槐夏午風清委地露花啼曉恨拂隄烟柳弄春容歷代吟譜霜女遺靈長著素玉妃餘恨結

成酸梅。明道雜誌。

范師道

師道字貫之。長洲人。仲淹姪。天聖九年進士。知廣德縣。擢侍御史。以論事件宰相劉沆。出知常州。復召爲起居舍人。同知諫院。出知福州。復入爲三司鹽鐵副使。終直龍圖閣。知明州。有集。日磔按宋登科記。天聖九年停貢。舉拔萃四人。師道當是中拔萃科。

題隱圃贈蔣希魯

勇退人難事。明公識慮長。波濤濟舟楫。霜雪見松篁。林下開前圃。花間出亞槍。二疏良宴會。老杜好篇章。道向清來勝。機于靜處忘。當除印如斗。試一較閑忙。中吳紀聞。

天平山

天地萬物間。或有奇勝迹。見賞能幾人。不知今與昔。吳門多好山。天平爲峻極。旦暮常白雲。表裏皆珍石。烟嵐十里光。松桂四時色。我因一縱遊。煩襟爲開釋。感古懷君子。翻然長太息。樂天賞雲泉。詩章何歷歷。垂今數百年。繼者漠然寂。閒遇希文來。雙旌守鄉國。行春三讓原。吟哦盡所得。子美天與才。尋幽多採摭。賦詩五十言。平地黃金擲。三賢固有名山資。亦輝赫。此去還幾年。不逢好事客。吳郡志。

滕涉

涉天聖中諫議大夫。

游泰山靈巖寺

山半舊招提。捫蘿躡石梯。佳名標四絕。勝境出三齊。殿古烟霞窟。庭深檜柏蹊。嶽靈分地界。雲險接天倪。香篆清風裊。松廊翠巘低。飛塵無路入。幽鳥隔巖啼。破夢泉聲急。飄涼竹韻淒。微陽生頂上。殘月落峯西。暫到猶塵慮。長居信覺迷。致君功業就。向此卜幽棲。靈巖詩集

孔道輔

道輔字原魯。宣聖四十五世孫。舉進士。天聖間爲右正言。累官御史中丞。出知鄆州。卒贈尙書。

闕里夫子廟

楚火自焚寧害聖。金絲堂壁闕家書。典墳啓發皆天意。非謂共王好治居。山東通志

唐介

介字子方。江陵人。擢進士第。爲殿中侍御史。劾宰相文彥博。貶春州別駕。神宗朝。拜參知政事。與王安石爭論不勝。憤疽發背。卒。贈禮部尙書。諡質肅。

謫官渡淮風欲覆舟而作

聖宋非狂楚。清淮異汨羅。平生仗忠信。今日任風波。舟楫顛危甚。鼃鼃出沒多。斜陽幸無事。沽酒聽漁歌。合璧事類前集

碧落洞

余生本孤拙。所志在雲石。薄宦偶纏鎖。未遂林泉適。邇來備臺選。幸一當言責。狂愚抵罪辜。遽從邊徼謫。區區數千里。車馬倦行役。滇陽頗善地。解轡喜安席。官散無所事。度日多閑隙。太守蘇宣甫。邀我訪奇跡。

西山有石室。疑是靈仙窟。翛然烟徑入。衍若天門闕。中瀉一溪清。傍映千峯碧。萬穴滴瑤乳。兩崖張翠帟。爽氣來先秋。昏嵐生未夕。不知造化意。何爲置窮僻。周生說到難。斯文不虛擴。怪容誠莫狀。勝踐今始獲。暫已瑩耳目。久覺生虛白。拂拭纓上塵。回頭謝朝客。雖非吾土樂。聊以慰奇隻。聖恩未放還。屢遊君莫惜。
廣東通志。

李師中

師中字誠之。應天府楚丘人。舉進士。神宗朝。歷官天章閣待制。河東都轉運使。知秦州。貶和州團練副使。安置徙單州。復分司南京。提舉太極觀。卒。有集。

贈御史唐介貶英州別駕進退格。

孤忠自許衆不與。特立敢言人所難。去國一身輕似葉。高名千古重如山。並遊英俊顏何厚。未死姦諛骨已寒。天爲吾皇扶社稷。肯教夫子不生還。

東軒筆錄。唐介始彈張堯佐。諫官皆上疏。及彈文彥博。則吳奎畏縮不前。當時謂拽動陣腳。及唐爭論于上前。遂并及奎之背約。執政又黜奎。而文潞公益不自安。遂罷政事。時李師中送介詩。有並遊英俊顏何厚。未死姦諛骨已寒之句。爲奎發也。

韓魏公席上作

願得貔貅十萬兵。西戎巢穴一時平。歸來不用封侯印。只問君王乞愛卿。

后山詩話。魏公爲陝西安撫。開府長安。李

待制師中過之。席間使爲官妓費愛卿賦。

偶題

燕子知時節。還從舊宇歸。新人方按曲。不許傍簾飛。

東臯雜錄。李誠之才致高妙。守邊有威信。熙寧

初。荆公用事。議論不合。退居汶上。題詩云云。

客有寫真者。見予因以詩贈之。

嗟予少也賤。到老尙無功。方寸浮名外。流年兩鬢中。對鏡猶慙愧。圖寫若爲容。聲畫集

詠松

半依崑岫倚雲端。獨上亭亭耐歲寒。一事頗爲清節累。秦時曾作大夫官。鶴林玉露

麥積山 在天水縣東。狀如麥積。爲秦地林泉之冠。有隗囂避暑宮。魏乙弗后墓。

路入青松翠靄閒。斜陽倒影下溪灣。此中猿鶴休相顧。謝傅東歸自有山。方輿勝覽

和李明叔理定道中

幽居日日數歸程。已寫華嚴兩帙經。門外初寒江氣白。嶺頭多雨燒痕青。曾逢飯顆嘲山笠。應載鴟夷笑井餅。客土相思多引望。天涯風景似新亭。桂林府志

魏瓘

瓘字用之。歙州婺源人。父羽。奏補校書郎。累官集賢院學士。廣東安撫使。進龍圖閣直學士。吏部侍郎致仕卒。

感懷

羸羸霜髮一衰翁。蹤跡年來類斷蓬。萬里遠歸雙闕下。一身閑在衆人中。螭頭賜對恩雖厚。雉堞論功事已空。淮上有山歸未得。獨揮清涕灑春風。

湘山野錄。魏瓘侍郎知廣州日。大築子城。儂智高亂。民逃于中。獲生者衆。朝廷嘉之。自以論功久不報。故作是詩。文潞公采詩進呈。加龍圖閣學士尹天府。

句

誰言嶺外無霜雪。何事秋來亦滿頭。五羊書事。湘山野錄。

熊知至

知至。字意誠。建陽人。天聖中。五舉不第。歸隱鼇峯。有集。

贈王山人

閑拄瘦筇枝。衣冠半異時。入城人不識。賣藥俗長疑。飲酒難逢醉。餐松自止飢。華峯千嶂裏。常與白雲期。翰墨大全。

句

樓臺上下火照火。車馬往來人看人。觀燈。萬姓統譜。

趙槩

槩字叔平。南京虞城人。第進士。累擢龍圖閣學士。知郟州。拜參知政事。熙寧初。轉吏部尚書。以太

子師致仕，薨贈太子太師，諡康靖。

澠水燕談：歐文忠公與趙少師暨同在中書，及告老，趙自南京訪文忠于穎上，所居之西堂曰會老，仍賦詩以志盛事。時翰林呂學士公著方牧穎，特置酒于堂，宴二公文忠，親作口號，有金馬玉堂三學士清風明月兩閑人之句。

挽老蘇先生

侍從推詞伯，君王問子虛。早通金匱學，晚就曲臺書。露泣時難駐，琴亡韻亦疎。臧孫知有後，里閭待高車。

蘇集附錄。

郭積

積字仲微，開封祥符人。舉進士，歷龍圖閣學士，權知開封府。康定中，嘗與王堯臣、張觀、李若谷、宋庠等修崇文總目。

和樞密侍郎因看海棠憶禁苑此花最盛

朱闌明媚照橫塘，芳樹交加枕短牆。傳得東君深意態，染成西蜀好風光。破紅枝上仍施粉，繁翠陰中旋撲香。應爲無詩怨工部，至今含淚作紅妝。海棠譜。

陸經

經字子履，越州人。仁宗朝，集賢殿修撰，有寓山集。

孔仲平談苑：陸經多與人寫碑銘，頗得濡潤，人有問子履近日所寫幾何，對曰：近日所寫甚少，總在街上喝道行裏。

魏道輔續東軒筆錄陸經學士坐譎流落歐陽文忠公憐其貧每與人作碑誌必先約令陸子履書欲以濡潤助之也由是子履書名亦自此而盛周平原序云公與歐陽文忠公周旋館閣詩文往復相與至厚惜不幸陷于朋黨屢起屢仆晚遇裕陵方

嚮子用則

已老矣

贈丁元珍中允宰剡

塵土官曹幾處閑君今作邑好開顏落帆直上剡溪口入境先登天姥山魚鳥半和風俗處雲霞多雜簿
書閒雪晴須去尋安道莫作經宵興盡還剡錄

晚泛秀水

落日進扁舟沿迥碧玉流未能追白鳥貪共數游鯈翠壁玲瓏倒青天表裏浮誰滯世閒熱灑出洞庭秋
袁州府志

句

薄有田園歸去好苦無官況莫來休爲山陽令作 青瑣高議

周鏞

鏞仁宗時人

五洩山

路入蒼烟九過溪細穿崑曲到招提天分五溜寒傾北地秀諸峯翠插西鑿徑破崖來木杪駕泉鳴竹落

襍題當年老默無消息，猶有祠堂一杖藜。越詠

曾 謬

謬、諸暨令。

五洩山

五洩高寒插太清，銀河垂地落天聲。玉虹貫日晴空見，驄馬翻瓢白晝傾。作賦曾聞誇鴈蕩，乘槎應可到蓬瀛。何當一叱乖龍起，手挽商霖洗甲兵。越詠

郭 亢

五洩山

不到此山三十年，重來風物自依然。兩源秋色排千嶂，五級泉聲落半天。絕唱傳聞諸老句，幽棲猶想默師禪。迴頭迴與塵寰別，何必蓬萊始是仙。越詠

張唐卿

唐卿、景祐元年進士第一。

句

一舉首登龍虎榜，十年身到鳳凰池。

古今詩話：張唐卿進士第一人，登科期集興國寺，題句子壁，有人續云：君看姚擘并梁固，不得朝官未可知。後果終于京官。

楊察

察字隱甫成都人景祐元年進士歷官知制誥翰林學士權御史中丞端明殿學士戶部侍郎三司使卒贈禮部尚書有集

別信州席上作

十二天辰數今宵席客盈位如星占野人若月分卿極醉巫山側聯吟嶰管清他年為舜牧協力濟蒼生

東軒筆錄楊侍郎謫信州及召還有士子十二人送于境上

察即席賦詩皆用十二事而引論精切士子無能屬和者

鄭伯玉

伯玉字寶臣莆田人景祐元年進士撫州觀察推官韓魏公薦為殿中侍御史有錦囊集

和王太傅游國清塘

寒日一觀眺四天雲色稀水風迎棹起沙鳥背人飛玉縷鱸新膾金膏蟹正肥斜陽促歸旆那得戀漁磯

莆陽文獻

何郊

郊字聖從成都人景祐元年進士累遷殿中侍御史歷龍圖閣學士出知外郡熙寧中以尚書右丞致仕卒有廬江文集

郊氏聞見錄文略公知成都喜行樂有飛語至京師御史何郊字聖從蜀人上遣察之張少愚謂公曰無足慮西迎謁聖從于

漢州有妓善舞聖從喜之問其姓曰楊聖從曰所謂楊臺柳也少愚取妓幘題詩云蜀國佳人號細腰東臺御史惜妖嬈從今

曠作穆望。舞盡春風。萬萬條。數日。聖從至成都。頗嚴重。游公一日宴聖從。迎妓歌前詞。以勸酒。聖從每爲之醉。竟無所問。

益州學聖訓堂詩

益爲藩捍西南隅。物衆地大稱名都。擇守來頒茲土政。治人頗與他邦殊。差跌一有戾條教。便宜皆得行。黥誅羣姦帖息不敢動。無復弄兵覬穿窬。任威或謂一時事。立政恐非長世圖。豈無達識究是否。重在改作徒嗟呼。仲翁文翁字裔孫有偉度。敢決不以常文拘。當官勇欲除弊法。伊憂內惻仁心孚。視人無異遠方意。威行惠政還相須。始時歲荒力賑救。坐使餓殍成完膚。旣而爲俗思根本。其在立學陳師謨。大開儒庠務誨導。秀民聳募紛來趨。遂言謂署鴻生職。使演經傳諸徒。奏函一上聞法座。詔劄卽日來。諧僉詔云信汝辦治蜀。緩任威罰先文儒。公心感激侈上賜。刻在金石尊神謨。覆之大廈勝美稱。日久傳著期無渝。邦人乘風爲盛事。觀者填道來于于。吁嗟多士其聽命。勿卽邪徑安夷塗。師無訛聖生率教。信尙姬孔尊。唐虞施之鄉邦。勵雅俗。仁誼得以相持扶。漢皇初始盛文學。起自蜀國行中區。本朝教化視三代。建元安可爲齊驅。吾君訓辭諭萬里。義均盤誥茲宣敷。吾守教本樹一國。學盛洙泗相涵濡。臣謀君從協大義。聖哲倡和眞同符。欲歌盛節示萬古。才不逮志嗟其愚。成都文類

程師孟

師孟字公闢。吳人。景祐元年進士。累官知廣州。召爲給事中。充直賢殿修撰。判都水監。出知越州。青州。授光祿大夫致仕。

寒食遊九仙烏石二山

城中無事喜尋山，千里提封並海寬。賓客相從筵既冷，士民同出食猶寒。芳園病葉堆何限，古院閑花落幾般。誰道異鄉多感慨，登臨遲卻十年官。淳熙三山志。

楓橋寺

門對雲山畫不如，師今一念六年居。邇來寺好尤瀟灑，張繼留題內翰書。自注：今禹玉王內翰丁太夫人憂，親寫是詩，故不題名。

遊楓橋偶成

晚泊橋邊寺，迎風坐一軒。好山平隔岸，流水漫過門。朱舫朝天路，青林對郭村。主人頭似雪，怪我到多番。以上吳郡志。

遊玉尺山寺

永日清陰喜獨來，野僧題石作吟臺。無詩可比顏光祿，每憶登臨卻自回。福州府志。

次韻元厚之少保留題朱伯原祕校園亭

碧瓦春城十萬家，可憐夫子獨堪嗟。園林猶有前朝木，冠蓋難尋故主花。園乃錢氏所創。亭瞰夕陽鄰古刹，池通野水見晴沙。天然操尚無塵滓，合住蓬萊弄綵霞。蘇州府志。

丁寶臣

寶臣，字元珍，常州晉陵人。景祐元年進士，歷祕閣校理，同知太常禮院，出倅永州。

和永叔新晴獨游東山

芳辰百五前。選勝到林泉。萬樹綠初染。羣花紅未然。陰巖猶貯雪。暖谷自生烟。婦汲溪頭水。人耕草際田。日中林影直。風靜鳥聲圓。健令多情甚。尋春最占先。瀛奎律髓

五洩山

路緣蘿鳥蔭杉松。翠碧丹崖不計重。天作錦屏環十里。僧開珠屋面千峯。花間越鳥鉤輶語。溪外秦人彷彿逢。早晚車騎到林下。籃輿暇日待追從。越詠

題翠巖亭

諦看軒窗面翠微。暫來登此已忘機。地連佛寺樓臺古。泉落山田稻蟹肥。曉徑忽穿清氣入。夜船多載白雲歸。世人誰識紅塵外。終老功名未拂衣。惠山古今考

柳永

永字耆卿。初名三變。崇安人。景祐元年進士。爲屯田員外郎。以樂章擅名。有兄三復。三接。皆工文。號柳氏三絕。

藝苑雌黃。柳三變喜作小詞。薄於操行。當時有謗其才者。上曰。得非填詞柳三變乎。曰然。上曰。且去填詞。由是不得志。日與儇子縱遊。倡館酒樓間。無復檢率。自稱云。奉聖旨填詞柳三變。

獨醒雜志。柳耆卿風流俊邁。聞于一時。既死。葬于棗陽縣花山。遠近之人。每遇清明日。多載酒肴。飲于耆卿墓側。謂之弔柳會。

方輿勝覽范蜀公嘗曰仁宗四十二年太平鎮在翰苑十餘載不能出一語歌詠乃于書卿詞見之仁宗嘗曰此人任從風前月下淺斟低唱豈可令仕宦遂流落不偶卒于襄陽死之日家無餘財羣妓合金葬之于南門外每春月上冢謂之弔柳七

贈內臣孫可久

故侯幽隱直城東。草樹扶蘇一畝宮。曾珥貂璫爲近侍。卻餘條褐作閑翁。高吟擁鼻詩懷壯。雅論盱衡道氣充。厭盡繁華天上樂。始將蹤蹟學冥鴻。青箱雜記

中峯寺

攀蘿躡石落崔嵬。千萬峯中梵室開。僧向半空爲世界。眼看平地起風雷。猿偷曉果升松去。竹逼清流入檻來。旬月經遊殊不厭。欲歸回首更遲迴。建寧府志

霽海歌爲曉峯鹽場官作

霽海歌憫亭戶也。

霽海之民何所營。婦無蠶織夫無耕。衣食之源太寥落。牢盆鬻就汝輸征。年年春夏潮盈浦。潮退刮泥成島嶼。風乾日曝鹹味加。始灌潮波壩成滷。滷濃鹹淡未得閑。採樵深入無窮山。豹蹤虎跡不敢避。朝陽出去夕陽還。船載肩擎未遑歇。投入巨竈炎炎熱。晨燒暮爍堆積高。才得波濤變成雪。自從滌滷至飛霜。無非假貸充餼糧。秤入官中得微直。一緡往往十緡償。周而復始無休息。官租未了私租逼。驅妻逐子課工程。雖作人形俱菜色。霽海之民何苦辛。安得母富子不貧。本朝一物不失所。願廣皇仁到海濱。甲兵淨洗征輸輟。君有餘財罷鹽鐵。太平相業爾惟鹽。化作夏商周時節。大德昌國州志

句

分得天一角。織成山四圍。題會景亭。會稽志。

馬 遵

遵字仲塗。樂平人。景祐元年進士。由臺諫轉吏部員外郎。直龍圖閣卒。

隱居詩話。馬遵謫守宣州。及其去也。郡僚軍民爭欲駐留。至以鐵鎖絕江。遵于錢筵倚醉。令官妓剝榷實而食。眷眷若留連狀。夜使人絕鎖解舟。以水沃槽牙。使之不鳴。連曉舟去遠矣。

再入臺作

連蹇多年心欲灰。厭爲俗吏走塵埃。豈知黃紙新書下。還送青氈舊物來。武騎強爲終不意。河南難問媿無才。一麾早晚江湖去。相與持螯共酒杯。饒州府志。

呂 璿

璿字季玉。晉江人。景祐元年進士。歷官光祿卿。

威惠廟 陳元光父子有功子國而史闕焉。

當年平賊立殊勳。時不旌賢事忍聞。唐史無人修列傳。漳江有廟祀將軍。清源文獻。

仲 訥

訥字樸翁。定陶人。景祐元年進士。歷尚書屯田員外郎。有集。

負暄閑眠

茅簷晴日暖於春。一枕鈞天樂事新。滿眼繁華皆得意。午眠安穩卻無人。宋文鑑

送唐子方

力犯雷霆衆共危。遠投魍魎獨爲宜。忠州學業眞無負。高廟神靈固有知。自倚聖明容直道。未甘憔悴死荒陲。滿朝卿相多公議。莫把文章作楚辭。事類文聚前集

楊諤

諤梓州人。景祐元年進士。

和燕龍圖海棠

西漢欺盧橘。東陽愛海棠。許昌奇此遇。子美欠先揚。杜宇三春節。蠶叢一國香。燕脂點亂雨。生色麗斜陽。富豔東君主。暄妍白帝方。錦樓移水色。玉壘換山光。風格林檎細。腰支郁李長。天生笑容質。時樣舞衣裳。少吐深深染。全開淡淡妝。烟媒護綠蒂。風陣損朱房。旋失因臨水。閑飄弗過牆。佩亡愁殺甫。簪脫卽連姜。蝶舞菱花照。鶯啼罨畫堂。仙如弄玉少。墜似綠珠常。不見還成悔。相思幾欲狂。春深濯錦水。日晚浣紗坊。臥對移簾押。吟看近筆牀。池清滿園倒。鳥起一枝昂。紫燕銜泥急。黃蜂趁蜜忙。化工眞用意。銷得與攜觴。海棠譜

句

願前明主席。一問洛陽人。省試宣室受釐。行人問宮殿。耕者得珠璣。題驪山。中山詩話。草不驚皇轍。山能護帝

輿。省試蒲車。溫公詩話。

吳中復

中復字仲庶興國永興人進士及第累官殿中侍御史歷龍圖閣直學士出知成都

遊海雲寺唱和詩并序

成都風俗歲以三月二十一日遊城東海雲寺摸石於池中以爲求子之祥太守出郊建高旗鳴笳鼓作馳騎之戲大讌賓從以主民樂觀者夾道百重飛蓋蔽山野謔嬉笑之聲雖田野間如市井其盛如此渤海吳公下車期月簡肅無事從俗高會于海雲酒既中顧謂寮屬曰一觴一詠古人之樂事也首作七言詩以寫勝賞席客亦有以詩獻者更相酬和得一十三篇乃命幕下吏會稽王霽爲之序錦里風光勝別州海雲寺枕碧江頭連郊瑞麥青黃秀遶路鳴泉深淺流彩石池邊成故事茂林坡上憶前遊自注子昔陪樞密田公遊此綠樽好伴衰翁醉十日殘春不少留

歲華紀麗譜三月二十一日出大東門宴海雲山鴻慶寺登衆春閣觀摸石蓋開元二十三年靈智禪師以是日歸寂邦人敬之入山遊禮因而成俗山有小池士女探石其中以占求子之祥

成都西園十詠存三首

西樓

信美他鄉地登臨有故樓清風破大暑明月轉高秋朝暮岷山秀東西錦水流賓朋逢好景把酒爲遲留

方物亭

草木蟲魚部披尋自古無飛沈天產異生植土風殊物色隨心匠形容記績圖虛亭玩真意浩思滿江湖

流杯亭

結客乘公暇。流觴逐浩歌。亂峯晴倒影。曲水宛迴波。小海逢元已。蘭亭記永和。西州行樂事。應比晉賢多。
以上成都文類。

江左謂海棠爲川紅

靚妝濃淡藁蒙茸。高下池臺細細風。卻恨韶華偏蜀土。更無顏色似川紅。尋香只恐三春暮。把酒欣逢一笑同。子美詩才猶閣筆。至今寂寞錦城中。
海棠譜。

寄題錢公輔衆樂亭

賢侯新葺水雲鄉。虛閣崢嶸綠渺茫。波面長橋步明月。人家疎影帶殘陽。風中白鳥侵烟去。雨後紅蕖擁袖香。從此郡圖添故事。歲時遺愛似甘棠。
延祐四明志。

覽齊山陳鴻斷碑

翠琰何年沈朽壤。羨師尋訪得其餘。應同湘水斷碑字。難辨韓陵片石書。汨沒身名眞夢幻。變遷時序易工墟。收藏且作山中物。莫問陳鴻紀事初。
齊山詩集。

陳薦

薦字彥升。邢州沙河人。舉進士。神宗朝。累官龍圖閣直學士。河北都轉運使。進資政殿學士。提舉崇福宮。卒贈光祿大夫。

子房廟

博浪沙頭觸副車。潛游東夏識眞符。風雲知略移秦鼎。星斗功名啓漢圖。商老已來寧少海。赤松還約訪仙都。雍容進退全天道。凜凜高風萬古無。

燕子樓

僕射新阡狐兔遊。侍兒猶住水邊樓。風清玉簾慵敲枕。月好珠簾懶上鉤。寒夢覺來滄海闊。新詩吟罷紫蘭秋。樂天才思如春雨。斷送殘花一夕休。

桐江詩話。陳舍人彥升有彭城八詠。爲人所稱。多以燕子樓爲絕倡。殊不知子房廟詩最爲警絕。彥升高祖廟詩云。塵靜山川狂鹿走。雷驚天地老龍飛。范增墓詩云。忿失壯圖撞玉斗。豈知天命與金刀。皆佳句也。八詠今不傳于世。惜哉。

劉述

述字孝叔。湖州人。景祐三年進士。歷荊州湖南北京西路轉運使。神宗立。召爲侍御史。忤王安石。謫江州。提舉崇禧觀。卒。紹興初。贈祕閣修撰。

仙巖洞禱雨令諸暨時作

英英洞口雲。觸石纔一縷。須臾徧空山。霈然作霖雨。會稽志。

五洩山

翠屏千疊水潺湲。一簇青鷄杳靄閒。惜是晚年逢此景。悔將前眼看他山。瀑飛蘿磴終難畫。龍蟄崑雲只暫閑。薄宦勞人無計住。明朝歸去又塵寰。越詠。

題竹閣

竹閣寒相倚。雲窗晚共開。閑身方外去。幽鳥靜中來。聲響風隨籟。陰移石上苔。遲留更清夜。待月露盈杯。
嚴州府志

葛密

密字子發。江陰人。宮弟。官太常博士。

近造浮屠之悟空者。覩君謨省主給事留題詩板。列楣棟間。粲然可誦。因撫方袍之意。成拙句以寄昔年詩板。著蓮宮筆力。雄豪墨彩。豐不日三階平國政。山僧應待碧紗籠。
蔡忠惠公集附

元積中

積中。錢唐人。景祐初。黃巖令。熙寧初。爲司封郎中。直史館。知桂州軍。有江湖堂詩集。

題桐柏觀

九峯巍絕亂雲屯。石室瓊臺舊址存。山險密盤之字徑。洞深高闢丙方門。碧桃花爛春溪暖。紫玉簫沈月榭昏。未覺仙家光景晚。人間歸去見來孫。
赤城志

董淵

長樂令

靈峯院龍龕山和蔡君謨

礪砢彌沙界。崕嶸古洞天。門鄰金布地。橋枕玉鳴泉。庭鶴歸迷主。龕龍去失年。掃雲嫌俗駕。題壁詫詩仙。
勝景無今古。居人有後先。不知遊者馭。誰見海爲田。
蔡忠惠公集附

劉嗣隆

嗣隆、仁宗朝。以尙書職方員外郎知袁州。

宜春臺

一簇亭臺畫亦難。公餘到此幾盤桓。山高不似城中景。樹密尤宜雨後看。風送江聲穿郡郭。日推雲影下峯巒。當時吏部曾遊否。何事無文石上刊。袁州府志。

宋詩紀事卷十四

錢唐厲鶚緝

祁門馬曰璐同緝

蘇舜欽

舜欽字子美其先梓州人家開封易簡孫蒼子舜元弟景祐中進士累遷集賢校理監進奏院坐用故紙錢除名居蘇州買水石作滄浪亭以自適終湖州長史卒有滄浪集

書舊續聞蘇子美監奏邸舊例鬻故官券以賽神因而宴客獨李定不預遂搆摭其事言于中丞王拱辰御史劉元瑜迎合時宰之意興奏邸之獄一時英雋斥逐殆盡有一網打盡之語故梅聖俞有詩云一客不得食覆鼎傷衆賓蓋指李定也

王直方詩話子美嘗作春睡詩云身如蟬蛻一榻上夢似楊花千里飛歐公見之驚曰子美可念未幾果卒

淮中晚泊犢頭

春陰垂野草青青時有幽花一樹明晚泊孤舟古祠下滿川風雨看潮生

夏意

別院深深夏簾清石榴開遍透簾明樹陰滿地日卓午夢覺流鶯時一聲

王直方詩話。黃山谷最愛此。
二詩累書之。或真草。或大字。

送人歸吳江

江雲春重雨垂垂。索莫情懷送客歸。不慣東流促迴棹。羨他雙燕逆風飛。

天平山

吳會括衆山。戢戢不可數。其間號天平。突兀爲之主。傑然鎮西南。羣嶺爭拱輔。吾知造物意。必以屏大府。清溪至峯前。仰視勢飛舞。偉石如長人。肅立欲言路。捫蘿緣險磴。爛漫松石古。中腰有危亭。前對翠峯舉。石竇迸玉泉。泠泠四時雨。源生白雲間。顏色若粉乳。旱年或播灑。潤可足九土。柰何但澄澈。未爲應龍取。予方棄塵中。巖壑素自許。盤桓擇勝處。至此快心膂。養內聊自清。終勝甘於虎。

過蘇州

東出盤門刮眼明。蕭蕭疎雨更陰晴。綠楊白鷺俱自得。近水遠山皆有情。萬物盛衰天意在。一身羈苦俗人輕。無窮好景無緣住。旅櫂區區暮亦行。

獨步滄浪亭

花枝低敲草生迷。不可騎入步是宜。時時攜酒只獨往。醉倒惟有春風知。

石林詩話。姑蘇州學之南。積水彌數十頃。傍有小山。高下曲折。相望蓋錢氏時廣陵王所作。既積土爲山。因以爲池。瀦水焉。瑞光寺卽其宅。而此其別圃也。廢歷間。子美謫廢。以四十千得之。爲居。傍水作亭。曰滄浪。歐陽公詩。所謂清風明月本無價。可惜

只賣四萬錢者是也。子美既死，其孤不能保，遂屢易主矣。

茗溪漁隱叢話：此詩真能道幽獨閑放之趣。

長橋觀魚

曙光東向欲龐明，漁艇縱橫映遠汀。濤面白烟昏落月，嶺頭殘燒混疎星。鳴榔莫觸蛟龍睡，舉網時聞魚鼈腥。我實宦遊無況者，擬來隨爾帶笭簦。

茗溪漁隱叢話：元次山集自釋云：帶笭簦而畫船。注云：上郎丁，下桑荒切，竹器也。故唐書音訓云：讀作郎桑。見結本集音訓。又音上力丁，下息拯切，取魚籠也。然廣韻集韻于庚、清、青三韻皆不收此笭字，並于上聲迥字韻中收之。蘇子美、黃魯直、秦少遊

皆于青字韻

中押真諛也。

秋日登閭門

年光冉冉催人老，雲物涓涓又變秋。家在鳳凰城闕下，江山何事苦相留。以上滄浪集。

古今詩話：子美自書此詩，旁云：江山留人也。人留江山也。卒不用亦詩之識。

南園：南園，吳越廣陵王元璩之舊園也。歲久摧圯，至元豐中，猶有流杯四照百花樂堂、惹雲風月等處。

西施臺下見名園。百草千花特地繁。欲問吳王當日事。後來桃李若爲言。吳郡志。

句

玉帳夜嚴冰似水。茅齋春靜草如烟。窮居和長安帥葉清臣見寄。 西清詩話。

江休復

休復字鄰幾。開封陳留人。舉進士。充集賢校理。坐與蘇舜欽祠神會飲。謫監蔡州稅。久之。復官。歷刑部郎中。修起居注。卒。有集。

詩話總龜。江鄰幾善爲詩。清淡有古風。蘇子美坐進奏院事謫官。後死吳中。江作詩云。郡邸獄冤誰與辨。臯橋客死世同悲。用事精當。嘗有古詩云。五十踐衰境。如我在明年。江天資淳雅。喜飲酒。鼓琴圍碁。人以酒召之。未嘗不醉。或不能歸。即宿人家。商度風韻。陶靖節之比云。江嘗通判廬州。有酒官善琴。以坐職不得出。江且且就之。郡中沙門道士。及里畝能碁者數人。呼與同往。郡人見之習熟。因畫爲圖。前列趨道。一人騎馬青蓋。其後沙門道士。褐衣數人。葛巾芒屨。累累相尋。意思蕭散。惜時無名手。此畫不足傳後。何減稽阮也。

歐陽公序云。鄰幾學問通博文。詞雅正。詩尤清淡。閑肆可喜。

秋懷

西風萬里至。曠然天地秋。暮雨生夕涼。百蟲鳴啾啾。楚山曉蒼蒼。楚水亦悠悠。騷人試登臨。感物增離憂。

所思在遐方。欲往路阻修。香草有蕙茝。嘉樹有梧楸。白露委芳馨。彫零使我愁。窮年倦羈客。江湖思舊遊。級蘭製芰荷。飄泛一葉舟。肆情雲水間。意適何所求。

同持國宿太學官舍

翳翳雲月薄。泠泠雪風清。學省夜岑寂。天街斷人行。廣庭層閣陰。尋廊步餘明。松篠遞遙響。如聞弦誦聲。悠悠子佩詩。講座塵埃生。迴就直舍休。亶亶談道精。心會境物融。泯然遺世營。寒眠屢展轉。寤言寫素誠。
以上宋文鑑。

王官谷司空侍郎故居

首陽采薇士。商代緬以遐。唐季有夫子。遯世肥且嘉。拔迹離污險。抗志凌青霞。剝運扇頽風。姦雄比回邪。不然隨波流。橫噬猥獠牙。吁哉士德衰。睽乖鬼盈車。英英夫子賢。顯晦吾所嗟。相見棲隱情。遺文纂菁華。山藏白駒谷。水遶騷人家。躊躇碧峯前。寒日忽以斜。
王官谷集。

李絢

絢字見素。邛州依政人。第進士。仕爲太子中允。宰相杜衍拔爲臺省。坐讒出知潤州。累遷起居舍人。權判吏部流內銓卒。

送天柱馮先生

閑馳風馭恣飄飄。因失仙班幾度朝。紫閣舊鄰秦樹老。赤城新別海山遙。飛鳧又說春經嶽。叱橘曾令夜探潮。不是桃源不歸去。故人多半在烟霄。
洞霄詩集。

句

收得桑榆歸物外。種成桃李滿人間。和杜相。歷代吟譜。

王益柔

益柔字勝之。曙子。仁宗朝。用蔭至殿中丞。除集賢校理。坐蘇舜欽奏邸獄。黜監復州酒。累遷知制誥。兼直學士院。以祕書監出知外郡。

遙題錢公輔衆樂亭

四明舊說南湖好。歲久瀕厓變涂潦。建旗一日得賢侯。千里山川真再造。偃月隄成車馬道。湖光如截天如抱。鴛鴦瓦影亂。鳧鷖綠柳環。隄花映島珠。宮貝闕。競來還。泉客蛟人爭獻寶。春風浩蕩波濤起。髣髴仙人騎赤鯉。金盤下箸飽鱸魚。塵事茫茫隔烟水。都人士女從如雲。絲竹清音兩岸聞。飲酣落筆歌綠水。爛漫天葩飄遠芬。延祐四明志。

張羣

羣仁宗朝太常少卿

謫袁州道中寄蘇子美

憶昨共繫吳門舟。我獨千里君獨留。江花粲爾不同醉。野月娟然增此愁。談笑還令舌本強。詩篇頓覺筆鋒柔。滄浪書信無消息。鴻雁來時數舉頭。袁州府志。

鮮于侁

侁字駿閩中人景祐中進士乙科慶歷中遷祕書丞神宗朝爲利州路轉運使元祐初拜左諫議大夫出知陳州卒紹聖間與黨籍有諫議集

郡齋讀書志侁治經術有法論著多出新意

晚年爲詩與楚詞尤工人以爲有屈宋風

新堂夜坐月色皎然由連理亭信步庭中徘徊久之因爲五言一首

秋風動微涼。天雨新霽後。閑齋獨隱几。明月在高柳。振衣步庭下。顯氣入襟袖。天空雲漢明。隱約辨列宿。蒼蒼松檜上。零露霏欲溜。脫葉滿閑園。繁華迨衰朽。清宵望蟾彩。宜付一杯酒。多病謝尊壘。城頭轉寒漏。
宋文鑑

舜祠

道歷山兮透蛇。思古人兮感慨。並儲胥兮肅止。仰魯雲兮晻曖。默何鳴兮林中。鳥何悲兮山上。木何爲兮不翦。草何爲兮茂暢。帝之神兮在天。帝之德兮在人。物具兮四海。心精兮一純。采秀實兮山間。摘其毛兮澗底。玉醴湛兮瓊茅。肴脩雜兮蘭茝。樂備兮九奏。鳳舞兮儀韶。人駿奔兮如在。君卒享兮神交。兗州府志

和文與可洋州園池

千峯起華陽。一水連天漢。初月正沈鉤。隱然飛兩岸。湖橋

城上望南園。園深知幾許。啼鳥聞開關。遊人不知處。南園

琴躋積翠外。絺結穹窿間。軒檻最佳處。四顧唯江山。二樂樹

春歸闔風家。巧入天匠手。能將五色雲。點綴當戶牖。披錦亭。陝西通志。

呂 溱

溱字濟叔。揚州人。寶元元年進士第一。累擢知制誥。知杭州。拜翰林學士。神宗朝。官至樞密直學士。提舉醴泉觀。卒。贈禮部侍郎。

米芾書呂溱事云。溱為人簡倨。每接賓客。不過數言。時人目為七字舍人。

句

九霄離海嶠。一夕過天池。試鯤化為鵬。

東都事略。仁宗見此句。曰。此當作狀元。升為第一。

范 鎮

鎮字景仁。華陽人。居洛陽。寶元元年舉進士。為禮部第一。累知制誥。英宗立。遷翰林學士。神宗朝。歷端明殿學士。提舉崇福宮。封蜀郡公。卒。諡忠文。有集。

東都事略。鎮為文清麗簡遠。少時嘗賦

長嘯卻胡騎。流傳契丹。謂鎮為長嘯公。

迂叟詩話。范景仁喜為詩。年六十三致仕。一朝思鄉里。遂輕行入蜀。故人呂才元大臨知梓州。景仁枉道過之。歸至成都。日與鄉人樂飲。散財于親舊之貧者。遂遊峨嵋青城山下巫峽。出荆門。凡期歲。乃還京師。在道作詩凡三百五篇。其一聯云。不學鄉

人誇駟馬未饒吾祖泛扁舟。此二事他人所不用也。

仲遠龍圖見邀學射之遊先寄五十六言

幾年魂夢寄西州。春晚歸逢學射遊。十里香風塵不動。半山晴日雨初收。指攜武弁呈飛騎。次第紅妝數勝籌。夾道綺羅瞻望處。管弦旌旆擁遨頭。

送羅勝卿同年提舉玉局觀

匹馬西歸去。知君得意偏。人情重鄉里。官職更神仙。曉後無衙喏。句頭有俸錢。何須駕白鶴。辛苦上青天。
以上成都文類。

送張職方守筠州職方名正。子公紀亦守衢州。

南國一麾守。知公安此行。家山雖萬里。子舍只鄰城。驛問中宵至。風謠接眇聲。定應持課最。同命到天京。
方輿勝覽。

七夕

翠幙瑤梯百尺樓。樓前星斗自悠悠。天家仙會能多少。未到平明已別愁。
合璧事類前集。

再至史局

史局逾年別。重來已涕零。先書未絕筆。又欲汗新青。

合璧事類後集。范蜀公少與柳耆卿同年。愛其才美。聞作樂章。嘗歎曰。纒其用心。謝事之後。親舊聞盛唱柳詞。復歎曰。仁廟四十二年。太平。吾身爲史官二十年。不能贊述。而耆卿能盡形容之。

黃葵

開時閑淡斂時愁。蘭菊應容預勝流。剩欲持杯相領略。一庭風露不禁秋。合璧事類別集。

韓太丞同守成都

春色草將深。春寒柳未陰。青天指行棧。綠水蕩離襟。後乘何爲託。前旌喻此心。南枝倦飛翼。憑爲寄歸音。
全蜀藝文志。

雞鳴臺 在靈寶縣南。齊田文客許雞鳴度關處。今人築臺。

古人惟恃衆心城。何事秦皇苦好兵。本設函關禁姦詐。不知夜半有雞鳴。河南通志。

和王都尉

慣乘霄漢鶴。翻說淤泥蓬。可惜玉臺處。等閑闌幾年。

式古堂書考。王晉卿跋云。公不喜釋氏。故有是句。亦可一笑也。又云。余前年恩移清潁道。出許昌。前途小阻。留西湖之別館者。幾一月。常與韓持國范景仁泛舟嘯詠。使人頓忘去國流離之恨也。韓公德性溫厚。風度高雅。固已可愛。范公雖老。而精神不衰。議論純正。白須紅面。動輒醺酣。時余有所賦詠。公即取紅蓮葉命筆疾書。初不經思。佳詞麗句。頃刻而成。坐客莫不驚歎也。比聞朝廷就除端明殿學士。以寵之。因思方今進任老成。如公者。若再起之。亦足以厚風俗耳。

蘇 絨

絨字宣甫。晉江人。紳從弟。寶元元年進士。知邕州。儂寇至。嬰城以守。城陷自焚死。贈奉國軍節度

使。諡忠勇。

英德碧落洞

此洞誰開鑿。難窮造化原。地幽疑窟室。巖透若天關。巖石高低路。樵聲裏外村。雲嵐青欲滴。烟壁翠堪捫。一帶谿泉急。千枝石乳繁。鼠飛猶白晝。虎嘯近黃昏。老木吟風韻。枯崖滲雨痕。碧瀾秋寸寸。寧負羽皇言。
清源文獻。

司馬光

光字君實。陝州夏縣人。以父池任入官。寶元初。進士甲科。累除知制誥。改天章閣待制。知諫院。英宗朝。除龍圖閣直學士。改右諫議大夫。神宗卽位。擢翰林學士。判西京留司御史臺。拜資政殿學士。哲宗卽位。拜左僕射兼門下侍郎。薨于位。贈太師。溫國公。諡文正。有傳家集。

澠水燕談。司馬文正公。高才全德。大得中外之望。公之退。十有餘年。天下日冀其復用。故子瞻獨樂園詩曰。先生獨何事。四海望陶冶。兒童誦君實。走卒知司馬。蓋紀實也。

孤臣泣血錄。金人入汴。駐青城。索監書藏經。如資治通鑑。蘇黃文集之屬。皆指名取索。當時朝廷行下。諸路盡毀坡谷著作。姦黨傳會。至欲焚資治通鑑。賴有神宗御製序文。不敢毀。而敵國之敬重顧如此。

侯鯖錄。司馬文正公言行俱高。然亦每有謔語。嘗作詩云。由來獄吏少和氣。臯陶之狀如削瓜。

困學紀聞。司馬公早朝詩。太白明如李。出漢天文志。癸惑踰歲星。居其東北半寸所。如連李又卽事云。雨不成遊布路歸。出左傳。自朝布路而罷。今集皆注云恐誤。蓋不考也。

謝孫興宗惠草蟲扇

吳僧畫團扇，點綴成微蟲。秋毫宛皆具，獨竊天地功。細者及蛛蝥，大者纔阜螽。枯枝擁寒蛸，黃蘂黏飛蜂。翾然得生意，上下相追從。徒觀飛動姿，寧觀筆墨蹤。兒曹取真物，細校無不同。恐其遂躍去，亟取藏箱中。乃知藝無小，意精神可通。不與誤圖蠅，能感紫髯翁。子猷狀蟬雀，藏本傳河東。不知古何如，此畫今人雄。僧亡已久，其徒頗能工。舊法存百一，要足超凡庸。友人幸爲賜，物薄意何隆。玩之不替手，愛重心無窮。常如對君子，穆穆來清風。

送張兵部中庸知遂州

劍嶺橫天古棧微，相如重駕傳車歸。雙親倚門望已久，千騎踏雪行如飛。人間富貴非不有，似君榮耀世亦稀。聞道西州遺像在，使我涕泗空霑衣。先人知小溪縣，正版籍均賦役，聞邑人誦之，畫像猶存。

衆樂亭在鄆縣西湖中，錢公倚所建。

橫橋通廢島，華宇出荒榛。風月逢知己，湖山得主人。使君如獨樂，衆庶必深嚮。何以知家給，笙歌滿水濱。

送章伯鎮知湖州

江外饒佳郡，吳興天下稀。蓴羹紫絲滑，鱸膾玉花肥。星斗寒相照，烟波碧四圍。柳侯還作牧，草樹轉清輝。

皇后閣春帖子

慶壽風烟接未央，飛樓複道鬱相望。春來無以消長日，閑取經書教小王。

夫人閣春帖子

聖主終朝視萬機，燕居專事養希夷。千門永晝春岑寂，不用車前插竹枝。以上傳家集。

詩林廣記司馬公此帖亦皆寓諷勸之意。

始至洛中言懷

三十餘年西復東，勞生薄宦等飛蓬。所存舊業唯清白，不負君恩有樸忠。早避喧煩真得策，未逢危辱好收功。太平觸處農桑滿，贏得闔闔鶴髮翁。

石林詩話溫公熙寧間自長安得請留臺而歸作。

過堯夫天津居

草輦波清沙路微，手攜筇杖著深衣。白鷗不信忘機久，見我猶穿柳岸飛。

聞見前錄公判西京留司御史臺遂居洛買園于尊賢坊以獨樂名之嘗謂康節曰光陝人先生衛人今同居洛卽鄉人也。有如先生道學之尊當以年德爲貴官職不足道也。一日著深衣自崇德寺書局散步洛水隄上因過天津之居謁曰程秀才云。既見溫公也問其故笑曰。司馬出程伯休父故曰程。

耆英會

洛下衣冠愛惜春，相從小飲任天真。隨家所有自可樂，爲具雖微誰笑貧。不待珍羞方下筯，只將佳景便

娛賓。庾公此興知非淺。藜藿終難作主人。

作真率會。伯康君從七十八歲。安之七十七歲。正叔七十四歲。不疑七十三歲。叔達七十歲。光六十歲。合五百一十歲。口號成詩。用安之前韻。

七人五百有餘歲。同醉花前今古稀。走馬鬪雞非我事。紵衣絲髮且相輝。
經春無事連翩醉。彼此往來能幾家。切莫辭斟十分酒。儘從他笑滿頭花。以上洛中耆英會詩。

和景仁卜居許下。景仁頃見許居洛今而倍之。故詩頗致其怨。

壯齒相知約歲寒。索居今日鬢俱斑。拂衣已解虞卿印。築室何須謝傅山。許下田園雖有素。洛中花卉足供閑。他年決意歸何處。便見交情厚薄間。合璧事類別集。

次韻謝杜祁公借觀五老圖

脫遺軒冕就安閑。笑傲丘園縱倒冠。白髮憂民雖種種。丹心許國尙桓桓。鴻冥得路高難慕。松老無風韻自寒。聞說優遊多唱和。新篇何惜畫圖看。鐵網珊瑚。

句

烟曲香尋篆。杯深酒過花。明道雜志。

石揚休

揚休字昌言。眉山人。舉進士。歷刑部員外郎。知制誥。同判太常寺。遷工部郎中。卒。鷲按。司馬溫公詩自注云。釋褐昌言。除同州推官。光華州判官。是與溫公同年也。

東都事略揚休喜閑放平居養猿鶴
收圖書以自適工于詩什世稱其才

謝文瑩師攜琴見訪

鄭衛湮俗耳正聲追不回誰傳廣陵操老盡嶧陽材古意爲師復清風尋我來幽陰竹軒下重約月明開

湘山野錄皇祐間館中詩

筆石揚休最得唐人風格

海棠

開盡妖桃落盡梨淺萼深萼照華池都緣西蜀盤根遠豈是東君屬意遲烟慘別容醺宿酒露凝啼臉溼
臙脂須知賈相風流甚曾許神仙品格奇

海棠譜

呂公著

公著字晦叔夷簡子舉進士累遷殿中丞神宗朝官資政殿大學士哲宗卽位拜右僕射兼中書侍郎元祐三年拜司空同平章軍國事薨贈太師中國公諡正獻入黨籍有集

分題得瘦木壺

天地產衆材任材謂之智棟桷與楹杙小大無有棄方者以矩度圓者中規制嗟爾木之瘦何異肉有贅生成擁腫姿賦象難取類隱括所不施鉤繩爲爾廢大匠睨而往惻然乃有意孰非造化功而終朽不器列剔虛其中朱漆爲之僞剝漿挹酒醴施用惟其利犧象非不珍金罍非不貴設之于楹階十目肯注視

幸因左右容。及見爲奇異。人之于才性。夫豈遠于是。性雖有不善。在教之揉勵。才亡不可用。由上所措置。飾陋就其長。皆得爲良士。執一以廢百。衆功何由備。是惟聖人心。能通天下志。宋文鑑

風月堂詩話。歐公居穎上。申公呂晦叔作太守。聚星堂燕集。賦詩分韻。公得松字。申公得雪字。劉原父得風字。魏廣得春字。焦千之得石字。王回得酒字。徐無逸得寒字。又賦室中物。公得鸚鵡螺杯。申公得瘦木壺。劉原父得張越琴。魏廣得澄心紙。焦千之得金星硯。王回得方竹杖。徐無逸得月硯屏風。又賦席間果。公得橄欖。申公得紅蕉子。劉原父得溫柑。魏廣得鳳樓。焦千之得金橘。王回得荔枝。徐無逸得楊梅。又賦壁間畫像。公得杜甫。申公得李文饒。劉原父得韓退之。魏廣得謝安。石焦千之得諸葛孔明。王回得李白。徐無逸得魏鄭公。詩編成一集。流行于世。當時四方能文之士。及館閣諸公。皆以不與此會爲恨。

南窗紀談。歐公稱賞此詩。以爲有宰相器。

呂公弼

公弼字賓臣。夷簡仲子。賜進士出身。歷樞密直學士。知成都府。神宗朝。進樞密使。出知外郡。爲西太一宮使。薨。贈太尉。諡惠穆。

琴臺

煙樹重城側。琴臺千古餘。早爲梁苑客。晚向茂陵居。賦給尙書筆。歸乘使者車。清風靚舊隱。長自聳鄉閭。

巖真觀

卜肆垂簾地。依然門徑開。沈冥時已往。思慕客猶來。鳥啄虛簷壞。狐穿古井摧。空餘舊礧石。歲歲長春苔。
以上成都文類。

趙衆

衆官龍州簽判。與司馬溫公同時。

題倅廳吏隱堂

滿耳江聲滿目山。此身疑不在人寰。民舍古意村村靜。吏束刑書日日閑。方輿勝覽。

張徵

徵字百常。陳留人。寶元元年進士甲科。

自然亭

久雨妨漁復滯樵。自然亭上一逍遙。萬緣不是閑中起。百事唯于睡裏消。老去自知如蟻蠅。病來誰悟似芭蕉。愛名之世忘名客。幸有山林舊市朝。瀛奎律髓。

書故三司副使陳公亞之詩軸後款題元豐三年。

破錦囊開玉振金。舍人胸次右丞心。爲時黼藻衣冠藪。與國丹青翰墨林。慷慨似誰雙舞劍。風流隨處一歌琴。燕貽苦志追先烈。子夏何須論淺深。鐵網珊瑚。

吳充

充字沖卿。建安浦城人。育弟寶元元年進士。熙寧中累遷檢校太傅樞密使。代王安石爲中書門

下平章事監修國史罷爲觀文殿大學士西太一宮使卒贈司空兼侍中諡正獻

聽讀詩義感事時修撰經義所初進二南有旨資政殿進讀

雪銷鳩鵲御溝融燕見殊恩綴上公晝日乍驚三接寵正風獲聽二南終解頤共仰天顏喜牆面才容聖域通午漏漸長知禹惜侍臣何術補堯聰王荆文公詩自注

史院席上作

蘭臺開史局玉帛賜君餘賓友求三事規摹本八書汗青裁做此衰白盍歸歟詔許從容會何妨醉上車

揮塵後錄神宗朝詔修仁英兩朝國史開局日詔史院賜筵時

吳沖卿爲首相提舉二府及修史官就席上成詩沖卿唱首

送張君宰吳江

全吳風景好之子去弦歌夜犬驚宵少秋鱸餉客多縣樓疑海蜃衙鼓答江鼉遙想晨晷下長橋正綠波

明道雜志

題招提院靜照堂

人說招提好師從靜照來親攜玉堂句徐叩華門開好事能如此題詩豈易哉明年得東守繫舸一裘回

至元嘉禾志

遙贈錢公輔

使君新自四明歸邀我同爲衆樂詩山川可愛惜未見晝想夕思心爲罷恍然神遇若有得齋身乃在天

之涯。漲海連空四無岸。天吳卻坐鮫人觀。以手揮弄日月丹。能令桑田變瀾漫。海邊偶到山城中。山城二月多春風。牛羊閑暇夕陽晚。樓閣參差朝霧濃。一泓山溜佛頭綠。環以翠屏風六曲。人烟擾擾事嬉遊。落花啼鳥滿汀洲。中爲臺榭闢十二。上有藻井排文楸。旁人指點此何許。云是四明行樂處。此樂爲民非爲身。始知集賢錢使君。使君風韻誰之比。政事次公詩短李。醉憑熊軾勸耕疇。狂取螺杯翻舞袂。儂愛使君君勿歸。詔書奪去何如爲。閑侍玉皇香案側。銀臺深阻無消息。意迷卻悟坐空齋。忽省君詩昨日來。疊紙爲君書所見。不知衆樂誠然哉。延祐四明志

宋敏求

敏求字次道。綬子。賜進士第。爲館閣校勘。治平中。知制誥。神宗朝。忤王安石。以右諫議大夫奉朝請。尋除史館修撰。集賢院學士。加龍圖閣學士。卒。贈禮部侍郎。有書闈前後集。西垣制辭文集。

史院席上奉和首相吳公元韻

二聖垂鴻烈。天臨四紀餘。元台來率屬。賜會寵刊書。世業叨榮甚。君恩可報歟。衰衣相照爛。歸擁鹿鳴車。揮塵後錄

題招提院靜照堂

叢林起新構。燕坐水雲鄉。本自禪心靜。能令世累忘。幡花圍畫永。鐘梵度宵長。歸緘新篇富。籠紗映寶坊。至元嘉禾志

薛利和

利和字天益興化人寶元元年進士歷知春潮惠三州遷屯田員外郎

謝王介甫

一路生靈陡頓貧廟堂康濟豈無人君侯若問茶租日請把茶租乞與人

莆陽文獻熙寧二年王安石議權茶欲擢利和提舉廣東茶

事利和作詩謝之云云遂就常調通判廣州茶法卒不行

柳應辰

應辰武陵人寶元元年進士仕至尚書都官員外郎永州通判

刻浯溪石上

浯溪石上大江邊心記閑將此地鑿自有後人來屈指四千六百甲寅年

容齋五筆浯溪石上有大押字題云押字起于心心之所記人不能知大宋熙寧十年甲寅歲武陵柳應辰仍有詩云聞中陳思跋云柳都官欲以怪取名者所至留押字盈丈莫知其何爲押字古人書名之草者施于文記以自識別耳今鑿刻廣博

如許已可怪矣好事者謂

能祛逐不祥真大可笑

邵必

必字不疑丹陽人亢從父寶元元年進士官龍圖閣直學士知成都

題錢公輔衆樂亭

海邊民物鮮歡娛。太守經營與衆俱。園圃新陰多杞柳。池塘生意足魚蒲。長空不礙高飛鶴。淺水兼容短脛鳧。此樂有誰知我趣。歸來紅旆日西晡。延祐四明志

裴若訥

若訥、常州江陰人。寶元元年進士。

江陰絕句

紫葺江上是吾家。一葉扁舟一釣車。何必陶公種魚法。雨汀烟渚盡生涯。錦繡萬花谷

宋詩紀事卷十五

錢唐厲鶚緝

祁門馬曰璐同緝

李大臨

大臨字才元成都華陽人寶元元年進士累官祕閣校理神宗朝除知制誥天章閣待制

西園辨蘭亭和韻

沙石香叢葉葉青。卻因聲誤得蟬名。騷人佩處唯荆渚。識者知來徧蜀城。消得作亭滋九畹。便當入室異羣英。非逢至鑒分明說。汨沒人間過此生。成都文類

題招提院靜照堂

地勝常新構。僧閑晝杜門。山林誰樂靜。城市亦非喧。客引空彈指。風來不動幡。祇應常宴坐。對境一無言。至元嘉禾志

謁濂溪周處部

簾前翠靄逼廬山。門掩寒流盡日閑。我亦忘機澹榮利。喜君高躅到松關。廬山志

周孟陽

孟陽字春卿。其先成都人。徙海陵。第進士。英宗朝累官集賢殿修撰。同判太常寺。神宗立。拜天章

張宗永

宗永、華州人。寶元中，知建安縣。

題陳相別業

喬松翠竹絕纖埃，門對寒山盡日開。應是主人貪報國，功成名遂不歸來。

墨客揮犀：宗永嘗以事失鄭州，陳相意，陳公有別業在鄆，杜間，宗永知公好絕句詩，乘閑詣之，于壁大書二韻，莊督錄以聞，公覽而善之，待之如初。

句

大書文字隄防老，剩買峯巒準備閑。倦遊雜錄。

雷簡夫

簡夫，字太簡，郃陽人。康定中，杜衍薦之，以校書郎簽書、秦州觀察判官，累遷尚書職方員外郎。

寄甘露舒公上人

成都多少寺，梵學競推能。到老不破戒，滿城唯此僧。池龍聽夜講，海客施年燈。別後空相憶，塵勞正可憎。成都文類。

元居中

居中，錢唐人。康定中，台州守，至太常少卿。

風水洞上祖龍圖無擇

洞蔽深雲遠俗塵。山中曾未識朱輪。自從白傅來遊後。五百年間又一人。咸淳臨安志。

蘇頌

頌字子容。南安人。紳之子。徙居丹陽。慶歷二年進士。神宗朝。歷集賢院學士。知開封府。哲宗卽位。累遷翰林學士。拜右僕射。兼中書門下侍郎。罷爲集禧觀使。徽宗立。進太子太保。累爵趙郡公。卒。贈司空魏國公有集。

送朱郎中壽昌通判河中

邴風詠凱風。以成孝子志。鄭人復君母。傳稱能錫類。中郎常有懷。生不識所恃。登朝雖厚祿。當食每忘饋。念昔鞠育勞。嗟今出處異。倚門豈不待。兩求終莫致。乳烏思反哺。哀鳴自垂翅。百草搖春暉。寧無謝生意。灑血向穹壤。解組出臺寺。馳驅咸雍郊。歷訪經行地。至行感神明。精誠通夢寐。悠悠大道傍。親息忽相值。紫綬拜北堂。白頭歸長嗣。悲忻敍契闊。恍如隔生事。四紀世路殊。一朝版輿侍。茲事昔未有。聞者共驚喟。帥守爲之言。詔趣還官次。當年二千石。寵名非所利。仕或使鄉關。安用竹符使。蒲中母家近。自屈爲倅貳。受命慰慈顏。騰裝愜歸思。旣徇報德心。亦安效官智。觴以萬壽薦。衣成五綵戲。無復興寒泉。何須賦大隧。令人及聖善。孝慈兩不匱。贈言述高風。庶用激忠義。

次韻蔣穎叔同遊南屏見惠長篇

青山橫蒼蒼。萬石出南麓。古刹表蒼閣。高聲聳羣玉。居惟擇岡巒。近靡數松竹。郡郭路非遙。遊人春不宿。

陟巘極躋攀。循崖勞僂伏。架筒引流泉。跨嶺構重屋。講坐據妙峯。禪堂對枯木。幽尋難屢期。將往誰能獨。偶逢霜臺客。暫駐驄馬足。聯步訪叢林。終朝走郊牧。相期方外遊。頓忘河上曲。夷路喜君騰。高閣暫予束。更聽名理言。俯愜心中欲。況已證眞常。詎止齊寵辱。願言挹清風。可用警浮俗。

贈同事閣使 以下一首使北時作

山路盡陂陁。行人涉險多。風頭沙磧暗。日上雪霜和。草淺鷹飛地。冰流馬飲河。平生畫圖見。不料此經過。

奚山路

出奚山路入中京界道旁店舍頗多人物亦衆

行盡奚山路。更賒路旁時。見百餘家。風煙不改盧龍俗。唐盧龍節度兼押契丹使塵土猶兼瀚海沙。朱板刻旗村肆食。食邸門挂木刻朱旗青氈通幃貴人車。貴族之家車屋通以青氈覆之皇恩百歲加荒憬。物俗依稀亦慕華。

暮春與諸同僚登鍾山望牛首

清明天氣和。江南春色濃。風物正繁富。邦人競遊從。官曹幸多暇。交朋偶相逢。并驅出東郊。乘興遊北鍾。陟險不蠟屐。扶危靡撻筇。上登道林祠。俯觀辟支峯。亂山次阡陌。長江遠提封。蕭條舊井邑。茂盛新杉松。攬物思浩然。懷古心顛顛。念昔全盛時。茲山衆所宗。天都對雙闕。霸業基盤龍。六朝遞興廢。百祀居要衝。人情屢改易。世事紛交攻。當時佳麗地。一旦空遺蹤。唯有出岫雲。古今無變容。

和題李公麟陽關圖

三尺冰紈一絕詩。翩翩車馬送行時。尊前懷古閑開卷。看盡關山遠別離。以上魏公集

和右僕射劉公莘老夜直中書省見寄之什

五年班綴望夔龍。曾託幘幪庇雨風。末路自憐黃髮老。早時曾識黑頭公。升沈不改交情見。出處雖殊趣舍同。謾叩蕪音答高唱。終慚下管應清宮。卻堦編

卽席獻文潞公

高燕初陪聽拊豨。清談仍許奉揮犀。自知伯起難連峭。不及淳于善滑稽。舞奏未終花十八。酒行先困玉東西。荷公德度容狂簡。故敢忘懷去町畦。

春帖

卻堦編熙寧間蘇丞相奉使契丹道過北京時文潞公爲留守燕會款洽文公因問魏收有遺峭難爲之語何謂蘇公曰聞之宋元憲公蓋梁上小柱名取有曲折之義耳蘇公以文人多用近語而未及此乃用爲一詩紀席上事獻文公云

王安石

璇霄一夕斗杓東。澱豔晨曦照九重。和氣薰風摩蓋壤。競銷金甲事春農。宋藝圃集

安石字介甫臨川人慶歷二年進士神宗朝累除知制誥翰林學士拜同中書門下平章事加尚書左僕射兼門下侍郎封荆國公卒諡曰文崇寧間追封舒王有臨川集

蒙齋筆談荆公初生家人見有獾入其產室故小字獾郎

後山詩話魯直謂荆公之詩莫年方妙然格高而體下如似開青秧底復作龜兆塚乃前人所未道又云扶輿度陽焰窈窕一川花雖前人亦未易道也然學三謝失於巧耳

石林詩話。蔡天啓言。荆公每稱老杜。鉤簾宿鷺起。丸藥流鶯囀之句。以爲用意高峭。五字之模楷。他日公作詩。青山捫蝨坐。黃鳥挾書眠。自謂不減杜詩。以爲得意。然不能舉全篇。余頃嘗以語薛肇明。肇明時被旨編公集。徧求之。終莫之得。或云。公但得此一聯。未嘗成章也。

西清詩話。仁廟嘉祐中。開賞花釣魚宴。介甫以知制誥預末坐。帝出詩示羣臣。次第屬和。未至介甫。日將夕矣。亟欲奏御。得披香殿字。未有對。時鄭毅夫。擲接席。顧介甫曰。宜對太液池。故其詩有云。披香殿上留朱轡。太液池邊送玉盃。翌日都下盛傳。王舍人竊柳詞。太液波翻。披香簾卷。介甫頗銜之。

優古堂詩話。韓退之喜雪獻裴尙書詩云。喜深將策試。驚密仰簷窺。又云。氣嚴當酒煖。灑密聽窗知。荆公全用一聯云。借問火城將策試。何如雲屋聽窗知。

雞肋編。王介甫作韓魏公挽詩云。木稼嘗因達官怕。山摧今見哲人萎。時華山崩。京師木冰。極爲中的。人多不見。木稼出處。按舊唐書五行志。開元二十九年十一月二十二日。雨木冰。凝寒凍冽。而數日不解。寧王見而嘆曰。諺云。樹稼達官怕。必有大臣當之。其月王薨。

澠水燕談。王荆公之時。學者得出其門。自以爲榮。一被稱與。往往名重天下。公之治經。尤尙解字。末流務爲新奇。淺成穿鑿。朝廷患之。詔學者兼用舊傳注。不專治新經。禁援引字解。於是學者皆變所學。至有著書以詆公之學者。又諱稱公門人。故張芸叟爲挽詞曰。今日江湖從學者。人人諱道是門生。及後詔公配享神廟。贈官賜諡。俾學者復治新經。用字解。昔之學者。稍稍復稱公門人。有無名字。改芸叟卒章云。人人卻道是門生。

高齋詩話荆公題金陵此君亭詩云誰憐直節生來瘦自許高才老更剛賓客每對公稱頌此句公輒鑿鑿不樂晚年與平甫坐亭上觀詩牌曰少時作此題榜一傳不可追改大抵少年題詩可以爲戒平甫曰此揚子雲悔其少作也

敦陶孫詩評王荆公如鄧艾

縋兵入蜀要以險絕爲功

團扇

玉斧修成寶月團月中仍有女乘鸞青冥風露非人世鬢亂釵橫特地寒

天廚禁鬱云讀之令人一唱三

歎譬如朱弦疏越有遺音者也

和女詩

青燈一點暝窗紗好讀楞嚴莫憶家能了諸緣如幻夢世間唯有妙蓮花

冷齋夜話舒王女吳安持妻蓬萊縣君工詩多佳

句有詩寄舒王王以楞嚴經新釋付之并和云

寒穴泉

神泉冽冰霜高穴與雲平空山澗千秋不出嗚咽聲山風吹更寒山月相與清北客不到此如何洗煩醒

墨莊漫錄華亭有寒穴泉與無錫

惠山泉味相同荆公嘗有詩云

寄蔡氏女

建業東郭望城西。嶂承宇。百泉遶。青遙遙兮纒屬。綠宛宛兮橫逗。積李兮縞夜。崇桃兮炫晝。蘭馥兮衆植。竹娟兮常茂。柳薦綿兮含姿。松偃蹇兮獻秀。鳥跂兮下上。魚躍兮左右。顧我兮適我。有斑兮伏獸。感時物兮念汝。遲歸兮攜幼。我營兮北渚。有懷兮歸女。石梁兮以苦蓋。綠陰陰兮承宇。仰有桂兮俯有蘭。嗟女歸兮路豈難。望超然之白雲。臨清流而長嘆。

朱文公楚詞後語云。寄蔡氏女者。王文公之所作也。公以文章節行高一世。而尤以道德經濟爲己任。被遇神宗。致位宰相。世方仰其有爲。庶幾復見二帝三王之盛。而公乃汲汲以財利兵革爲先務。引用凶邪。排擯忠直。躁迫強戾。使天下之人。驚然喪其樂生之心。卒之羣姦嗣虐。流毒四海。至於崇宣之際。而禍亂極矣。公又以女妻蔡下。此其所予之詞也。然其言平淡簡遠。脩然有出塵之趣。視其平生行事心術。略無毫髮肖似。此夫子所以有子子改是之歎也歟。

絕句

穰侯老擅關中事。嘗恐諸侯客子來。我亦暮年專一壑。每聞車馬便驚猜。

侯鯖錄。元豐末。有以王介甫罷相歸金陵後。資用不足。達裕陵睿聽者。上卽遣使以黃金二百兩就賜之。介甫初喜。意召已。既知賜金。不悅。卽不受。舉送蔣山修寺爲朝廷祈福。此詩未能忘情在丘壑者也。

與外弟飲

一自君家把酒杯。六年波浪與塵埃。不知烏石岡頭路。到老相尋得幾回。

冷齋夜話山谷言詩意無窮而人才有限以有限之才追無窮之意雖淵明少陵不得工不易其意而造其語謂之換骨法規摹其意形容之謂之奪胎法如顧況詩曰一別二十年人堪幾回別其詞簡緩而意精確荆公與故人詩云云所謂奪胎法也

賞心亭

霸氣消磨不復存。舊朝臺殿只空村。孤城倚薄青天近。細草侵尋白日昏。稍覺野雲成晚霽。却疑山月是朝暾。此時江海無窮興。醒客無言醉客喧。

自金陵至丹陽道中有感

數百年來王氣消。難將往事問漁樵。苑方秦地皆蕪沒。山借揚州更寂寥。荒埭暗雞催月曉。空場老雉挾春驕。豪華只有諸陵在。往往黃金出市朝。

藝苑雌黃予與鄉人翁行可同舟泝汴因談及詩行可云介甫善下字如空場老雉挾春驕下得挾字最好即孟子挾長挾貴之挾予謂介甫又有紫萸淩風怯蒼苔挾雨驕後山有寒氣挾霜侵敗絮賓鴻將子度微明其用挾字亦與前一聯同末言陵墓遭發金玉出於人間矣

初夏絕句

石梁茅屋有灣碕。流水濺濺度兩陂。晴日煖風生麥氣。綠陰幽草勝花時。

娛書堂詩話范石湖云嘗蒙恩獨引觴
詠壽皇興行苑中親誦後句以爲佳

試院中作

少年操筆坐中庭。子墨文章頗自輕。聖世選才終用賦。白頭來此試諸生。

詳定官作

童子常誇作賦工。暮年羞悔有揚雄。當年賜帛倡優等。今日論才將相中。細甚客卿因筆墨。卑於爾雅注魚蟲。漢家故事真當改。新詠知君勝弱翁。

韻語陽秋。荆公以詩賦決科。而深不樂詩賦。試院中五絕。其一云。後作詳定官。復有詩云。熙寧四年。預政遂罷詩賦。專以經義取士。蓋平日之志也。

歲晚

月暎林塘靜。風涵笑語涼。俯窺憐淨淥。小立佇幽香。攜幼尋新葍。扶衰上野航。延緣久未已。歲晚惜流光。

漫叟詩話。荆公定林後。詩精深華妙。非少作之比。嘗作歲晚詩。自比謝靈運。識者以爲然。

示公佐

殘生傷性老耽書。年少東來復起予。各據槁梧同不寐。偶然聞雨落堦除。

壬辰寒食

客思似楊柳。春風千萬條。更傾寒食淚。欲漲冶城潮。巾髮雪爭出。鏡顏朱早凋。未知軒冕樂。但欲老漁樵。

自白土村入北寺

雨過百泉出。秋聲連衆山。獨尋飛鳥外。時度亂流間。坐石偶成歇。看雲相與還。會須營一晦。長此聽潺潺。

泊船瓜洲

京口瓜洲一水開。鍾山祇隔數重山。春風又綠江南岸。明月何時照我還。

容齋續筆。吳中士人家藏其草。初云。又到江南岸。圈去到字。注曰不

好。改爲過。復圈去而改爲入。旋改爲滿。凡如是十許字。始定爲綠。

送和甫寄女子

荒煙涼雨助人悲。淚染衣襟不自知。除卻春風沙際綠。一如送汝過江時。以上臨川集。

釋普聞詩論。拂去豪逸之氣。屏蕩老健

之節。其意韻幽遠。清癯雅麗。爲得也。

寄池州夏太初

一水衣巾剪翠綃。九華環珮刻青瑤。生才故有山川氣。卜築兼無市井譟。三葉素風門閥在。十年塵跡履綦銷。歸榮早晚重攜手。莫負幽人久見招。

能改齋漫錄。王荆公有唐律一首。寄池州夏太初。今集

不載。序云。不到太初郎中兄所居。遂已十年。以詩攀寄。

絕句

白馬津頭驛路邊。陰森喬木帶漪漣。斜陽一馬慙慙過。夢寐如今十五年。

能改齋漫錄。荆公題一絕于夏蚊扇。今集不載。

柳瑾

瑾字子玉。慶歷二年進士。

句

過盡金湯知帝策。見求貂虎識軍儀。男兒本有四方志。祇在蓬瀛自不知。王荆文公詩。自注。

陳洙

洙字師道。建陽人。慶歷二年進士。歷殿中侍御史。嘉祐中。上疏助司馬光論建儲。且飲藥而卒。以明無所覬望。奏下大計。遂定。仁宗聞洙死。賜錢百萬元。祐初。用光言。官其一子。

吳耿先生還北山舊居

蒼浪兩鬢斑。盡意六經間。有術佐明主。無官歸故山。釣臺春水碧。吟榭暮雲閑。見說還家後。重將舊史刪。前賢小集拾遺。

遊雲際寺在邵武軍光澤縣。

清曉捫蘿踏嶺雲。寒風飛溜溼衣巾。上攀霄漢無多地。直衣城闌幾點塵。古木半陰藏宿霧。山禽相語厭遊人。明年更補闕中吏。來看桃花爛漫春。瀛奎律髓。

靖安寺五代時建寧詩人江爲故宅。

處士亡來二百年。故居牢落變祇園。詩名長共江山在。冤氣尙磨星斗昏。臺榭幾人留好句。漁樵何處問曾孫。昔時泉石生涯地。日暮寒雲遶寺門。建寧府志。

毛維瞻

維瞻開封人居三衢。慶歷二年進士。累遷參知政事。

筠州山房

樓上青山繞四陲。畫樓百步引朱扉。落成當與公同上。一看長江白練飛。江西通志。

王珪

珪字禹玉。華陽人。徙舒。琪之從弟。慶歷二年進士。官翰林學士。知開封府。兼侍讀學士。神宗朝。拜尙書左僕射。門下侍郎。哲宗卽位。封岐國公。卒。贈太師。諡曰文。有華陽集。

王文正公日錄。神廟時。每夕有赤氣見西北隅如火。至人定後乃滅。人以爲皇子生之祥。故禹玉作大燕樂詞云。未曉清風生殿閣。經旬赤氣照乾坤。未幾皇子生。大燕羣臣于集英殿。

文潞公丞相出鎮西京。奉詔於瓊林苑燕餞。從列皆賦詩送行。

都門秋色滿旌旗。祖帳容陪醉御卮。功業特高嘉祐末。精神如破貝州時。匣中寶劍騰霜鏑。海上仙桃壓露枝。昨日更聞褒詔下。別刊名姓入周彝。墨莊漫錄。

東臯筆錄。嘉祐中。文潞公彥博。富鄭公弼爲相。劉沆。王堯臣爲參政。始議立皇嗣。而事祕不傳。雖英宗亦莫知也。元豐中。王公之子同光。上書言先帝之立。乃先臣在政府始議也。其始終事並藏臣家。乃宣取。上驚歎久之。是時富。劉。王三公皆已薨。獨潞

公留守西京。遽召至闕慰藉。恩禮隆厚。册拜太尉。及還西都。上作詩送行。有報在不言功之句。兩府並出餞。皆有詩。王禹玉詩云。功業特高嘉祐末。精神如破貝州時。蓋謂是也。

上元應制

雪消華月滿仙臺。萬燭當樓寶扇開。雙鳳雲中扶輦下。六鼇海上駕山來。鎬京春酒霑周燕。汾水秋風陋漢才。一曲昇平人共樂。君王又進紫霞杯。

韻語陽秋。元豐中。令從臣和元夕觀燈詩。蔡持正密叩王公云。應制上元詩如何使事。禹玉曰。鼇山鳳輦外。不可使章子厚面笑之。十七日登對。神宗獨賞禹玉詩。妙於使事。

史院席上和首相吳公原韻

曉下金門路。君筵聽召餘。簪纓三壽客。筆削兩朝書。身老雖逢此。恩深盡醉歟。傳聞訪餘事。應走使臣車。
揮塵後錄。

在翰苑作

晨光未動曉驂催。又向壇頭飲社杯。自笑治髯終不是。明年強健更重來。
嬾真子錄。

和梅公儀琴高魚

三月江南花亂開。青溪曲曲水如苔。琴高一去無蹤迹。枉是漁人尙見猜。
寶退錄。

溫成皇后閣立春帖子。曰。撥按曲消舊開作。歐公詩。

昔聞海上有仙山。煙鎖樓臺日月閑。花下玉容長不老。只應春色勝人閒。

隱居詩話溫成皇后初薨會立春進帖子是時歐陽修王珪同在翰苑以其虛閣故不進俄有旨令進王珪遽口占一首歐公歎其美麗

端午帖子

紫閣曠曠隱曉霞。瑤墀九御薦莒華。何人又進江心鑑。試與君王卻衆邪。容齋五筆

夫人閣端午帖子

後苑尋青趁午前。歸來競鬪玉闌邊。袖中獨有香芸草。留與君王辟蠹編。後村詩話

挽老蘇先生

岷峨地僻少人行。一日西來譽滿京。白首只知聞道勝。青衫不及到家榮。元猿夜哭銘旌過。紫燕朝飛挽鐸迎。天祿校書多分薄。子雲那得葬鄉城。蘇集附錄

大饗明堂慶成

皇祐更秋律。明堂奉帝禋。棗盛雖薦德。霜露本懷親。於赫朝三后。無文秩百神。九筵交玉幣。重屋近星辰。邃幄留颺御。清壇墮月津。衣冠漢儀舊。金石舜韶新。受祚開宣室。鳴鐘降紫宸。羣陰光復旦。叶氣斗回春。靈貺叢千祝。豐恩滲四垠。慙非老辭筆。徒學煥堯文。

瀛奎律髓禹玉爲詞臣則摛藻細潤典雅勁健未有後來全句長句之病時號爲至寶丹以多用金玉珠璣錦繡之類然亦有不全然者此詩豈不謂之細潤典雅

再登賞心亭

六朝遺迹此空存。城壓滄波到海門。萬里江山來醉眼。九秋天地入吟魂。於今玉樹悲歌起。當日黃旗王氣昏。人事不同風物在。悵然猶得對芳樽。詩林萬選

宮詞

花裏宮鶯曉未啼。千牛仗下報班齊。銀袍五百趨龍尾。天子臨軒賜御題。侍輦歸來步玉階。試穿金縷鳳頭鞵。堦前摘得宜男草。笑插黃金十二釵。內苑宮人學打毬。青絲飛控紫驂騑。朝朝結束防宣喚。一樣眞珠絡轡頭。黃昏鎖院聽宣除。翰長平明趁起居。撰就白麻先進草。金泥降出內中書。紗幔薄垂金麥穗。簾鉤纖挂玉蔥條。樓西別起長春殿。香壁紅泥透蜀椒。內人稀見水鞦韆。爭擘珠簾帳殿前。第一錦標誰奪得。右軍輸卻小龍船。盤龍新織翠雲裘。簡點黃封玉匣收。防備秋來供御著。金箱捧入曝衣樓。盡日閑窗賭選仙。小娃爭覓倒盆錢。上籌爭占蓬萊島。一擲乘鸞出洞天。十家宮詞

呈永叔書事嘉祐二年禮部倡和

誥書初捧下西箱。重棘連催暮餉忙。綠繡珥貂留帝詔。元注。元夕有綠衣中使傳宣。紫衣鋪案拜宸香。卷如驟雨收聲急。筆似飛泉落勢長。十五年前出門下。最榮今日預東堂。

歐陽修歸田錄。嘉祐二年。余與端明韓子華。翰長王禹玉。侍郎范景仁。龍圖梅公儀。同知禮部貢舉。辟梅聖俞爲小試官。凡鎮院五十日。六人者相與倡和。爲古律歌詩一百七十餘篇。爲三卷。禹玉余爲校理。時武成王廟所解進士也。至此新入翰林。與

余同院。又同知貢舉。故禹玉贈余云。十五年前出門下。最榮今日預東堂。余答云。旨時叨入武成宮。曾看揮毫氣吐虹。夢寐閑思十年事。笑談今日一尊同。喜君新賜黃金帶。願我今爲白髮翁。

依韻恭和聖製龍圖天章閣觀三聖御書

半夜傳君召。西清閱帝文。筆迴丹穴鳳。歌起沛鄉雲。御幄金蚪轉。仙墀羽仗分。君王自天縱。況復睿心勤。
以上曹氏歷代詩選。

句

披褐曾陳定羌策。汗青猶著立儲書。春風澤國吟箋落。夜雨溪堂宴豆疎。

許彥周詩話。外祖父邵安簡公。布衣時。上平元旻策。又嘗勸仁廟早立太子。晚年自樞府出知越州。又移鄆州。其薨也。岐公作挽詞云。不獨語句精練。且是著題。

金縷黃龍扇。蘭芽翠釜湯。夫人閣端午帖子。繞臂雙條達。紅紗晝夢驚。同上。震邸陪經席。辰階總化鈞。晏元獻挽詩。未染仙人杏。先柔帝女桑。皇后閣帖子。靈宮千福墮。清廟一誠專。南郊。舊蠹繙書槧。羣訛正銳鈴。校理東觀。曉日破紅浮鬪棋。夕雲凝紫護周垣。祠太乙宮。官職聲名君自有。何妨更絕郢中吟。和石昌言雪。灼灼海棠誰復折。差差燕子又還飛。以上海錄碎事。

舞急錦腰迎十八。酒酣玉琖照東西。

墨莊漫錄。樂府六么曲。有花十八。古有玉東西杯對甚新。

石象之

象之字簡夫。新昌人。慶歷二年進士。官太常丞。

詠愁

來何容易去何遲。半在心頭半在眉。門掩落花春去後。窗涵殘月酒醒時。柔如萬頃連天草。亂似千尋市地絲。除却五侯歌舞地。人間何處不相隨。新昌縣志。

石聲之

聲之新昌人。

遊南明山

祗應尋勝到林泉。四抱危峰萬朵蓮。僧過不知山隱寺。客來方見洞開天。浮圖照水光相映。古木依崖影倒懸。風露了非人世界。濯纓秋後玉壺仙。越咏。

黃

庶向宗道。

庶字亞夫。分寧人。慶歷二年進士。歷州郡從事。攝康州。有伐檀集山谷其子也。

宿趙屯

蘆花一股水。弭棹日已暮。山間聞雞犬。無人見煙樹。行逐羊豕跡。始識入市路。菱芡與魚蟹。居人足來去。漁家無鄉縣。湖船載稚乳。鞭笞公私急。醉眠聽秋雨。

怪石

山鬼水怪著薜荔。天祿辟邪眠莓苔。鉤簾坐對心語口。曾見漢唐池館來。

斑石枕聯句同向宗道

斷得西山骨。磨礱露斑駁。凝結一何怪。宗道。形模萬難學。直疑彩雲根。庶。又訝紫珉礫。中瘦皴蛟腹。宗道。外文灼龜殼。冷剖清泉肝。庶。穗檜老鼈脚。堅方君子性。宗道。清純聖人璞。有氣當補天。庶。無瑕應並鼓。定漬盤古苔。宗道。想漏神農藥。堪作夢寐寶。庶。尤其是炎蒸。託眠月病頭愈。宗道。橫風醒肺濯。珊瑚侈可唾。庶。陶甄脛堪撲。夜深魘鬼驚。宗道。晝冷詩魔愕。首愜無俗夢。庶。心清去煩惡。斬篋方敢友。宗道。蜀筇良可攬。何必檄愈風。庶。何必文驅瘡。質任兒女嗤。宗道。頑宜童僕諶。枕流固迂誕。庶。藉糟徒落魄。潤生審將雨。宗道。輝發疑有珏。燭體莊生狂。庶。虎魄宋武薄。欲鑿中郎銘。文章體猶弱。欲祕淮南書。神仙志非樂。宗道。我疑混沌鑿。誰與礱竅鑿。可作甘寢輿。華胥詣冥寞。庶。子道足施爲。我拙困嬰縛。已謀具巾屨。行當老嵩霍。子其乞我歸。終焉臥雲壑。宗道。嗜好我已癖。須求子惟慤。甞舊王固惜。瓢陋顏不博。異時一經子。便當千金橐。客退獨摩拂。臥送山月落。庶。以上伐檀集

韓欽聖

欽聖慶歷二年進士。

句

迎鋒畫幟轉。交鏃采文繁。省試勳門賜戟。古今詩話。

句龍緯

緯、蜀人慶歷進士、太學博士。

題惠泉寄知軍郎中

在荆門。

崎嶇荆門山。叢起爲東阨。陽岡盤氣勢。陰竇融液脈。源濯雲根移。流噴石罅拆。呀呀兩岸間。平澗纔數席。環岸貯清泚。古鏡照秋色。恬風不生紋。至底無隱物。澄輝泛嵐翠。淨影溶天碧。潛花深回回。蔭樹高峯峯。清光照毛髮。爽氣灑肌骨。如入冰壺中。亭宇何鮮飾。餅罌日往來。舉汲易爲力。短綆何勞人。輕舸恰容客。當時竟陵翁。老死卻不歷。品第十九泉。遺此良可惜。此泉惠此土。唯日流不息。作詩頌惠泉。勉哉君子德。

荊州府志。

賈宗諒

宗諒、官內園洛苑如京崇儀使。

上元日駕幸太乙宮燒香

金鑾晨動暖風微。比屋歡呼望帝暉。天喜宴開新福館。雲深香滿侍臣衣。九韶鳳舞當雙闕。萬燭龍趨護六飛。爲與吾民同樂事。月輪猶未下端闈。

古今歲時雜詠。

宋詩紀事卷十六

錢唐厲鶚緝

祁門馬曰璐同緝

蘇 案

案字公佐磁州滏陽人舉進士神宗朝累官給事中知河南府

和趙閱道游海雲山

笙歌揭虛閣帷幕而春池且與民同樂都忘天一涯舊遊嗟倏忽故步喜追隨陌上人如堵歸鞍莫載馳

成都文類

呂夏卿

夏卿字縉叔晉江人慶歷二年進士調江寧尉用薦為編修唐書官書成遷直祕閣同知禮院熙寧初遷兵部員外郎知制誥出知潁州卒

泉州府志初歐宋二公典領唐史十七年書始成凡預載筆者皆一時高選前後十餘人遷徙不常唯夏卿與范鎮自發凡訖于絕筆夏卿又纂新書紀志傳義例摘二公繁文闕誤目為唐書直筆新例一卷唐兵志三卷又集天下碑刻為唐文獻考歷

代氏族譜志為

古今世系表

春陰

海棠陰淺日黃昏。畫閣輕寒繡被溫。春夢醒來能記否。賣花聲過忽開門。後村千家詩。

陳襄

襄字述古。候官人。慶歷二年進士。歷官知制誥。直學士院。知陳州。徙杭州。以樞密直學士。知通進銀臺司。兼侍讀。判尚書都省。卒。贈給事中。有古靈集。

送關都官致仕

鴻雁于飛送關公也。公能以禮致仕。惜其有老成德。不衰不養于朝。天子不用古禮畱之。故作是詩也。鴻雁于飛。歸戾于澤。君子于田。亦適維則。旅力不愆。曷云其極。庶民之耄。職自爲愚。君子之耄。其德有濡。旅力不愆。曷云其劬。有堅松柏。君子斧之。有實秬稷。農夫有之。天子有老曷。其與歸野有白駒。來食我甿。君子之往。胡爲不畱。我心悠悠。爲天子之憂。

幽齋

幽境絕塵蹤。莓苔上粉墉。秋聲連夜雨。寒色一溪松。學有書千卷。歡無酒萬鍾。雲屏孤夢斷。寂寞掩巫峯。
和子瞻沿牒京口憶西湖出遊見寄

春陰漠漠燕飛飛。可惜春風與子違。半嶺烟霞紅旆入。滿湖風月畫船歸。緜笙一闋人何在。遼鶴重來事已非。猶憶去年離別處。烏啼花落客霑衣。

寄遠

飛鵲翻翻暮欲棲。楚天新月射璇題。袖中已滅三年字。心曲惟通一點犀。步障影迷金谷路。桃花香隔武陵溪。瑤華好折無人寄。腸斷江樓百尺梯。

夜意

熏爐香燼薰烟沈。凜冽寒生翡翠衾。月國音塵千里絕。仙山樓閣五雲深。離懷暗耿金壺漏。獨夢多驚玉女碁。騎省中郎才調逸。擬將文筆賦秋心。

使還咸熙館道中作

土曠人稀使驛賒。山中殊不類中華。白沙有路鴛鴦泊。芳草無情妯娌花。氈館夜燈眠漢節。石梁秋吹動胡笳。歸來覽照看顏色。斗覺霜毛兩鬢加。

韋羌山

在天台山西。上有石壁。字如科斗。

去年曾覽韋羌圖。云有仙人古篆書。千尺石巖無路到。不知科斗是何書。

中和堂木芙蓉盛開戲贈子瞻

千林寒葉正疎黃。占得珍叢第一芳。容易便開三百朶。此心應不畏秋霜。

題寶嚴院垂雲亭

在杭州七寶山。

小亭巉絕出雲閒。萬象升沈不得閑。莫怪詩翁頭白早。時來向此寫湖山。以上古靈先生集。

連庠

庠字元禮。應山人。慶歷二年進士。爲宜城令。至都官郎中。

宋史隱逸傳。連庶字君錫。舉進士。監陳州稅。罷歸。始與弟庠在鄉里時。宋郊兄弟皆依之。及二宋貴。遂不可其志。退居二十年。守道好修。非其義。秋毫不可污也。庠亦登科。敏于政事。號良吏。終都官郎中。

襄州守王侯洙復峴山羊公祠

大江西來遶重城。猶如叢花正練縈。左山右阜若開避。曾是峴首當頭橫。江湍衝山山不動。滔滔雪浪東南傾。隤然巨勢壓漢境。萬楚不得專雄名。四時美景千百狀。登臨可以據襟靈。近麓按藍秋水綠。幽巖圍纈春葩明。寒林蕭疎四面合。夏木延袤長川青。危巔碑墊龜螭蟄。陰崖檜老蛟龍形。俯瞰洲壘相向背。風恬江面羅紋生。漁舸數百集其下。警然來往一葉輕。波底崢嶸沈翠影。槎頭鳧雁斂霜翎。天然佳致信可尙。直是丹青寫不成。叔子當年樂山水。每來置酒空壚罌。賢達勝士共愛此。謂此風景魁南荆。荆人被化思不已。立祠山椒共祭牲。爾來綿亘幾千載。瓦飛棟撓誰經營。守臣罕肯著脚到。遂至完固屬兼并。非憚鳩工繕完葺。誠知仁政難繼聲。帝眷襄陽曰重鎮。宜從館閣擇名卿。明公之來百城悅。壺漿竹馬相歡迎。政成公休屢登覽。山前車騎長晶熒。僚空寓目看不足。詩豪佚發輸精誠。乃敕寮屬復祠宇。仍從嶺上新虛亭。歲時遊憩備言詠。荆人愛之猶鉅平。羊公之政公之化。異時一致當同評。兩賢繼美何以況。山之永兮水之清。襄陽府志。

李觀

觀字夢符。自號玉谿叟。袁州人。慶歷二年。試南宮。賦偶落韻。有司愛其策。爲取特旨。由是登第。以著作佐郎。知臨江軍清江縣。嘗爲太學官。出判處州。

宜春傳信錄。朝議大夫李觀。夢符史傳諸書。過目成誦。文章如元次山。登第。歷官知處州。不就。請監南嶽廟。以歸。建玉溪洞。中有抱一堂。水仙亭。有梅。所曰香雪塢。有衆花。處曰錦繡塢。貯書史。處曰文藪。終日醉吟溪上。於世味淡如也。

題處州直廳壁

十謁朱門九不開。利名淵藪且徘徊。自知不是公侯骨。夜夜江山入夢來。能改齋漫錄。

許當

當字當時。慶歷初爲古田令。

桃溪

桃溪一何清。想像武陵水。所愛春風時。灼灼花數里。漁艇日來去。無人識歸止。安知歷幽源。不遇神仙子。

福州府志。

石蒼舒

蒼舒字才叔。雍人。善行草。官承事郎。通判保安庫。

別韓魏公

□□□□□□□□。簾前二聖擁千官。唯有埽門霜鬢客。卻隨社燕入長安。

過庭錄。石蒼舒與韓魏公有舊。韓拜相。石至千祿。爾數

月無成。石作詩以別歸。韓覽之惻然。遂注一官而去。

胡恢

恢、金陵人。華州推官。

句

建業江山千里遠。長安風雪一家寒。

夢溪筆談。金陵胡恢。善篆隸。坐法失官。困于京師。上韓魏公詩。魏公深憐之。令篆太學石經。得復官。任華州推官而卒。

姚嗣宗

嗣宗、關中人。韓魏公薦試大理評事。

續湘山野錄。嗣宗關中詩豪。忽繩檢。坦然自任。杜祁公帥長安。多裁品人物。謂尹師魯曰。姚生如何人。尹曰。嗣宗者。使白衣入翰林。亦不忝。減死一等。竊流海島。亦不屈。姚聞之大喜曰。所謂善評我者也。

書驛壁

南越干戈未息肩。五原金鼓又轟天。崆峒山叟笑無語。飽聽松風春晝眠。

續湘山野錄。元昊以河西叛。朝廷方羈箠關中豪傑之際。嗣宗因題詩二於壁。其五言有蹋碎賀蘭石。掃清四海塵。布衣能效死。可惜作窮鱗之句。韓忠獻公奇之。奏稱職官。既而一庸生張某。亦堂堂人。鬚髯黑面。頂青巾緇裘。持一詩代刺。搖袖以謁杜公。有長安有客面如鐵。爲報君王早築臺之句。杜祁公亦異之。奏補乾祐一尉。而胸中無一物。未幾以臧去任。

俞汝尚

汝尚字仁廓。號退翁。又號溪堂居士。歸安人。慶歷二年進士。王安石當國。欲寘汝尚御史驛。召詣京。力辭得免。從趙抃於青州。以屯田郎中致仕卒。

贈張伯玉倅古睦

新定烟霞外。溪山清可依。夜風泉溜響。春雨藥苗肥。野鶴眠花圃。晴嵐溼案衣。預知公暇日。垂釣子陵磯。
詩林萬選

題三角亭

奇哉山中人。構此亭上宇。蕙徑斜映帶。林烟盡吞吐。春無四面花。夜欠一簷雨。寄傲足有餘。何須存廣廡。
前賢小集拾遺

久客

久客西城裏。人家似舊鄰。衆知趨事嬾。僧厭打門頻。倦枕費窗燭。閑書破硯塵。陰晴消白日。門巷忽青春。
瀛奎律髓

賈黯

黯字直孺。南陽人。慶歷六年進士第一。嘉祐中。累擢翰林學士。英宗朝。遷給事中。權御史中丞。以疾乞郡。除翰林侍讀學士。知陳州。卒。贈禮部侍郎。

襄州守王侯洙復峴山羊公祠

古郡襄水陽。羣山繞郭郭。其閒峴首者。羊公最所樂。登臨見洲渚。氣象真磅礴。公乎既已沒。高碑此鑿鑿。

廟食有遺像。當時盛丹臙。到今僅千載。碑廟皆頽落。喬木荒榛閒。廟址存依約。碑倒石屢易。文字免缺錯。我侯至之初。亭廟皆新作。爲詩道其意。風化思所託。侯慕羊公心。仁政及物博。將見襄陽治。與古相侔若。
襄陽府志。

季康伯

襄州太守王侯洙復峴山羊公祠

賢哉西晉鉅平侯。刻碑立祠在荊州。州民萬家見之者。擗面洩瀾雙淚流。逮今緜歷幾百祀。峴首巍然臨漢水。碑鉅廢祠榛莽中。蕭蕭只有悲風起。內閣深沈侍從臣。赤帷卓蓋來行春。殷勤拂碑復祠貌。一朝舊迹重如新。山光葱蒨水清冽。天長地久無時別。古人今人空茫茫。惟是功名不能滅。
襄陽府志。

張去惑

襄州太守王侯洙復峴山羊公祠

漢江千里清溶溶。惟此南夏奠其中。因山爲城峙險固。一國形勝何高雄。巖然巨首名曰峴。回壓面勢尊且崇。東扼迅流疑引翼。西峙羣阜如盤龍。嶽巖峻拔不可擬。絕岸萬丈凌長空。下闕澄潭迴無際。旁睨比屋幾可封。天意造物豈虛設。控蠻鎮楚舒隆隆。自昔登憩且非一。此山振動惟羊公。有志平吳運祕略。竭心衛晉推元功。綏懷遠邇人所服。開墾田疇時以豐。慨然置酒適清曠。中郎幕府賢而通。語公令望高四海。當與斯山永無窮。自是綿綿歲歷久。閱碑墮淚存遺蹤。亭祠浸壞詎可究。山歸民籍木以童。前知興衰故有日。覽者歎息追無從。龍圖王公守茲土。修舉廢墜詰初終。感物思人但長息。刻章疾置聞四聰。聖宸

動色可其請。茲山復興氣象融。耿耿大廈揭亭宇。肅肅真像嚴祠宮。遂使靈光享血食。禁樵復祀資格恭。大抵有功及民物。盛德期與天地充。今之視古皆一致。休哉千載懷清風。襄陽府志。

王介

介字中父。衢州人。以制舉登第。性聰悟絕人。所嘗讀書皆成誦。而任氣多忤物。以故不達。終于館職。

送張君宰吳江

乍被軒綬寵。新辭計省繁。三江吳故國。百里漢郎官。烟水蓴芽紫。霜天橘顆丹。優游民政外。風月卽清歡。

明道雜志。

句

命也豈終否。時乎不暫留。勉哉藏素業。以待歲之秋。贈人下第。

明道雜志。中父作詩多用助語作句。如贈人落第詩云云。此格古未有也。

草廬三顧動。幽塾薰帳一。空生曉寒。

石林詩話。中甫與王荆公游甚款。未嘗降意相下。熙寧初。荆公以翰林學士被召。前此屢召不起。至是始受命。介以詩寄公云云。蓋有所諷。公得之大笑。他日作詩有丈夫出處非無意。猿鶴從來自不知之句。蓋爲介發也。

劉敞

敞字原父。臨江新喻人。慶歷六年進士第二。累遷知制誥。拜翰林學士。改集賢院學士。判南京御史臺。卒。門人私謚曰公是先生。有集。

郡齋讀書志。原父出知永興。感官妓。得驚眩疾。力求便。

郡仁宗謂執政曰。如敞者。豈易得耶。賜以新橙五十。

劉跂暇日記。劉原父晚年病。不復識字。日月兒女。

皆不能認。人言永興中多發冢墓求古物。致此。

瓊花并序

自淮南遷東平。移后土廟瓊花植于濯纓亭。此花天下只一株耳。永叔為揚州。作無雙亭以賞之。彼土人別號八仙花。或云李衛公所賦玉蘂。即此種。

淮海無雙玉蘂花。異時來自八仙家。魯人未覩天中樹。乞與春風賞物華。

鐵漿館以下一首奉使作

稍出盧龍塞。回看萬壑青。曠原開磧口。別道入松亭。此館以南屬奚山。溪深險。以北屬契丹。稍平衍。漸近磧矣。別一道自松亭關入幽州。甚徑易。虜常祕不欲漢使知。虜馬寒隨草。奚車夕戴星。忽悲田子泰。寂寞向千齡。奚人以車帳為生。晝夜

移徙。

檀州 正月二日

窮谷迴看盡。孤城平望遙。自古北口山至此都盡。市聲衙日集。此州衙日市集。海蓋午時消。每旦海氣如霧。至晚消盡。土

人謂之海蓋。冠帶才通漢。山川更入遼。春風解冰雪。最覺馬蹄驕。

春草

春草綿綿不可名。水邊原上亂抽莖。似嫌車馬繁華處。纔入城門便不生。

飲子華家醉翁不來令藁仙彈醉思仙

翠眉紅袖拜尊前。撩亂春聲入四弦。坐少車公還不樂。爲君重奏醉思仙。以上公是先生集。

李士衡硯

劉涇州所得。

李侯寶硯劉侯得。上有刺史李元刻。云是天寶八年冬。端州東溪靈卵石。我語二客此不然。天寶稱載不稱年。刺史爲守州爲郡。此獨云爾奚所傳。兩君盧胡爲絕倒。嗟爾於人幾何寶。萬事售僞必眩真。此固區區無足道。硯箋。

觀永叔五代史

大意晚有屬。先生拔書彙。是非原正始。簡古斥辭費。褒善傷獲麟。疾邪記有蜚。處心必至公。撥亂豈多諱。何必藏名山。端如避羅罟。合璧事類後集。

聞鶯

醉裏春空盡。江邊客未歸。可憐鳴睨院。似欲訴芳菲。珍樹移時語。殘花入眼稀。離居亦幽獨。求友莫相違。

鴨脚

鴨脚。按此首又見梅堯臣集。

魏帝昧遠圖。於吳求鴨脚。乃爲吳人料。重玩志已愜。江南有佳木。修聳入天插。葉如闌邊跡。子剝杏中甲。

持之奉漢宮。百果不相壓。

養雞

茅茨一畝宮。生理備委曲。雞豚自古昔。豢養隨世俗。鑿垣安其棲。幼長何碌碌。旦出四散飛。暮還相投宿。頗哀鴻鵠輩。飲啄不充腹。何事萬里遊。羈旅傷局促。衣冠相嫵媚。庭廡更追逐。未悟糞土非。豈知稻粱辱。物理常有此。人情苦不足。安見避世翁。頽然臥空谷。以上合璧事類別集。

贈李才元

待詔先生窮巷居。簞瓢屢空方晏如。自探井臼秣羸馬。卻整衣冠迎賜書。王人駐車久歎息。天子聞之動顏色。飽死曾不及侏儒。牧民會肯舒筋力。詔書朝出蓬萊宮。繡衣還鄉由上衷。君今已作二千石。亦將復爲第五公。

徐度却掃編。李才元大臨。仕仁宗朝爲館職。家貧甚。僮僕不具。多躬執賤役。一日自秣馬。會例賜御書。使者及門適見之。歎息而去。歸以白上。上大驚異。遂命知廣安軍。熙寧中。知制誥。坐封還李定除御史詞頭。與宋次道。蘇子容俱得罪。于是名重。

桃花

小樓西望那人家。出屋香梢幾樹花。只恐東風能作惡。亂紅如雨墮窗紗。全芳備祖。

夏夜

涼風響高樹。清露墜明河。雖復夏夜短。已覺秋氣多。豔膚麗華燭。皓齒揚清歌。臨觴不作意。柰此粲者何。

避暑錄話。此詩當

是在長安時作。

雜詩效玉川體

毀巢鳳不至。竭澤龍不游。賢者有所歸。得非龍鳳儔。周公下白屋。聖德被九州。趙禹謝賓客。漢朝以爲優。澆淳不相襲。用舍何其繆。苟徇一身利。不爲萬姓謀。哀彼扶杜詩。死生遺道周。宋藝圃集

劉攽

攽字貢父。與兄敞同舉慶歷六年進士。歷祕書少監。出知蔡州。召拜中書舍人。卒。弟子私謚曰公非先生。有集。

上書行

仕不至二千石。賈不至五百萬。此事夸者憂。而非志士歎。君不見下邳受書起。幄中運籌制千里。功成不受二萬戶。拂衣歸從赤松子。君不見計倪半策誅強吳。鳴夷扁舟泛五湖。三致千金不自擅。至今籍籍宗陶朱。大賢富貴不爲己。心事邈與常人殊。逢時致身如反手。雲蒸龍變無時無。君勿愛上書獻賦稱賢豪。刺繡倚市相矜高。丈夫昔曾笑徒勞。商賈旦旦稱錐刀。

自校書郎出倅秦州作

壁門金闕倚天開。五見宮花落井槐。明日扁舟滄海去。卻將雲氣望蓬萊。

長蘆寺

越舶吳商倚萬橈。紺園金刹起中宵。魚龍聽法多因雨。江海歸心每上潮。林黑夜深燈影白。川平天闊梵聲遙。心知水怪俱調伏。惜取靈犀不用燒。

送裴二知蘇州

著書元尚白。送客鬼揶揄。積水望江海。秋風吹舳舻。貴人千騎長。紫綬左魚符。道愛明南國。歡聲接舊吳。曉霜繁橘柚。過雨熟菰蒲。安得如吾子。從君飛赤鳧。

賦歐公廳前兩白鶴

明公眞愛鶴。愛鶴選仙骨。遂令千里姿。爲君軒墀物。啄腥豈復辭雞羣。鍛翼欲比鳧鷖馴。聆音發舞似矜客。避寒孤警將依人。歐公云。此禽畏寒。每舍屋中。吾聞芝田逸翮。不如此。世上悠悠誰識眞。

詠史

自古邊功緣底事。多因嬖倖欲封侯。不如直與黃金印。惜取沙場萬燭髀。

齊東野語。賈父此詩。蓋

指當時王韶李靈輦耳。

絕句

青苔滿地初晴後。綠樹無人晝夢餘。惟有南風舊相識。徑開門戶又翻書。以上公非先生集。

別茶嬌

畫堂銀燭徹宵明。白玉佳人唱渭城。唱盡一杯須起舞。關河風月不勝情。

過庭錄。長安妓有茶嬌者。以色慧稱。賈父惑之。被召造朝。茶嬌遠送。賈父作詩別之。至

闕。永叔去城四十五里。送賈父適病酒未起。永叔曰。非獨酒能病人。茶亦能病人矣。

襄州淳于髡墓

微言動相國，大笑絕冠纓。流轉有餘智，滑稽全姓名。師儒空稷下，衡蓋盡南荆。贅壻不爲辱，旅墳知客卿。

石林詩話：賈父天資滑稽，遇可譚諧，雖公卿不避。與王荆公素厚，荆公當國，亦屢譚之。雖每爲絕倒，然意終不能平也。元祐初，知襄州淳于墓，在焉，題詩云云，蓋以自解也。

寄韓玉汝

嫖姚不復顧家爲，誰謂東山久不歸。卷耳幸容攜婉孌，皇華何處有光輝。

石林詩話：元豐初，虜人來譏地界，韓丞相玉汝出分畫，將行，與愛妾劉氏劇飲通夕，且作詞畱別，翌日忽中批步軍司遣兵爲搬家追送之初，莫測所由，久之方知自樂府發也。賈父玉汝姻黨，卽作小詩寄之以戲云。

黛陶石硯

一片蒼山石，遙憐巧匠心。能存辟雍法，宛是馬蹄金。氣奪秋雲溼，光涵墨海深。魚龍隨醉筆，變化出幽岑。

句

瀉湯奪得茶三昧，覓句還窺詩一斑。

優古堂詩話：錢唐南屏謙師，妙于茶事，東坡贈之詩云：道人曉出南屏山，來試點茶三昧手。劉賈父亦贈詩云。

裴煜

煜字如晦。慶歷六年省元。治平中以開封府提刑知蘇州。入判三司都磨勘司。

多景樓

登臨每憶衛公詩。多景唯於此處宜。海岸千艘浮若芥。邦人萬室布如棋。江山氣象回環見。宇宙端倪指點知。禪老莫辭勤迓候。使君官滿有歸期。

墨莊漫錄。多景樓在北固山甘露寺中。李贊皇題臨江亭詩。有多景懸窗牖之句。以是命名。樓卽臨江亭故基。裴煜守潤日賦詩。

錢顛

顛字安道。無錫人。慶歷六年進士。熙寧初爲御史裏行。以論奏王安石。貶監衢州稅。

遊爛柯山

春郊雜選擁紅旌。共訪仙蹤嘯傲行。雲徑直從深崦入。石梁宛在半空橫。巖邊瑤圃新開出。洞裏芝田舊種成。羽客一枰無復見。青山畱得爛柯名。爛柯山洞志。

劉彝

彝字執中。福州人。少從胡瑗學。中慶歷六年進士。初爲胸山令。熙寧二年召對。除兩浙運判。移知虔州。加直史館。知桂林。除名編隸涪州。召還。卒。有居陽集。

夜宿善權寺追懷陳述古

精誠世所稀。及道古稀有。伊人雖云亡。遺德不可朽。嘗厭石渠游。是邦爰出守。浚河納湖波。股派活猷畝。

學宮起城隅。塗人或薪樵。既富而教之。薄俗適忠厚。矧予平生時。昏弱賴磨揉。共攜姬孔微。肯出臯稷後。醇源浩罔涯。實行靡容苟。猶其老巖阿。寂寞待同叩。天乎奪大成。旅茲宜興阜。我來薤荆榛。雨淚滴杯酒。慟哭起秋風。落葉紛林藪。永懷三益恩。語報乏瓊玖。願子生人閒。世世爲親友。周必大歸廬陵日記。

悼賢詩

良田十頃接晴烟。曾假過侯救旱年。俸麥一車開德濟。流民千里荷生全。人嗟逝水今亡已。俗感遺風尙泫然。獨對老僧談舊事。斜陽春色漫盈川。

饒縣志。前剡令過昱。字彥專。皇祐三年。以祕書郎來知剡事。連值歲祲。出常平錢糴米。以活流民。復割俸麥七十斛爲種。假超化院十餘頃。役饑民耕種之。明年得麥五百餘斛。民賴以活。熙寧中。昱已亡。葬過故院。與僧追誦。歎獻見民有談及。公去無不泣下。因作此詩題之院壁。

胡楚材

楚材、睦州壽昌人。慶歷六年進士。

憶彭頭山

久客倦行役。故山安在哉。松竹讀書室。水石釣魚臺。明月照歸夢。西風吹酒杯。亭亭籬下菊。寂寞爲誰開。
嚴州府志。

楊蟠

蟠字公濟。章安人。一作錢唐人。慶歷六年進士。爲密和二州推官。以詩知名。元祐中。蘇軾知杭州。蟠爲通判。與軾倡酬爲多。後知溫壽二州卒。有集。

陪潤州裴如晦學士遊金山回作

世上蓬萊第幾洲。長雲漠漠鳥飛愁。海山亂點當軒出。江水中分繞檻流。天遠樓臺橫北固。夜深燈火見揚州。迴船卻望金陵月。獨倚牙旗坐上頭。宋文鑑。

蓴菜

休說江東日日寒。到來且覓鑑湖船。鶴生嫩頂浮新紫。龍脫香髯帶舊涎。玉割鱸魚迎刃滑。香炊稻飯落匙圓。歸期不待秋風起。漉酒調羹似去年。苕溪漁隱叢話。

東岡隋真觀法師塔

東岡人不識。野寺在樵漁。落葉年年滿。春風爲埽除。

楊梅塢

夏日紅相照。天晴塢自開。襄陽多稚子。摘贈故人來。

西溪

爲愛西溪好。長憂溪水窮。山源春更落。散入野田中。

錢唐江上

一氣連江色。寥寥萬古清。客心兼浪湧。時事與潮生。路轉青山出。沙空白鳥行。幾年滄海夢。吟罷獨含情。

以上咸淳臨安志。

去郡後作

爲官一十政。宦遊五十秋。平生憶何處。最憶是溫州。思遠城南曲。西岑古渡頭。綠觴春送酒。紅燭夜行舟。不敢言遺愛。唯應念舊遊。憑君將此曲。寫寄謝公樓。溫州府志。

時燕堂

在高郵州治東衆樂園。蟻爲守時建。

吏隱孟城九十旬。豐年日日是佳辰。賦成席上猶飛雪。歌動梁閒已落塵。此地誰爲愛酒伴。他時儻憶種花人。五壇芍藥齊教放。何處揚州更覓春。高郵州志。

練光亭

寒光萬頃澹高秋。粉壁朱闌佇客愁。晚日蕭蕭聞落葉。晴天歷歷數飛鷗。烟橫絕島疎難掩。月在平波瑩不流。懷抱未忘知有處。且和風笛醉滄洲。丹陽縣志。

孫永

永字曼叔。趙人。舉進士。官吏部尙書。諡康簡。

清明

每年每遇清明節。把酒尋花特地忙。今日江頭衰病起。佛前新火一爐香。古今歲時雜詠。

袁陟

陟字世弼。號遜翁。南昌人。慶歷六年進士。知當塗縣。官止太常博士卒。有遜翁集。

王直方詩話。世弼詩。墓草

應物。而道麗奇壯過之。

潘子真詩話。世弼宦遊當塗時。郭功甫尙未弱冠。世弼愛其才。薦于梅聖俞。自爾有聲。功甫嘗曰。數載汲引。袁二丈力也。蒿埋三尺。不敢忘其賜。

茗溪漁隱叢話。世弼年十七。題百丈詩云。瓊田收秬種。玉溜注琅玕。讀書最苦。因爾癩瘡。歿時纔三十四歲。自作墓誌。有詩文十卷。號遜翁集。今不復傳。

過金陵謁吳大帝廟未冠時作

人苦曹瞞虐。天悲漢祿終。山河分鼎峙。氣象發江東。一旦墟京國。彌年象幼沖。炎精竟灰燼。紫蓋出艤幢。長策資公瑾。雄才得呂蒙。招延師友義。繼述父兄忠。舊府峩雙闕。驚濤涌半空。風雲龍虎勢。日月帝王功。地力因時險。神謀與意通。屈伸思所濟。逆順審于衷。駿足亟交貨。靈牙耀卽戎。同盟界函谷。獨斷保蠶叢。定霸葵丘劣。推心建武同。長沙兆生識。典午賴餘風。戰守遺蹤在。登臨四望中。陵遷成萬古。世異想羣雄。歌舞居民祀。干戈逐虜功。征帆來浦外。久客悵途窮。精銳銷孤劍。飄零若斷蓬。徘徊靈廡下。暮葉亂江楓。

茗溪漁隱叢話。

題劉仁瞻畫像

陣前仙琿生無愧。鼓下蠻奴死合羞。三尺吳縑暗塵土。凜然蒼鶴欲橫秋。

茗溪漁隱叢話。王旌遊金陵昇元寺。見僧房壁上。有繪金紫大夫題詩云。不能解。畫歸示其父平甫曰。此劉仁瞻像。袁世弼詩也。此詩俊拔可喜。琿實呼環。袁誤呼也。

贈郭功甫二絕

從來多病王僧祐，自小能文謝惠連。各厭塵勞思物外，莫辭攜手訪林泉。
雪後姑溪水更深，冥冥寒雨作連陰。旅懷未可頓消遣，思與洛生溪上吟。

茗溪漁隱叢話，荆公居金陵，爲功甫手寫。

所賦詩一軸，有此兩篇，世弼贈功甫詩也。

贈功父

方山憶共汎金船，屈指于今五六年。風送梨花吹醉面，月和溪水上歸鞦。浮生聚散應難料，末路窮通盡偶然。欲問故人牢落事，鹿裘深入白雲眠。

王直方詩話，王介甫嘗手書此詩。

甫嘗手書此詩。

臨終作

青靄千峯暝，悲風萬古呼。其誰挂寶劍，應有奠生芻。皎月東方隕，長松半壑枯。山泉吾所愛，聲到夜臺無。
詩人玉屑。

謝景初

景初，字師厚，絳子，慶歷六年進士，官大理評事，出知餘姚縣，多惠政，屢遷益州路提點刑獄，以屯田郎致仕，黃山谷其壻也，有宛陵集。

王直方詩話。謝師厚方爲其女擇對。見黃山谷詩曰。吾得婿如此足矣。山谷之詩。卒從謝公得句法。有詩曰。自往見謝公。論詩得濼梁。

天中記。紙以人得名者。有謝公。有薛濤。所云謝公者。富春謝司封景初。創箋樣以便尺書。因以爲名。謝公有十色箋。深紅、粉白、杏紅、明黃、深青、淺青、深綠、淺綠、銅綠、淺雲、十色也。

觀餘姚海氛

海上風與雨。未朕先氣升。澤鹵雜山雲。蒼鬱相熏蒸。交語面已障。安辨丘與陵。衣濡帶革緩。臭腥殊可憎。自非昌其陽。疾癘得以乘。君子卻陰邪。何必醫師能。

法喜堂

虛堂庇風雨。結構不務壯。外飾無髮形。置物況容長。開篋藥劑靈。拈碁白黑抗。階花淡亦天。庭石碧交向。出門鳥雀喧。燕處物我喪。吳俗夸有素。佛徒侈相尙。獨能守質靜。坐以矯流宕。棲之果自喜。何須山海上。
以上宋文鑑。

石谷亭飛瀑

落泉下峭壁。陡絕千萬丈。濺急雪片飛。望若匹練廣。曲嶺隔青林。三里已聞響。其傍有巨石。平潤可俯仰。愚俗所不道。我輩數來賞。須期秋色清。攀蘿將爾上。
會稽志。

句

倒著衣裳迎戶外。盡呼兒女拜燈前。

後山詩話。謝師厚廢居于鄧。王左丞存其妹壻也。
奉使荆湖。枉道過之。夜至其家。師厚有詩云。

宋詩紀事卷十七

錢唐厲鶚輯

祁門馬曰璐同緝

強至

至字幾聖。錢唐人。慶歷六年進士。刻苦攻詩。韓魏公甚重之。官祠部員外郎。有集。

墨蟹

瑣瑣江湖中。忽在幽人壁。短螯利雙鉞。長跪生六戟。骨眼驚自然。熟視審精墨。初疑鱸穴束。猶帶浮泥黑。橫行竟何從。躁心固已息。終朝牆壁閒。頗有肥霜色。我來空持杯。左手莫汝食。誰奪造化功。生成歸筆力。
蟹略

賈麟自陸來杭。復將如蘇。戲贈短句。

春風那復繫狂游。朝醉桐江暮柳洲。大手千篇隨地埽。一身四海逐雲浮。榮名不落閑消夢。退築聊爲晚歲謀。老橘殘鱸猶有興。片心還起洞庭舟。
瀛奎律髓

句士良

士良。成都人。慶歷六年進士。

和吳中復太守春遊海雲寺

佛土依山福遠州。春行繡騎上雲頭。補天彩石盈池在。朝海清江繞寺流。四國仰煩郇伯勞。羣生翹望謝安遊。早知爲礪爲霖意。惟有西民欲暫留。成都文類。

陳舜俞

舜俞字令舉。烏程人。慶歷六年進士。嘉祐四年登制科。歷都官員外郎。坐詆新法。謫南康酒稅。赦還卒。嘗居秀州之白牛村。自號白牛居士。有集。

棲賢寺

辟蛇行者應開寺。拭眼高僧尙有墳。龍帶雨歸三峽水。鳥銜花出五峯雲。方輿勝覽。

騎牛歌

我騎牛君莫笑。人閒萬事從吾好。千金市骨駿馬來。乘肥大躍須年少。蒲爲鞭。草爲轡。瀑布山前松徑裏。看山聽水要行遲。輕策緩驅塵不起。布袍葛帶烏接羅。山家裝束不時宜。匏尊注酒就背飲。阜囊貯書當角垂。我狂吟。醉欲倒。同醉同吟白雲老。此老不可天下人。一住廬山三十春。聲如洪鐘目如電。七十神光射人面。上半下午不要扶。合與山中作畫圖。汴州馬上顧何如。春泥沒腹仍濺帽。夜半歸來人亦痛。天真喪盡百憂集。衣食毛髮歸妻孥。爭如來騎牛。水光山色俱悠悠。

梅堯詩話。陳舜俞令舉。嘉禾人。慶歷中登進士乙科。嘉祐四年。中制科。宰越之山陰。秩滿。當召試館職。會朝廷行青苗法。上書力詆時政。謫監南康軍酒稅。到官。與劉太博凝之。日跨雙犢。以窮康廬泉石之勝。此歌世爭傳之。後遇赦還鄉。絕意仕進。元豐中卒。葬於吾鄉南門外之蘇灣。

距城僅三里許。過者必式焉。

淵明醉石

活活飛泉清繞石，悠悠天幕翠鋪空。是非分付千鍾裏，日月銷磨一醉中。柳絮任飄荒徑畔，菊花仍在舊籬中。水聲山色年年好，尙使游人想素風。廬山紀事

和開祖丹陽別子瞻後寄

仙舟繫柳野橋東，會合情多勞謫翁。相對一尊浮蟻酒，輕寒二月小桃風。羈懷散誕謳歌裏，世事縱橫醉笑中。莫恨明朝又離索，人生何處不怱怱。瀛奎律髓

林屋洞

洞天三十六，第九曰林屋。神仙固難名，瓊怪存紀錄。曠歲懷尋賞，茲晨幸臨矚。馳神在真游，豈復懦深谷。解鞵納芒屨，然松命光燭。初行已僂僂，漸入但匍匐。顧瞻避衝磕，潄淖沒手足。如此百餘步，始可立寓目。或垂若鐘虛，或植若旌纛。有如案而平，有如几而曲。鐫刻非人工，晶瑩燦黃玉。遙知竅穴外，定有金庭錄。凡肥不可往，叩擊安敢黷。鸞鳳無消息，但見白蝙蝠。却還望微明，旣出猶喘促。霑衣憐石髓，孰悔泥塗辱。庶幾達微慕，養生相吾福。

毛公壇

古壇疊亂石，草木何參差。黃衣守其傍，陳蹟刊豐碑。曰初劉真人，齒髮不可訾。但見紺綠毛，被體鬢鬢垂。雲帡一日去，空山留庭墮。弟子散巖谷，荆榛蔽荒基。晚有周息元，探訪親斬披。白鹿忽跪前，靈符見葳蕤。地勝人旣偶，凝嚴起寶祠。束帛下幽聘，良馬維素絲。前朝揖高風，有美皮陸詩。殆今三百年，事去物亦墮。

喬松委樵蘇。野蔓號狐狸。惟有鍊丹井。甘冽無等夷。一酌匪消渴。飲慕尙神禧。以上震澤編。

王存

存字正仲。丹陽人。慶歷六年進士。神宗朝。歷龍圖閣直學士。知開封府。拜兵部尙書。哲宗朝。累官尙書左丞。以端明殿學士知蔡州。紹聖初。提舉崇禧觀致仕。卒。贈左銀青光祿大夫。與黨籍。

史院席上奉和首相吳公元韻

上聖論思著。前言撫緒餘。瓊筵初賜醴。石室載紬書。徽範貽來者。功成念昔歟。欲知開局盛。門擁相君車。揮塵後錄。

遊焦山

連山擁滄江。峭絕視茲鮮。由來一氣結。殊不麗衆巘。林深鳥聲悅。境靜人自遠。方吾抱幽介。對此萬慮遣。京口三山志。

登北固山

晚登北固頂。俛視南徐城。廢壘何茫茫。山川迴縱橫。千載競誰有。六朝空戰爭。豪氣不可問。古墳人正耕。
過丹陽舊居

漂泊經故國。繫舟款柴扉。破屋他人居。昔鄰今或非。父老迎我飲。祝我晝錦衣。我謝父老言。朴拙非所祈。一官走塵土。實迫寒與飢。去鄉未幾載。頗覺儔侶稀。人事已可嗟。況當白首歸。泚泚練塘水。綠楊蔭漁磯。有田尙可耕。誓將父老依。以上鎮江府志。

句

珠鞵錫御恩猶在。玉輦親扶事已空。

孔平仲談苑。光獻曹太皇。嘗作珠子鞍。轡上施紅羅銷金坐子。賜神宗。神宗駕幸金明池。遂乘此鞵。太皇太后病稍閒。神宗親製一小輦。極爲輕巧。以珠玉黃金飾之。進於太皇。遂載而之涼殿。太后扶其左。神宗扶其右。太皇下輦曰。官家太后親自扶鞵。當時在曹家作女時。安知有今日之盛。喜見顏色。王正仲進光獻挽詞云云。蓋用此兩事也。

韓絳

絳字子華。靈壽人。徙雍丘。忠獻公億子。慶歷中進士。歷翰林學士。御史中丞。神宗朝。拜同中書門下平章事。封康國公。卒。贈太傅。諡獻肅。

韓元吉桐陰舊話。獻肅公諱絳。字子華。發解過省殿試。皆第三。以元祐三年三月薨。皆三數。亦異事也。故蘇魏公挽詩云。三登慶歷三人。第四入熙寧。四輔尊。蓋公自樞副遷參政。宣撫陝右。卽軍中拜昭文相。再入史館相也。

復齋漫錄。子華兄弟皆爲宰相。其家呼爲三相。公呼持國爲五相。公云。又京師人呼爲桐木韓家。蓋公家門有梧桐木。取爲稱。以別魏公子華。沒陸農師爲挽章以記之。所謂棠棣行中爲宰相。梧桐名上識韓家是也。子華以辰年辰月辰日辰時薨。農師

又詩云。非關庚子曾占。

鷗自是辰年併值龍。

游鴻慶院

久旱雨初足。樂游春正深。喧闐觀士女。清曠入山林。佛界雲成寶。僧園地布金。方塘探子石。高閣盍朋簪。沙水通溪白。松筠逐徑陰。紛華從滿目。幽寂自虛心。印組端爲累。巖扃得暫尋。晚風吹綠野。歸騎已駸駸。成都文類

和范蜀公題蜀中花圖

徑尺千餘朶。矜誇古復今。錦城春物異。粉面瑞雲深。賞愛難忘酒。珍奇不廢金。應知色空理。夢幻卽懽心。聲畫集

謁仙翁祠書山菴亭

玉井不可到。玉泉聊可尋。馬行穿亂石。人語入深林。川迴沙明色。溪喧谷響音。我來方六月。雲榭一披襟。華嶽全集

韓維

維字持國。絳弟。以廢入仕。英宗朝。累除知制誥。神宗卽位。爲翰林學士。加承旨。元祐初。拜門下侍郎。以太子少傅致仕。紹聖中。坐元祐黨。謫均州安置。元符初。復官。卒。有南陽集。

寄孔寧極

雨滴菴上茅。風亂窗前竹。繁聲互入耳。欲寐不得熟。緬懷田舍翁。石徑滑馬足。連山暗秋燈。一路何處宿。

過庭錄。持國守許。孔居郊。常具車馬。邀致郡治之養。真菴。同安促膝。快論人間事。久而後歸。一夕大雨。孔告還。持國獨寢菴中。寄詩云云。

下橫嶺望寧極舍

驅車下橫嶺，西走龍陽道。青煙幾人家，綠野四山抱。鳥啼春意闌，林變夏陰早。應近先生廬，民風故醇好。

王直方詩話：韓持國嘗有詩云：青煙

幾人家，綠野山四抱。當時無不傳之。

同曼叔游菩提寺

高城如破崖，寺帶喬木古。禪房掩清晝，佛畫剝寒雨。荒池野蔓合，濁水佳蓮吐。蕭條聯騎游，淡薄對僧語。秋風日夕好，勝事從此數。

盧溪盧攜讀書處

伊人沒已久，溪溜亦如綫。淳氣揖老僧，清陰坐春院。始悟入山深，幽林鳥聲變。

西溪

我從南嶺來，引轡下雲木。不知溪流處，但見翠滿谷。涼葉覆山泉，修篁翳茅屋。

奉同原父賦澄心堂紙

江南國土未破前，澄心名紙世已傳。高堂久傾不復見，誰謂此物猶依然。當時萬杵擣雲葉，鋪出几案滑且堅。剡溪藤骨不足數，蜀江玉屑誰復憐。君臣嬉燕盛文采，駢章麗句鬪巧儼。一朝零落隨散地，中原篋笥生光鮮。君安得此尙百幅，題以大句先羣賢。羣賢落筆富精麗，瓊瑤寶玦相鉤聯。嗟子材力豈當敵，雖欲強賦何能妍。獨耽玩物古所戒，崇尙浮藻政豈先。江南可哀紙可惜，後有觀者存吾篇。

王直方詩話澄心堂紙乃江南李後主所製國初亦不甚以爲貴自劉賈甫首爲題之又邀諸公賦之然後世以爲貴重賈甫詩云當時百金售一幅澄心堂中千萬軸後人聞名寧復得就令得之亦不識文忠公詩云君不見曼卿子美真奇材久已零落埋黃埃君家雖有澄心紙有敢下筆知誰哉梅聖俞云寒溪浸紙春夜月敲冰舉簾勻割指焙乾堅滑若鋪玉一幅百金曾不礙東坡云詩老囊空一不留一番曾作百金收又從宋壁求此紙云知君也厭雕肝腎分我江南數斛愁

同化光陪寧極之滢陽城

不踏南溪路于今又幾春能來共聯轡還是舊游人載酒真乘興談經或入神歡餘不無媿林壑可還身

杜君章家賦海棠

濯錦江頭千萬枝當年未解惜芳菲而今得向君家見不怕春寒雨溼衣

石林詩話韓持國雖剛果特立風節凜然而情致風流絕出時輩許昌崔象之舊第今爲杜君章所有廳後小亭僅丈餘舊有海棠兩株每花開時持國輒載酒日飲其下歲以爲常至今故老猶能言之韓忠獻公嘗帥蜀持國兄弟皆侍行尙少故前兩句云

醅醲

平生爲愛此香濃仰面常迎落架風每恐春歸有遺恨典刑猶在酒杯中以上南陽集

程伯淳自洛過訪時范純禮亦居潁昌作詩示之

閉門讀易程夫子清坐焚香范使君顧我未能忘世味綠尊紅妓對斜曛苦溪漁隱叢話

句

數畝家園荒杞菊。一池秋水沸龜魚。

雪浪齋日記韓持國句。

前人評云沸字直錢。

一笛西風吹落日。滿帆行客背孤城。合璧事類後集。

韓

續

續字玉汝。維之弟。第進士。英宗朝。歷淮南轉運使。神宗朝。累知樞密院事。哲宗朝。拜尚書右僕射。兼中書侍郎。出知潁昌府。以太子太保致仕。卒。贈司空。崇國公。諡莊敏。

桐陰齋話。莊敏公續。初求字於歐陽文忠公。以小合幅紙書玉女二字送來。莊敏大不樂。明日相見。猶有愠容。文忠公曰。出處無點水。君何怪邪。取筆添女字三點。相與一笑。蓋詩中王欲玉女。但音發作汝也。前輩亦雅戲如此。

茗溪漁隱叢話。東坡云。韓續爲秦州。酷暴少恩。以賊殺不辜去官。秦人語云。寧逢乳虎。莫逢韓玉汝。孫臨最善滑稽。尤善對。或曰。莫逢韓玉汝。當以何對。臨應聲曰。可怕李金吾。天下以爲口實。可怕李金吾。乃杜子美詩也。

東山寺

久有東林約。因乘暇日游。眼明初出郭。神王欲凌秋。野曠騫孤隼。江清颺遠鷗。近山青嶂合。多稼綠雲浮。雞犬聲相接。溝塍水亂流。度橋喧從騎。環樹轉鳴騶。問俗驚堯壤。尋僧到沃洲。深沈開寶闕。磅礴軼華輈。像設嚴珠殿。經聲隱絳幃。仰看香刹直。徐步畫廊脩。遇物皆周覽。逢軒卽少留。前庭初顯豁。後徑轉深幽。野嶺蒼筠麗。霜楓赤葉稠。隔牆聞好鳥。循沼玩游鯈。翠榦樓纔剝。紅芒稻半收。凌虛登陸道。市境對岑樓。

暗谷藏危棧。平沙際別州。川原同聚沫。身世劇浮鷗。回首飄鄉思。臨尊浣客愁。清閑資善奕。決勝在冥搜。影動穰苴表。風生曲逆籌。歸鞍不敢緩。斜日照文楸。四朝詩。

邵亢

亢字興宗。丹陽人。舉茂才入等。神宗朝。歷樞密直學士。知開封府。拜樞密副使。以資政殿學士。知外郡。卒。贈吏部尚書。諡安簡。

寄吳處厚

流年真似隙中駒。別後情懷嬾更踈。天上又頒新歷日。牀頭未答故人書。殷勤羔雁工曹檄。狼藉杯盤上客魚。好在仲宣家萬里。從軍苦樂定何如。

青箱雜記。樞密邵公亢。謂余詩似樂天。熙寧中。余辟定武帥幕。公自鄆附所作詩一軸。并寄余詩。

張揆

揆字文裕。齊州歷城人。舉進士。累遷龍圖閣。知成都軍。英宗朝。爲戶部侍郎致仕。熙寧中卒。賀執政入東西府。熙寧中始建東西府。宣執政遷入。借官車輦。仍賜御筵。

五仙同日集蓬萊。玉宇珠簾次第開。乍向壺中窺日月。猶疑海上見樓臺。光生金鉉調元地。榮極璿樞命世才。共荷聖賢天地寵。定知霖雨及時來。李壁王荆文公詩注。

丁假

偃蘇州人仁宗朝進士。

句

白虎前芳掩金華舊事輕。天心非不寤。垂意在蒼生。書試邇英延講藝。溫公詩話。

鄭修輔

修輔慶歷中以大理寺丞爲豐城令。至和元年爲奉化令。

隱潭

在奉化縣西北。

在昔知何人。鑿破青山骨。飛泉直下來。千尺瀉倏忽。兩壁蒼翠閒。一陣風雷突。傍無塵埃蹤。中有蛟龍窟。寒氣不可嚮。猛勢豈能屈。安得當早年。爲霖濟羣物。四明龍齋。

張師錫

師錫開封襄邑人。工部侍郎去華子。仁宗朝仕至殿中丞。

老兒詩五十韻

鬢髮盡皤然。眉分白雪鮮。週遮延客話。偃僂抱孫憐。無病常供粥。非寒亦衣錦。假溫衾擁背。借力杖搭肩。貌比三峯老。年過四皓仙。喚方離枕上。扶始到門前。每愛烹山茗。常嫌釘石蓮。耳聾如塞纊。眼暗似籠煙。宴坐羸凭几。乘騎困鞦韆。頭搖如轉旋。脣動若抽牽。骨冷愁離火。牙疼怯漱泉。形骸將就木。囊橐尙貪錢。膠睫乾眇綴。黏髭冷涕懸。披裘腰嬾繫。濯袖袖慵揜。擡舉衣頻換。扶持藥屢煎。坐多茵易破。行少履難穿。喜婢裁幫布。嗔妻買粉鈿。房教深下幕。牀遣厚鋪氈。琴聽憐三樂。圖張笑七賢。看經嫌字小。敲磬喜聲圓。

食罷羹流袂。杯餘酒帶涎。樂來須遣罷。醫到久相延。裏帽繼橫掠。梳頭取次纏。長吁思往事。多感聽哀弦。
氣注腰還重。風牽口更偏。墓松先遣種。誌石預教鐫。客到唯求藥。僧來忽問禪。養茶懸竈壁。曬艾曝簷椽。
怒僕空睜眼。嗔兒謾握拳。心驚嫌蹴踘。腳軟怕秋千。局縮同寒狖。摧脛似餓鶩。觀瞻多目眩。舉動卽頭旋。
女嫁求紅燭。男婚乞綵錢。已聞捐几杖。寧更佩韋弦。賓客身非與。去聲兒孫事已傳。養和屏作伴。如意拂
相連。久棄登山屐。惟存負郭田。呻吟朝不樂。展轉夜無眠。呼稚臨牀畔。看書就枕邊。冷疑懷貯水。虛訝耳
聞蟬。束帛非無分。安車信有緣。伏生甘坐末。絳老讓行先。拘急將風夜。昏沈欲雨天。雞皮塵漸漬。齟齬食
頻填。每憶居郎署。常思釣渭川。喜逢迎佛會。羞赴賞花筵。徑狹容移檻。塔危索減輒。好生焚鳥網。惡殺拆
漁船。既感桑榆日。常嗟蒲柳年。長思當弱冠。悔不贖狂顛。賓退錄

喜子登第

御榜今朝至。見名心始安。爾能俱中第。吾可遂休官。賀客畱連飲。家書反覆看。世科誰不繼。得慰二親難。
詩話總龜

楊備

備字修之。建平人。億之弟。慶歷中爲尚書虞部員外郎。分司南京。上輕車都尉。有姑蘇百題。金陵

覽古詩。鶚按景德建康志載作金陵詩者。楊備字修之。張敦頤六朝事蹟作楊修。今據文獻通考當與中吳紀聞所載姑蘇

百題俱屬楊備。六朝事蹟作楊修者筆誤也。

夢中作

月俸蚊錢數甚微。不知從宦幾時歸。東吳一片煙波在。欲問何人賣釣磯。

中吳紀聞。楊郎中。天聖中爲長溪令。夢中忽作詩云云。及寤心潛異之。明道初。宰華亭。俄丁內艱。遂家于吳中。樂其風土之美。安而弗遷。因悟夢中所作。幾于前定。嘗效白體作我愛姑蘇好十章。又作姑蘇百題詩。每題箋釋其事。

蠡口

霸越勳名開世才。五湖煙浪一帆開。猶防烏喙傷同輩。此地復招文種來。

華山精舍

巖屏晚樹噪寒鴉。嵐翠樓臺釋子家。池面鑑光功德水。金波影裏石蓮花。

汎太湖

漁舸載酒日相隨。一笛蘆花深處吹。湖面風收雲影散。水天反照碧琉璃。

姑蘇臺

山花野草一荒丘。雲裏驕奢舊蹟留。珠翠管弦人不見。上頭麋鹿至今遊。

響屨廊

步步香翻羅襪塵。粉紅花豔滿宮春。傾城一笑無遺迹。不見長廊響屨人。

洗馬池

在蘇州郡學南。

一一牽來種是龍。臨波深下更嘶風。金鞍玉勒拋何處。騰踏渥洼寒影中。以上吳郡志。

新亭

滿目江山異洛陽。北人懷土淚千行。不知亡國中書令。歸老新亭是故鄉。

晉新宮

玉案金爐對御牀。歸然應似魯靈光。螭頭直下雙魚尾。不讓西京舊栢梁。

蠶堂

摘繭抽絲女在機。茅簷葦箔舊堂扉。年年桑柘如雲綠。翻織誰家錦地衣。

臺城

六朝遺蹟好山川。宮闕灰寒草樹煙。江令白頭歸故國。多情合賦黍離篇。

層城觀

亦名穿針樓。

秋星如彈月如梳。宮妓香添乞巧爐。萬縷千針同一意。眼穿腸斷得知無。

秦淮

一氣東南斗牛。祖龍潛爲子孫憂。金陵地脈何曾斷。不覺真人已姓劉。

獨足臺

鳥跡分明在帝臺。管弦聲裏戰書來。回頭一覺風流夢。猶得朱門傍水開。

胭脂井

擒虎戈矛滿六宮。春花無樹不秋風。蒼黃益見多情處。同穴甘心赴井中。以上六朝事蹟。

張俞

俞，字少愚，益州郫人。屢舉不第，用薦除祕書省校書郎，願以授父顯忠，而自隱於家。文彥博治蜀，爲築室青城山白雲溪以處之，號白雲先生。有白雲集。

宋史隱逸傳：俞六召不應，其卒也。妻蒲氏名芝，賢而有文，爲之誄曰：高視往古，哲士實殷。施及秦漢，餘烈氤氳。挺生英傑，卓爾逸羣。孰爲今世，亦有其人。其人伊何，白雲隱君。嘗曰丈夫，趨世不偶。仕非其志，祿不可苟。營營末途，非吾所守。吾生有涯，少賈多艱。窮亦自固，困亦不顧。不貴人爵，知命樂天。脫髻散髮，眠雲聽泉。有峯千仞，有溪數曲。廣成遺趾，吳興高躅。疏石通徑，依林架屋。麋鹿同羣，晝游夜息。嶺月破雲，秋霖灑竹。清意何窮，真心自得。放言遺論，何榮何辱。孟春感疾，閉戶不出。豈期遂往，英標永隔。抒詞哽噎，揮涕汎瀾。人誰無死，惜乎材賢已矣。吾人嗚呼哀哉。

遊驪山

玉帝樓前鎖碧霞，終年培養牡丹芽。不妨野鹿踰垣入，銜出宮中第一花。青瑣高議。

題漢州妓項靶羅

蜀國佳人號細腰，東臺御史惜妖嬈。從今喚作楊臺柳，舞盡春風萬萬條。

邵伯溫聞見前錄，慶歷間，文潞公知成都府，年未四十，多讜集，有飛語至京師，御史何鄭聖從因謁告歸，上遣伺察之，聖從將至，潞公亦爲之動，少愚謂公曰：聖從之來無足念，因迎見於漢州，會有營妓善舞，聖從喜之，問其姓，妓曰楊，聖從曰：所謂楊臺柳者，少愚即取妓之項靶羅，題詩云云，命其妓作柳枝詞歌之，聖從爲之霑醉，後數日，聖從至成都，頗嚴重，一日潞公大作樂，迎其妓雜府妓中歌，少愚之詩，以酌聖從，每爲之醉，聖從還朝，潞公之謗乃息。

楚中作

渺渺洞庭野。蕭蕭黃鶴樓。水通雲夢浦。人渡沔陽舟。廣澤侵吳壤。孤城接郢丘。山分三楚斷。溪入九江流。寂寞休兵月。紛紜戰國秋。吳生來赤壁。魏武定荊州。六代憑形勢。羣雄死寇讐。淒涼帝子宅。浩蕩禰衡洲。萬里浮雲暮。千年故國愁。武昌宮不見。麋鹿自羣游。潘子真詩話

蠶婦

昨日入城市。歸來淚滿巾。徧身羅綺者。不是養蠶人。宋文鑑

謁白帝廟

孤山扞江口。上有白帝祠。橫視天下險。萬流皆俯窺。古殿鎖神物。悲風出陰帷。天昏瓦棟折。狐鼠亦生威。優巫日鼓舞。鬼怪生奔馳。雷霆卷蛟窟。雹火燒松枝。入戶精魄動。有如陰兵隨。吁哉漢盜亂。海內遂崩離。赤龍始潛躍。逐鹿過秦時。公孫奮神劍。定蜀圖安危。隄垝開北戶。荆門啓東陲。長驅百萬衆。日闢天下師。羣豪插羽翼。與漢爭雄雌。兩帝不並立。興亡良可悲。天運雖有在。聖賢豈無爲。昭皇攬英傑。襲軌奄重基。自注先主武侯。風雲共浩蕩。千古餘寒碑。威神竟不沒。萬里震南夷。方輿勝覽。

翠微寺

翠微寺本翠微宮。樓閣亭臺數十重。天子不來僧又死。樵夫時倒一株松。清波別志

蘇麟

句

近水樓臺先得月。向陽花木易爲春。

翰府名談。蘇麟爲杭州屬縣巡檢。范文正鎮錢唐。兵官皆獲。麟書獨麟在外邑。未見收錄。麟入府獻詩云。文正薦之。

王冲

次韻范公遊雲門仲淹

高躡五雲堆。平看萬象開。樵風溪路遠。華雨梵天來。刹倚三峯直。鐘傳萬壑迴。叨陪上方燕。依約近中台。
雲門志略

霍交

和趙閣道遊海雲山

山深藏古寺。旁枕舊方池。鼓響揭雲外。石探從水涯。使旌遊不倦。瑞麥獻相隨。事簡民同樂。歸心莫競馳。
成都文類

任大中

大中。字子固。三衢人。老于儒學。作詩寒苦。趙清獻喜之。

從清逸老人遊西山夜宿翠巖聯句

蒼龍夭矯西北來。鑿破明珠成碧岫。任何人駕空起樓閣。地靈不敢藏餘秀。潘鎖窗雲重衣巾潤。梳木風清肌骨透。任客來一夜與僧談。氣覺浩然充宇宙。潘

絕句

莫管流年一擲梭。花前對酒且高歌。命中若有終須有。到底無時不奈何。以上潘子真詩話。

送永倅周茂叔還濂溪

君去何人最淚流。老翁身獨宿南州。隨君不及秋來鴈。直到瀟湘水盡頭。廬山志。

邢夢臣

和趙閱道游海雲山

使旌驅近郭。民宴列芳池。洩洩春臺上。沈沈暮海涯。鴻驚人宛轉。電激騎追隨。此會經年至。須防日似馳。成都文類。

白贊

和趙閱道題新繁周表權如詔亭

亭名詔語密相沿。須信從來教義全。肯構嘗探詩禮業。出綸特表父師賢。早安素履知文富。晚服朱衣稱賞延。不是韋家專講學。豈聞旛戟到門前。成都文類。

石景立

景立溫州郡守

迎趙清獻公遊雁蕩

鴈蕩天台路險艱。多應特地隔塵寰。不辭登陟來千里。爲是東南第一山。爭望台星從海上。方知蓬島在

劉孝孫

和趙閱道題新繁周表權如詔亭

義方曾榜舊亭名。子已爲郎典要城。身服上恩今日顯。詔符前語是人驚。正如伯起鱣堂兆。兼勝子公駟閣榮。試問繁江諸父老。詩書何似寶金籙。成都文類

張球

上呂許公

近日廚中乏短供。孩兒啼哭飯籬空。母因低語告兒道。爺有新詩謁相公。青瑣高議

郭從周

從周、西川人。

贈何中正

三字來時月正圓。一麾從此出秦川。錢唐春色濃如酒。貪醉花閒臥不還。

翠屏筆談。何龍圖。中正初登第。聞西川郭從周精于卜。乃以繡素求筮。從周作一絕贈之云云。後自秦川移杭州而捐館舍。從周之筮何其驗歟。

郊僑

僑字子高。亶子。晚年自號凝和子。鄉人謂之郊長官。

登翠微作。崑山上方有僧屋曰翠微。

行客倦奔馳。尋師到翠微。相看無俗語。一笑任天機。曲沼淡寒玉。橫山鎖落暉。情根枯未得。愛此幾忘歸。

訪凌峯賢上人

步入凌峯閣。尋師師未歸。凭闌寂無語。唯見白雲飛。

爲簡公約賦素琴堂

素琴之堂虛且清。素琴之韻淪杳冥。神閑意定默自鳴。宮商不動誰與聽。堂中道人骨不俗。貌龐形端顏瑩玉。我嘗見之醒心目。寧必絲桐弦斷續。嗚呼靖節已死不復聞。成虧相半疑昭文。阮手鍾耳相吞吐。素琴之道詎可論。道人道人聽我語。紛紛世俗誰師古。金徽玉軫方步武。虛堂榜名無自苦。以上中吳紀聞。

陳 翥

翥字子翔。號咸聲子。又號銅陵逸民。慶歷間布衣。好植桐竹。又號桐竹君。作桐譜。

桐竹君詠

高桐凌紫霞。修篁拂碧雲。吾常居其閒。自號桐竹君。不解放俗利。所希脫世紛。會友但文學。啓談皆典墳。吁嗟機巧徒。反道胡足云。桐譜。

